

HOMO
BENE MO-
RIENS.

Exemplum
SEU

CHRISTIANI

Insula ÆGROTI *Vigrensis*

Ad bonam & felicem
Mortem

DISPOSITIO.

AUTHORE

R. P. CLEMENTE BOLES-
LAVIO. Ordinis Minorum Strictioris Ob-
servantiæ Reformatorem. S. T. L.
& Prædicatore.

Typis Monasterii Olivenfis S. O. C.

Imprimebat.

JOANNES JACOBUS TEXTOR Factor.
Anno M. DC. LXXXV.

I.

Z.

A.

L.

C.

G.

R.

M.

S.



*Crux nitet & calcat Victrix fortissima
ferrum,*

*Demonstrans rectam fulgida ad astra
viam.*

*Sic calcare docet mundum ZAPOL-
SCIVS Abbas*

*Atque nitens cœtum ducit ad astra
suum,*

Bj Polen B. V. 24

Perillustri & Reverendissimo
I OMINO

DN. JOANNI

de Roxyce

ZAPOLSKI,

Sacri Ordinis Cisterciensis

DIVINA VOCATIONE
ABBATI LANDENSI,

Per utramque Poloniam, Li-
thuaniam, Prussiam,

COMMISSARIO

&

VICARIO GENERALI,

Protonotario Apostolico,

J. U. Doctori Romano,

S. R. M. SECRETARIO,

Domino & Benefactori
Colendisimo.



Vidnam vel maximè in
hac vita mortali homo
in votis habere debeat!
Perillustis & Reverendis-
sime Domine, ostendit ille licet gen-
tilis Vates Balaam dum sibi Num. 23.
precatur: *Moriatur* (inquit) *anima*
mea morte justorum & fiant novissima
mea horum similia. Et certè justè
optare debet homo mori morte
justorum; mors enim hæc est utilis-
sima & salutifera, quæ est duplex.
Prima est mors illius hominis de quo
S. Paulus 1. Cor. 2. *Animalis* (inquit)
homo non percipit ea, quæ sunt Spiritus
Dei, sed scilicet carnis, seu est per-
emptio sensualium oblectationum.
Nam animalitas est vitæ motus, sensibus
corporis serviens, cum anima quasi extra
se

se per sensus corporis dilectorum fruitione
 pascit vel nutrit sensualitatem suam, in-
 quit Mellifluum S. Bernardi os de-
 vit. solitar. De hac morte S. Ambro-
 sius in Luc. 9. Ubi recensita duplici
 hominis morte scilicet corporali
 per sortem naturæ, & spiritali in-
 anima per labem peccati, *Est inquit*
& alia mors, quæ secularium affert in-
teritum voluptatum, in qua non natura,
sed delicta moriuntur. Hanc mortem
 subimus conssepulci in Baptismo & mortui
 cum Christo. Hanc mortem mori voluit
 cum prophetaret Balaam ut Deo viveret,
 & ideo dixit: moriatur anima mea morte
 justorum. De hac etiam prima morte
 justorum dulciloquus S. Bernardus
 serm. in Cant: *Excedente ait animâ*
etsi non vitâ certè vitæ sensu, necesse est
etiam ut nec vitæ tentatio sentiatur.
Quis dabit pennas mihi sicut columbæ, &
volabo

volabo & requiescam? Veinam hac morte ego frequenter cadam & evadam laqueos mortis ut non sentiam vitæ luxuriantis mortifera blandimenta, ut non obstupescam ad sensum libidinis, ad æstum avaritiæ, ad iracundiæ & impatientiæ stimulos, ad angulos sollicitudinum & molestias curarum. Moriarur anima mea morte justorum, ut nulla jam illaqueet fraus, nulla oblectet iniquitas. Bona mors est, quæ vitam non aufert, sed transfert in melius.

Secunda mors Justorum est: separatio Animæ à Corpore in gratia DEI. Triplex est mors inquit Hugo Cardinalis: Naturæ, Culpæ, & Gratiæ. In prima moritur caro, in secunda anima, in tertia totus homo. Prima separat animam à carne, secunda dividit gratiam ab anima, tertia sejungit totum hominem à curis seculi. Prima est omnium, secunda malo-

malorum, tertia est bonorum. Mortui prima morte sepeliuntur in mundo, secundum in inferno cum divite epulone, tertii in Caelo cum Lazaro. De prima dicitur Eccl. 4. O mors quam amara est memoria tua. De secunda; Mors peccatorum pessima. De tertia: Moriatur anima mea morte justorum. Et hac morte mori, ô quam debet optare homo? Videmus homines in mundo toto cordis affectu temporalibus inhiare, atque ad mundi quæque desiderabilia suspirare, ad honores aspirare, terrenaque optare. Verum rectè S. DEI Psaltes miratur: Filii hominum usquequo gravi corde? ut quid diligitis vanitatem, & quæritis mendacium? Nam quid prodest homini, si universum mundum lucretur, & justorum morte non moriatur, sed animæ suæ detrimentum patiat, ac

morte impiorum moriatur. A qua morte, perditionis & continuæ mortis pendet æternitas. Perisse semel, æternum est. Hoc damnum est irreparabile, semel mortuus es, semper mortuus es, semel malè mortuus es, damnatus es; per omnem æternitatem hanc mortem, corrigere, hanc damnationem excutere, non poteris.

Equidem in toto vitæ tuæ curriculo Perillustris & Reverendissime Domine, nemo non videt Te fuisse & esse mortuum prima morte justorum. Qualis enim sit hominis adolescentia? edisseris Ambrosiane S. Archipræsul Mediolani lib. de Interpret. Job. cap. 7. *Adolescentia inquit sola est invalida viribus, infirma consiliis, virio calens, fastidiosa monicoribus, illecebrosa deliciis.* Quid autem fit?

Au-

Aureum os Hom. 4. in Epist. i. ad Timoth. eam appellat. *Equum indomitum & veluti feram belluam.* Et quid facit ille qui ab adolescentia sua Christi iugo tenerum acclinat & subdit collum illudque indefinenter portat, nisi seipsum piæ adjudicat morti, seque ipsum perimit? de quo bellissime S. Zeno Episc. Veronensis & Martyr. ser. 7. ad Neoph. post Bapt. *O Liberatoris inquit nostri profunda providentia? O damnatio necessaria! in semetipso homo jugulatur, ut vivat; percussor non videtur, percussoris non cernitur gladius, percussi non dolet vulnus, non defluit sanguis, expirantis non palpitat corpus, non decolor color est. Ipse est, tamen non est ipse. Vetus quidem videtur domicilium, sed novus inquilinus. Exultat mutatione morum natiuitatis suæ nobilitatem virtutibus probaturus.*

Hanc Tibi suavem & salutiferam,
Perillustreis & Reverendissime Do-
mine in adolescentia tua adscivisti
mortem, dum spretis carnis & mun-
di illecebris Sacræ Militiæ Christi
nomen dedisti, atque per annos
floridæ juventutis Angelicam duxi-
sti vitam.

Verum nec in ætate adulta mori
morte justorum desisti. S. gentium
Doct̃or Coloss. 2. laudat suos in
Christo filios: *Mortui estis cum Christo
ab elementis hujus mundi.* Quæ sint
hujus mundi Elementa? innuit Pri-
masius: *Elementa (inquit) hujus
mundi possunt definiri, Avaritia, ambitio
honorum, & cætera mundana.* Sanctus
autem Antonius Paduanus enume-
rat illa notanter. *Terra (inquit) est
Avaritia. Aqua est Luxuria. Aer est
Inconstantia. Ignis est superbia.* Ab his
Ele-

Elementis procul semper abes, &
 mortuus es cum Christo Perillustribus
 & Reverendissime Domine. Alia in
 Te salutifera & gloriosa Virtutum
 cernuntur Elementa scilicet: Justitia
 ante Deum in omnibus mandatis &
 justificationibus Domini sine que-
 rela. Temperantia in sensibus coër-
 cendis, & affectibus domandis. Pru-
 dentia per tot annos in Sacri Ordinis
 numerofo exercitu laudabilissime
 regendo. Fortitudo indefessa in
 Præfulatus Generalis onere portan-
 do. Patientia in laboribus subeundis.
 Humilitas in honoribus postpo-
 nendis. Modestia in laudibus ac-
 ceptandis. Mansuetudo in monen-
 do. Lenitas in arguendo. Miseri-
 cordia in sublevando. Charitas in
 subveniendo. Devotio in orando.
 Exemplaritas sanctorum operum

in ædificando &c. Propter quas
Virtutes : *Quasi stella matutina in me-
dio nebulae & quasi luna plena in diebus
suis, lucet. Et quasi sol refulgens, sic
Tu refulges in templo Dei. Quasi arcus
refulgens inter nebulas gloriæ & quasi
flos rosarum in diebus vernis : & quasi
lilia quæ sunt in transitu aquæ & quasi
thrus redolens in diebus æstatis, Eccl. 30.*

Denique in tua Venerabili senec-
ta, quis Te non videt mortuum,
esse morte iustorum ? Ille ejusmodi
interit morte, qui mortuus carni,
mundo & peccato, soli vivit DEO,
docente Sancti gentium Magistro :
*Existimate vos, mortuos quidem esse, vi-
ventes autem Deo Rom. 6. Talis mor-
tuus (inquit Greg. Nyssenus) non
capitur divitiis, non frangitur deliciis.
aliam à mundo vitæ regulam, aliam
morum instituit normam. Didicit res
mun-*

mundanas contemnere , terrena præter-
currere, ad cœlestia festinare. Tam fa-
 lutaris mortis indubitatè apparent
 signa in Te Perillustri & Reveren-
 diſſime Domine. Tu enim es ille, cui
 paupertas Religioſa , divitiæ ; cui
 jejunium epulæ ; cui maceratio
 carnis, voluptas ; cui caſtitas An-
 gelica, delitiæ ; cui demulcens aures
 muſica devotiſſimus in choro can-
 tus ; cui requies , vigiliæ ; cui ſo-
 mnus media nocte in Eccleſia , una
 cum Fratrum ſeraphico agmine de-
 cantata pſalmodia. Tu es ille, cujus
 instantia quotidiana cum S. Paulo ,
 non terrenorum , ſed omnium Ec-
 cleſiaſticarum Tibi commiſſarum
 ſollicitudo ; cujus converſatio in
 Coelis ; cujus opus cordis ardentis-
 ſima in Deum charitas atque conti-
 nua Cœleſtium contemplatio ; cujus
 lar-

larga beneficentia in alios indignos
Religiosos , præsertim in nostrum
Divi Francisci coetum, singulare ani-
mæ solatium; denique cujus vivere
Christus, & mori lucrum.

Et de hac morte justorum glo-
riari & lætari Te oportet in Christo
Perillustri & Reverendissime Domi-
ne; nam cum Apostolo manes
configuratus morti ejus Philip. 3. Desi-
derabilis & nimis gloriosa Christi
mors est, eò quod sit hominibus
utilissima & salutifera: nam quid-
quid Ecclesia Christi habet divinæ
gratiæ, quidquid sanctitatis, quid-
quid salutis, totum hoc habet ex
morte & laboribus Christi. Et Tu
Perillustri & Reverendissime Domi-
ne *configuratus es morti ejus*. Nam
quid est aliud Sacer tuus Cistercien-
sis Ordo sarmaticus, cujus Tu supre-
mum

mum geris Præfulem nisi *Hortus* ille
 irriguus Isa. 58. Hortus amænissimus,
 florum pulchritudine plenissimus;
 cujus amænitate delectatus ipse
 plantator Cœlestis, flores & fructus
 ejus dulciter alloquitur. Eccl. 39.
*O*baudite me divini fructus & quasi rosa
 plantata super rivos aquarum fructifi-
 cate. *Q*uasi Libanus odorem suavitatis
 habete. *F*lorete flores quasi lilium, &
 date odorem & frondete in gratiam &
 collaudate canticum & benedicite Domi-
 num in operibus suis. *D*ate Nomini ejus
 magnificentiam, & confitemini illi in voce
 labiorum vestrorum. Hic igitur Hor-
 tus sacer, si quid habet pulchritudi-
 nis, si quid venustatis, si quid spe-
 ciositatis, si quid disciplinæ Regu-
 laris, si quid profectus spiritualis, si
 quid gravissimi de sanctitate odoris,
 totum hoc debet morti Tuæ justo-
 rum

rum vigilantiae Tuæ, sollicitudini
Tuæ, laboribus & Virtutibus Tuis;
quibus venustissimum sacri horti
Tui florem scilicet Perillustrem &
Reverendissimum Nepotem Tuum
desideratum baculum senectutis Tuæ
Coadiutorem & Successorem Tuum
JOANNEM item ZAPOLSKI
peperisti, cumque pulcherrimè flo-
rere atque omni Virtutum splendore
fulgere fecisti. Mortuus es sine
morte in Christo *configuratus morti*
ejus.

Post hanc primam in vita mor-
tem manet Te Perillustris & Reve-
rendissime Domine altera justorum
mors, scilicet decessus in gratia DEI
& infallibili spe Vitæ æternæ; mors
optata, mors felix, ad quam Te ser-
viendo fidelissimè Christo præparas
& disponis, ita ut cum S. Hilarione
Ab-

Abbate trementem alloqui possis
animam : *Egredere anima mea, egre-
dere quid times ? septuaginta annis ser-
vivisti Christo & mori times ?* Quam
felicitatem mortis, ego Tibi Perillu-
stris & Reverendissime Domine in-
time apprecor. Et ut tibi vel in-
r inimo ad bonam & felicem mor-
tem inservire possim, præsentō &
devoveo Tibi hunc Hominem bene
morientem, ad spirituale subsidium
& salutare ministerium ; quem dum
Tua piâ munificentia prodire in lu-
cem fecisti, *incrementa frugū justitiæ* Tuæ
copiosè auxisti. Tu hunc Hominem
licet exilem inter Tuos connumerare
& me singulari Tuo favore ac bene-
volentia prosequi non dedigneris.

Tuæ Perillustris & Reverend. Dominat.

Devotissimus Servus & Evorator

Fr. Clemens Bolellavius

Ordinis Minorum Strictioris observ.

Reformatorum. S. T. L. & Prædicator.

Facultas Theologica

Nos infra scripti de licentia & potestate à Reverendissimo Patre Ministro Generali Superiore nostro colendissimo, & ab Admodum Reverendo Patre Cypriano Rujevio Ordinis Minorum strictioris observantiae Reformatorum Provinciae Majoris Poloniae Ministro Provinciali Superiore nostro observant S. T. Lectore nobis commissa, accuratè legimus Libellum intitulatum; Homo bene moriens seu Christiani aegroti ad bonam & felicem mortem dispositio, à R. P. Clemente Boleslavio praefatae Provinciae S. T. Lectore conscriptum, publicae luci edendum. In quo cum nihil inveniatur quod Fidei Catholicae adversetur, sed omnia plena spiritu, devotione, & piis affectibus ad felicem & Christianam mortem: ad instructionem sacerdotum sacramenta aegrotis ministrantium; ad augendum in cordibus fidelium circa morituros charitatem summè ordinentur, ideo dignū prelo censemus. Datum in Conventu nostro Posuan. 27. Augusti. 1684.

Fr. Joannes Capistranus Czekielius
Diffinitor actualis Provinciae Reformatae
Majoris Poloniae S. T. Lector.

Fr. Franciscus Rychterscius, Prae-
sident Ravicensis ad S. Antonium Pro-
vinciae hujus S. T. Lector mppa.

Facultas Ordinis

Cum Librum hunc, cui titulus: Homo bene moriens &c. P. Clementis Boleslavii S. T. Lectoris & Prædicatoris, ex mandato Reverendissimi Patris Ministri Generalis Superioris nostri Colendissimi, atque nostra licentia duo Theologi Provinciæ nostræ recognoverint, & in lucem edi posse censuerint; facultate Reverendissimi Patris Generalis jam habita, nos quoque eam præstamus & concedimus, ut typis mandetur, si Ordinariæ Illustrissimi Potestati videbitur. In cujus rei fidem &c. Dat. Calissii 26. Octobr. 1684.

Fr. Cyprianus Rujevius. Provin.
Reformatæ Minister Provin-
cialis.

Approbatio Ordinarii
Imprimatur.

Vladislavie &c. 7. Septembris 1684.

Balthasar Alexander
Officialis Vladislavienfis
Generalis.



CHRISTIANO MORITURO salutem.

Deploranda hominis conditio
qui ope destitutus, non habet
hominem sibi in angustiis subve-
nientem: hinc ille languidus æger
Joh. 6. triginta octo annos habens
in infirmitate sua, & jacens Jerosoly-
mis ad probaticam piscinam con-
querebatur coram Medico Cœlesti
Salvatore nostro: *Hominem non ha-
beo, ut cum fuerit turbata aqua, mittat
me in piscinam.* Nec potuit non esse
miser ille descendens ab Jerusalem
in Jericho, à latronibus spoliatus,
vulneratus, semivivus relictus, quem
Levithes & Sacerdos pertransierunt
& non juverunt donec veniret homo
Sama-

Samaritanus misericors, qui ei subvenit, vulnera alligavit, ejusq; omnē curam egit. Luc. 10. Et quis potest esse major infirmus, indigens ope hominis, quam peccator in anima vulneratus, gratia Dei spoliatus, præsertim in maxima corporis infirmitate, & extremo vitæ termino, ac puncto à quo pendet Judicis justissimi sententia vel clementiæ vel horrendæ justitiæ, salus vel perditio, vita vel mors sine fine, æternitas lætissima vel tristissima; Ubi offensus maximè placandus est Deus, imploranda ejus misericordia, omni arte succurrendum animæ, omni modo procuranda salus æterna. O quantus languidorum numerus, & tam in corpore, quam in anima infirmorum, quorum quilibet querulus dicit: Hominem non habeo, qui
 meæ


meæ Animæ scitè curet vulnera ; qui
 me doceat Deum placare, Misericor-
 diam ejus invenire, atque faciat bene
 & feliciter mori. Pie Christiane noli
 conqueri ; & ego tibi exhibeo homi-
 nem ad tibi subveniendum , te in-
 struendum & juvandum quomodo
 possis Deo reconciliari, & bene ac fe-
 liciter mori. Præfento hominem be-
 ne morientem scilicet hunc Libellum,
 in quo quia sunt actus, non solum
 à moribundo eliciendi, sed etiam,
 quos Christiane potes sanus elicere,
 ut sunt: Actus circa sacramentalem
 confessionem & sanctissimam com-
 munionem ; Actus diversi scilicet:
 Fidei, Spei, Charitatis, Laudis Divinæ,
 Gratiarum actionis &c. Testamen-
 tum spirituale , Appellatio á DEO
 irato , Revolutiones de Christo Vi-
 ventè & Patiente, oblatio Passionis
 Christi



Christi pro peccatis &c. Hos actus non expectans extremam infirmitatem, devotissimè & frequenter elice: & sic abstinens à peccatis, Deum tibi reconciliabis, placabis, te ad bonam & felicem mortem præparabis. Alios autem actus in infirmitate, si Patronus spiritualis scilicet Sacerdos desit, quantum potes devotè coneris elicere; & sic bene & feliciter tuam finies vitam. Quod ego tibi sicut & mihi cordicitus opto.

Vale, & pro me DE-
UM precare.

CHRI-



CHRISTIANI

MORIBUNDI

Patrono spirituali

Salutem.

Multa & magna possunt fieri
Merga proximum pietatis offi-
cia ; sed hoc est maximum charita-
tis opus : juvare eum moribundum,
succurrendo illi in extrema sua ne-
cessitate, ac periculo amittendæ sa-
lutis æternæ ; maximè dum infir-
mus existit in statu malo scilicet pec-
cati mortiferi, à quo tunc eum neq;
parentes, neque cognati, neq; maxi-
mi amici neque Reges & omnes po-
tentes, neque ipsi Angeli liberare, &
Gratiæ Divinæ restituere, ac hære-
dem vitæ æternæ facere possunt ;
nisi

nisi tu pie Patrone Sacerdos Christi,
cui ille potestatem dimittendi pecca-
ta dedit, & te suum in hominis pro-
curanda salute cooperatorem esse
voluit. O quam gratum opus
Amantissimo hominum Salvatori
Domino Jesu navare operam ad sa-
lutem homini periclitanti, animam
agenti. O quam magna merces dabi-
tur pro hoc labore & tantæ Charitatis
actu. Patet hoc ex verbis ipsius Dul-
cissimi Salvatoris Lib. 5. cap. 59. Re-
velat. S. Birgittæ, ubi optimus anima-
rum Pastor zelosè, & amarosè sacer-
dotes alloquitur: *Boni (inquit) Chri-
stiani currite mecum ad oves quæ adhuc
habent Spiritum & erigamus eas, & re-
foveamus. Compatimini mihi, quia mul-
tum carè emi oves meas. Recipe mecum,
& ego tecum. Tu in dorsum & ego in Caput.
Gaudenter duco eas inter manus meas.*

B

Ego

Ego portavi eas semel omnes in dorso m.o
 quando erat rotum sauciatum & stipiti,
 affixum. Propterea amici mei non par-
 catis laborare pro me, qui talia sustinui ex
 charitate propter vos. Laborate viriliter
 & ferte ovibus indigentibus auxilium.
 Ego juro in Humanitate mea: quod qui-
 cunque laboraverint & portaverint oves
 meas mecum, occurram eis in media via
 ad succurrendum: & dabo eis stipendium
 pretiosissimum, id est meipsum in gaudium
 sempiternum. Hæc suo ore Divinissi-
 mo Christus Dominus. Igitur Sacer-
 dos Dei coadjutor Christi, non te pi-
 geat collaborare Christo circa sal-
 vandæ animas præsertim in infir-
 mitate & agone cujusque. Vocatus
 ad infirmum, vel Curatus sciens de
 infirmitate alicujus hominis tuæ
 curæ subiecti, sine mora festinus ad
 infirmum accede; visita non sicut
 amicus

amicus solum temporaliter conso-
laturus & valetudinem promissurus,
sed animæ & saluti ejus æternæ con-
sulturus.

Et quoniam rari sunt, qui pressi
infirmirate corporis, de Animæ va-
letudine, de morte, de judicio futuro,
& salute æterna cogitent, ac serio
agant; sed infirmi præsertim divites
& insignes soleant nova, curiosa,
nugatoria audire; de Deo non cogi-
rare, media salutis non curare, mor-
bo solum curando incumbere, vale-
tudinem & vitam longiorem sibi in-
fallibiliter promittere; & sic de pæ-
nitentia facienda, Deo reconcilian-
do, Sacramentis suscipiendis: cras,
cras corvisare. Mors interim inspe-
rata ex improvviso adest, omnia ab-
rumpit, præcludit, nec jam de salute
æterna agere permittit. Idcirco ta-
B 2 libus

libus dicendum est. imò. Non esse
 agendum quasi jocando in negotio
 salutis, sed cum timore & tremore
 eam esse operandum. 2do. Non esse
 fidendum suæ evanidæ & fallaci vi-
 tæ; sicut enim nihil certius morte,
 ita nihil incertius hora mortis. 3tio.
 Judicem ad januam stare, qui per
 ægritudinis molestias pulsatur, & mor-
 tem vicinam designat. 4to. Porro
 unum esse necessarium inter omnia:
 ut scilicet anima non pereat, sed sal-
 vetur; quâ pereunte in æternum
 omne bonum æternum perit, & o-
 mne malum sempiternum hominem
 expectat. 5to. Nunc dum vivimus
 esse tempus acceptabile, esse dies sa-
 lutis, esse tempus pænitentiae, esse
 tempus placandi, & reconciliandi Ju-
 dicis irati Dei; esse tempus messis &
 mercaturæ, pro gratia Dei, & Gloria
 Cœ

Cœlesti acquirendis. 6to. Non esse
abjiciendam Dei manum, quam ho-
mini præsertim infirmo porrigit,
sed apprehendendam, ne dicat: Vo-
cavi, & renuisti, extendi manum
meam ad te & noluisti: idcirco in
interitu tuo ridebo. 7mo. Non esse
spernendum Medicum sibi à Deo
pro curanda anima missum; ne Deus
iratus subtrahat omnem modum sa-
lutis acquirendæ.

Inducto igitur infirmo ad com-
punctionem & devotionem & vo-
lente ipso accedere ad capienda me-
dia salutis scilicet ad faciendam Con-
fessionem Sacramentalem, & ad su-
scipienda Sacramenta Eucharistiæ &
extremæ Unctionis, disponatur len-
tè, tamen festinè, ad Christianam
& bonam & felicem mortem, per
Actiones infra positas sub specie

servi rei, sese variis piis modis Do-
 mino suo justificantis, & gratiam
 obtinere ninentis. Quæ Actiones
 coram infirmo exactè legantur; ipso
 infirmo Actus hos, vel ore, vel sal-
 tem corde cum suo Patrono seu di-
 dispositore devotè dicente. Licet
 autem Actiones istæ pro tempestiva
 & lenta dispositione, ac vividitate
 infirmi prolixius formatæ sint; ta-
 men deficiente valde infirmo, &
 morte accelerante, possunt plus vel
 minus, & compendiosè cum infirmis
 dici; aliquæ omitti, & solum quæ
 sunt omnino necessariae ægroto ad
 eliciendum inculcari. Quales sunt:
 Actus doloris de peccatis, propositi
 amplius non peccandi etiam si infir-
 mus convalasceret, Fidei, Spei, Cha-
 ritatis, Oblationis pro negligentis;
 Actus de Passione Christi, Invoca-
 tio-

tionem Beatissimæ Virginis, SS. Angelorum. S. Patronorum, Remissio injuriarum inimicis. Aspirationes ad Christum, Commendatio animæ in manus Christi. Prout tempus & dispositio infirmi permiserit; & prudentia; atque sedula dexteritas tua pie Patrone judicaverit. Vale & utere, pro labore in præmium, Christum recepturus; pro meque Deum exora.

OBSERVANDA

QVÆDAM:

A pio Patrono Patre spiritali circa infirmum moribundum.

Tria debet præstare pius Patronus infirmo moribundo.

Imo. Obsequium fidelissimum, non ex ratione incenti lucri temporalis, vel alius intentionis vanæ, sed ex solo amore Dei & ex viscerosa christiana salutis æternæ moribundi.

2do.

2do. Compassionem, scilicet significatio-
nem doloris, propter morbos & dolores in-
firmi,

3tio. Consolationem spiritualem loquen-
do tum de immensa Bonitate Dei, & Mi-
sericordia ejus inexhausta erga peccatores,
eaeque plurimis & maximis peccatoribus
ab eo ostensa & exhibita; tum de Dei amo-
re erga hominem, tanquam Patris erga
filium; tum de ejus desiderio indicibili sa-
lutis nostrae; tum de finiendis nostris mor-
bis & doloribus quos Deus immittit tan-
quam sagenam ad capiendum atque tra-
bendum ad se hominem, & per eos punit
hic leviter eundem propter ejus peccata,
ne eum post mortem puniat severissimè,
sive temporaliter in purgatorio, sive in
aeternum in inferno. Loquendo quoque &
quidem praecipuè de acerbissima Passione
& Morte Salvatoris nostri Iesu Christi;
nec non de multis & maximis tribulatio-
nibus

nibus Sanctorum, & omnium iustorum
quas passi sunt libenter, ut ad Cœlestia per-
venirent gaudia. &c. &c.

Ut igitur pius Patronus præstet obse-
quium debitum moribundo in causa salutis
animæ, observet aliqua ad hæc necessaria.

1mo. Sciatim à principio ostendar se in-
firmum benignum, humanum, suavem &
affabilem tanquam amicum in excrema
necessitate fidelissimum, paratum sibi obse-
quium in negotio salutis præstare, ut infir-
mus ad eum concipiat affectum & confi-
denciam.

2do. Moneat infirmum, quatenus non
expectet donec ingravescat morbus, sed
quantocius curam agat salutis suæ; Con-
fessionem Sacramentalem faciat, Eucha-
ristiam Sacro Sanctam suscipiat.

3tio. Hortetur infirmum, ut si faciendæ
sit restitutio, famæ, pecuniæ, vel aliarum
rerum, tum mobilium quam immobilium;

*item si facienda sit solutio debitorum, vel
servitii famulorum, ipse eam ante mor-
tem faciat, si-et in quantum potest; & non
committat sive conjugi, sive filiis, sive
executoribus.*

*4to. Ingravescente morbo dicat infirmo
ut tempestivè disponat domui suæ in rebus
temporalibus quoad Conjugem, liberos, con-
sanguineos, sepulcrum Christianam mo-
destam, ordinando legata pia pro honore
Dei, & salute animæ suæ in pio & legiti-
mo testamento.*

*5to. Currat serio & diligenter, ut infir-
mus antequam sensibus destituatur, vel in
delirium incidat extremæ unctionis Sacra-
mento muniatur.*

*6to. Moneat agrotum, & omnes eru-
mnas, morbos & dolores, æquanimiter
& patienter Ferat, nihil ex impatientia
dicat aut faciat, ne meritum patientiæ
perdat; sed potius libenter omnes dolores,*

cum gratiarum actione à Deo tanquam Patre, flagellum paternum excipiat, pro culparum præteritarum satisfactione, & majori merito, atque in Cœlis præmio.

7mo. Collocari curet effigiem Christi Domini Crucifixi, imagines quoque Beatissimæ Virginis, S. Angeli Custodis, S. Patroni specialis ante oculos infirmi decumbentis, ad quas ille oculos convertat: moneatq; ægrotum, ut Jesum Crucifixum Beatissimam ejus Marcem, S. Michaëlem Archangelum, S. Angelum Custodem, aliosq; Sanctos suos Patronos devotè in auxilium invocet, ut eorum meritis & suffragiis adjuvetur.

8vo. Non permittat, ut coram infirmo, graviter jam laborante, & morti appropinquante, visitantes Vicini, Amici Consanguinei, affines, de rebus & negotiis mundialibus tractent; multo minùs jocola & nugatoria loquantur.

9no Infirmo angonizante & sibi adhuc præsentē curet remove à Conspectu ejus ea quæ bonam ejus præparationem ad mortem felicem impedire possent, ut esse solent, Uxor Liberi, qui humanos affectus provocare, & moribundum turbare & diſtrahere solent. Nisi fortè moribundus sit in se

benè compositus, volens benedicere liberis ; vel illi spiritualiter moribundum crederentur juvare.

10mo. Agonisantem sapius aquâ benedicta aspergat ; Cereum accensum ei in unam manum, in alteram effigiem Christi Crucifixi ad tenendum tradat, vel cum agonisante teneat,

11mo. Deficiente infirmo, non faciat longas, clamosas, & vehementes exhortationes ; quia his obruitur, & nimis molestatur æger ; sed breves, pias, aspirationes & invocationes eidem placide, articulatè, tractim per intervalla ad eliciendum saltem internè, innuere non omittat.

S. Augustinus.

in sentent. Tom. 3.

Nullus in Deo locus est, nec est, quo fugiatur ab ipso, nisi ad ipsum. Qui vult evadere offensum, fugiat ad placatum. *sent. 235.*

Remedia conversionis ad Deum nullis cunctationibus sunt differenda, ne tempus correctionis pereat tarditate. Qui enim penitenti promisit indulgentiam, dissimulanti diem crastinum non spondit. sent. 71.

Præveniendus est dies qui prævenire consuevit.

Idem ser. 120. de Tempore.



CHRISTIANI
MORIBUNDI
Coram Domino nostro
JESU CHRISTO.

ACTIO I.

Aeger gemit coram Domino, in ærumna Morbi & dolorum.

Afflicti corporaliter, scilicet valde infirmi, captivi, duriter carcerati strictè ligati, vinculati, solent flebiliter gemere, & lugubrem edere vocem in auribus aliorum, per quam eos vel ad commiserationem & solamen, vel ad aliquod juvamen, vel ad liberationem ab ærumna
quam

quam patiuntur excitant & movent. Et
 si in hoc passu inveniuntur homines mis-
 ericordes, qui afflictis & ærumnosus ex
 corde compatiuntur, eos solantur & ju-
 vant; multo magis id præstat misERICOR-
 dissimus DEUS, & amabilissimus JESUS
 Salvator noster de quo Matth. 9. dicitur:
*Et circuibat JESUS omnes Civitates & Castel-
 la docens in Synagogis eorum, & prædicans Evan-
 gelium regni, & curans omnem languorem, &
 omnem infirmitatem. Videns autem turbas,
 misertus est eis; quia erant vexati, & ja-
 centes sunt oves non habentes pastorem.
 Et videns turbam præ inedia deficientem
 dicit: Matth. 13. Misereor super turbam, quia
 triduo jam per se verant mecum & non habent quod
 manducent. Et videns viduam afflictam,
 prosequentem funus filii sui ac amarè flen-
 tem dixit illi. Noli flere; resuscitansque
 filium, dedit illum matri suæ; Igitur infir-
 mus gravatus morbo, pressus doloribus
 angustiat, afflicto, non negligat coram
 Misericordissimo Domino Jesu, flebiliter
 gemere, ipsi suam miseriam & afflictio-
 nem*

Nem exponere, ac eundem tanquam dulcissimum solatorem invocare ore vel saltem corde dicendo:

Genitrus servi infirmi coram Domino.

Eheu dulcissime Creator, piissime Redemptor meus, Pater misericordiarum, & Deus totius Consolationis, in quantam tribulationem deveni & in quos fluctus trititæ, in qua nunc sum, qui jucundus eram & dilectus in sanitate mea. Dies mei sicut umbra declinaverunt & ego sicut fœnum arvi. Ivit quâ caput ætas, nec cursum suum revocavit aut detinuit; tacita lapsa est & fluxit, nec admonuit velocitatis suæ: ego autem appropinquavi usque ad portas mortis.

Miser factus sum, & curvatus sum usque in finem Psal. 37. Tribulatio & angustia invenerunt me. Veni in altitudinem maris miserationum mearum & tempestas infirmitatum & dolorum demersit me. Circumdederunt me dolores mortis, & pericula inferni invenerunt me. Tribulationem & dolorem inveni.

Vide

Vide Domine quoniam tribulor: Conturbatus est venter meus: Thren. 1. Deficit cor meum in memetipso, quoniam amaritudine plenus sum. Dolens doleo in nocte & die. Non est qui consoletur me ex omnibus charis meis; & longè factus à me consolator. Psal. 6. Miserere igitur mei Domine, quoniam infirmus sum: Sana me Domine, quoniam conturbata sunt ossa mea. Sana me Domine & sanabor si est voluntas tua. Tu es DEUS refugium meum & virtus: adiutor in tribulationibus, quæ invenerunt me nimis. Tu est refugium meum à tribulatione, quæ circumdedit me: exaltatio mea erue me ab ærumnis circumdantibus me.

Domine ecce quem amas à te creatum & tuo sanguine redemptum, infirmatur. Ego sum homo qui descendens ab Hiericho incidi in morbos & dolores: & semivivus jaceo: Verùm misericordissime Samaritane, dulcissime JESU, alliga vulnera dolorum meorum infundens oleum & vinum miserationis & consolationis tuæ.

Inte-

Interim in mea infirmitate rogo benignissime JESU, repleatur os meum laude, ut cantem gloriam tuam, tota die magnitudinem tuam, quoniam firmamentum & refugium meum es tu. Tu es patientia mea Domine, Domine spes mea, à juventute mea. Tibi laus & gloria. Amen.

ACTIO II.

*Aeger dedit se in manus Domini Dei,
& acceptat libenter morbos
& dolores.*

Homines rei dū captivantur, alii se per-
vicaciter defendere & resiltere vo-
lunt: alii fugere & evadere conantur; &
sic potestatem ac dominos suos magis con-
tra se irritant atq; offendunt. Alii pruden-
tiores melius faciunt, qui cernentes se in
arcto positos, & se evadere non posse, ul-
tro seipsos potestati & dominis tanquam
poenâ dignos tradunt; & sic ipsos per hoc
emolliunt, & non lenum, placant. Sic Fri-
dericus Dux Saxoniae ac Protector Luthe-
r-ano

ranorū victus! ac superatus prælio à Carolo V. Imperatore captivus ultro se ei deditit: Quando quidem (inquit) ita fortuna tulit, ecce me tibi Clementissime & Potentissime Cæsar captivum sulto, rogans ut me pro loci, quo natus sum dignitate tractes. Sic & Jonas Propheta videns se fugitivum captivari à DEO, non resistit, sed se in mare mitti imperavit: Unde salvus evasit, DEO per sui deditionem placato. Sic & infirmus doloribus & angustiiis pressus non resistere, scilicet: non murmurare, non maledicere debet; sed se quasi captivum Domino DEO ultra tradere: morbum & omnes angustias ab ipso libenter acceptare; nam hoc DEO placet & eundem infirmo placat. Quocirca servus captivus, scilicet homo infirmus coram Deo dicat:

Acceptatio morbi & dolorum.

Scio & certus sum ô sapientia infinita misericordissime DEus, quod vita nostra non temerariis motibus agatur; sed à te
Domino

Domino DEO nostro disponatur & gubernetur. Unde tibi cura est de omnibus creatis præcipuè de servis tuis bonis, qui tibi fideliter & diligenter serviunt; nec non advertentia de servis tuis desidi-
osis & malis, quorum ego sum primus. Quocirca angustia meæ & dolores quos patior, non casu acciderunt mihi; sed manus tua Domine DEus meus tetigit me & apprehendit me servum reum, noxium, & tuum maximum debitorem; & sic me tradidisti tortoribus, scilicet morbis & doloribus, donec omnia tibi redderem & satisfacerem. Ego autem tuæ me Divinae potestati libentissimè trado ac sanctissimæ voluntati plenissimè resigno, Psalm 56. *Paratum cor meum Deus, paratum cor meum, ad sustinenda omnia adversa, quæ mihi intuleris & sunt placita tuæ Majestati, Job 6. Et tu qui cepisti, ipse me conteras: solvas manum tuam & succidas me. Et hæc mihi sit consolatio ut affligens me dolore non parcas, & ego non contradicam sermonibus sancti, Mich. 7. Iram tuam Domine portabo, quoniam peccavi tibi;*

bi; doneo causam meam iudices & facias iudicium meum: educes me in lucem & videbo iustitiam tuam, Tob 3. Iustus es Domine & omnia iudicia tua iusta sunt: & mihi jucunda. Auge igitur dolores, multiplica cruciatus. Benedictus sis qui me affligi & tribulari permittis: per tribulationes enim cognoscis quia tuus sum. Ideo infirmari & tribulari me permittis in presenti, ut in futuro non punias. Hic ergo ure hic seca, modo in aeternum parcas; & nunc tribue patientiam & sustinendi fortitudinem, Amen.

ACTIO III.

Aeger. Agnoscit se maximè reum & damnabilem.

CRimina sua prodere & fateri coram iudice homine est valde probrosum & noxium; cùm ob id sequatur confusio, pudor, poena mortis vel alterius damni & reatus suos atque peccata humiliter agnoscere & confiteri coram Domino DEO est decorum, valdè utile & salutiferū, ut dicit S. Thomas à Villanova. Qui coram iudice (inquit) confitetur furcā suspenditur: qui co-

ram DEO confitetur, inferni furcâ liberatur. Apud sæculi judicem confessio judicium perficit; apud æternum judicem Confessio judicium tollit. Vix S. peccator David dixit hæc verba: Peccavi Domino; & statim dictum est ei. Dominus quoque transtulit peccatum tuum à te. Non morieris. O si parentes nostri (ait idem S. Thomas à Villanova) humiliati fuissent, & confessi peccatum, procul dubio minori & leniori multo poena mulctati fuissent: sed propter impenitentiam, morte cum sua posteritate damnantur. Ecce quantum obfuit mundo non confiteri peccatum? Quocirca infirmus tanquam culpis maximis obnoxius, & debitis peccatorum gravatus, sponte humiliter culpas suas agnoscat, ac peccatorem se maximum fateatur coram Deo, monente eodem S. Thoma à Villanova atque dicente: Miserum te ostende, si vis Misericordiam DEI obtinere; illi enim qui non confitetur offensam, quis unquam præstabit veniam? Pauperes in bivio, ut transeuntium obtineant misericordiam, vulnera sua propalant: & tu fac similiter coram DEO: Confitere te peccato-

catorem, & invenies DEum propitiatorem, Igitur saltem coram DEO dicat:

Agitatio reatum.

Manus tuæ Domine fecerunt me & plasnaverunt me; factura tua sum & opus manuum tuarum; & sic in turbine infirmitatum & angustiarum potes me continere, & multiplicare vulnera mea etiam sine causa; quanto magis, quando in me tam multa & gravia delicta, te ad vindictam provocantia cernis, quæ ego coram te misericordissimo Domino confiteor. Peccavi Domine peccavi; iniquitates meas agnosco. Peccavi super numerum arenæ maris. Multiplicatæ sunt iniquitates meæ Domine, multiplicatæ sunt iniquitates meæ; & non sum dignus intueri & aspicere altitudinem cæli præ multitudine iniquitatum mearum: quia excitavi iracundiam tuam, & malum coram te feci. Non feci voluntatem tuam & mandata tua non custodivi: feci abominationes, multiplicavi offensiones: secutus sum passionem.

nes carnis. Vanitates attraxi, virtutes defecui, innocentiam non cultodivi, mala malis addidi, atque ea cumulavi.

Verè ego peccavi tibi Domino DEO meo auferens ea tibi, quæ tua sunt maxime. Nam abstuli tibi timorem debitum; dum tam securè peccavi, ac si tu non esses tantus Dominus & DEus vivus, injuriam suam summe potens ulcisci: abstuli reverentiam, dum in conspectu tuo, totiusquè aulæ tuæ cælestis non erubui peccare. Abstuli amorem dum te summum Bonum, & summè Bonum, totis viribus non amavi, immodò floccipendi. Debui te ex creaturis intellectu meo cognoscere summè bonum, summè liberalein, summè sapientem, summè pulchrum omnipotentem jussu est, &c. Et ego quid cogitavi? nonne vana? nonne terrena? nonne sordida? nonne inhonesta? nonne vindictam? nonne injuriam proximi? &c. Debui te linguâ mea laudare; & quid ex ore meo sonuit? nonne verba vana & mundana? nonne mendacia, perjuria, maledictio-

ditiones, rixæ, contertiones, calumniæ,
contumeliæ, obscenæ locutiones, probra,
edractiones, blasphemix, &c. ? Debui
te bonis operibus glorificare, & proxi-
mum ædificare; & ego malis actibus meis,
nomine tantum Christianus, nomen Chri-
sti, blasphemavi, alios scandalisavi. Debui
te infinitum bonum ac fontem omnis bo-
ni & felicitatis Creatorem amabilissi-
mum, ex tota anima mea & corde amare:
& ego quid amavi? Vilem creaturam, va-
nitatem, lutum rerum terrenarum, fædas
voluptates, fumum gloriæ mundanæ. &
peccando magis æstimavi unam guttam
voluptatis peccaminosæ, quam te DEUM
mare infinitum omnium bonorum. Debui
te semper in memoria habere & ut præsen-
tem mihi, spectare, memor beneficiorum
tuorum; & ego quid in memoria tenere
solebam, nisi illa quæ animam & concien-
tiam non solum inquietabant, sed atrocis-
simè vulnerabant. Verè iniquitates meæ
supergressæ sunt caput meum. Verè à
planta pedis utque ad verticem capitis non
est

est in me aliqua potentia non est membrum quibuste Deum meum non offenderim.

Heu quoties voluntati Divinæ contradixi? O quoties diaboli voluntatem feci? quoties carnem ad peccandum inflamma-
vi? quoties carni sordidæ acquievi? quoties desideria, prava explevi? quoties sensibus illicita appetentibus obtemperavi, & per eos mortem in animam transire ultro permisi? Quoties occasionem ad peccandum non solum non vitavi, sed ipse quæsi? Quoties alios ad peccandum induxi? In quo totum vitæ tempus consumpsi? Nonne in ministerio exhibito carni, mundo, & diabolo? Tibi autem Domino DEO Creatori & summo benefactori meo, non curavi servire, atque tuam voluntatem facere. Hæc sunt demerita mea Domine Deus meus, propter quæ tu justè irasceris, & tradens me tortoribus, lictè me judicare, & post mortem severè me cum malis servis, & quidem justissimè punire vis. Misericordissime Domine

C

patien-

patientiam trahere in me. Concede indulcias;
da locum poenitentiae, quam ipse veram
mihi tribuas, per quam te placare, & tibi
secundum posse meum, satisfacere possem
& morti amaræ post hanc mortem ne tra-
des me.

ACTIO IV.

*Aeger poenitens Procurat & obtinet
Syngraphe quietativum Absolu-
tionis à debitis.*

Seu

Confitetur peccata sacramentaliter.

QUAMVIS agnoscere se esse peccatorem
& confiteri peccata sua coram DEO
sit valdè homini salutiferum; cum sit hoc
magnæ humilitatis, flectatquè DEUM ad
misericordiam homini præstandam: Ni-
hilominus tamen hoc non sufficit. De lege
à Christo lata, debemus ad tribunal Sacra-
menti poenitentiae recurrere; & ibi coram
iudice à Christo instituto scilicet Sacerdo-
te peccata nostra, & offensas Divinas con-
fiteri

fiteri, ac se dolendo de peccatis commis-
sis accusare; atque ab hoc delegato judi-
ce schedulam quietativam Absolutionis ra-
tione debitorum nostrorum, obtinere.
De quo Origenes Homil. 2. in Levit. Est
adhuc (inquit) licet dura & laboriosa per poe-
nitentiam remissio peccatorum cum non erubue-
rit peccator Sacerdoti Domini indicare peccatum
Et Hom. 3. in Levit. Omnigenere (ait) pronun-
tianda sunt, & in publicum proferenda cuncta
quæ egimus, si quid in occulto gesimus, si quid in
sermone vel etiam intra cogitationum secreta
commisimus, cuncta necesse est proferri. Quod
quam sit proficuum homini ad salutem.
idem statim enarrat dum dicit: Si ergo in
vita nostri accusatores simus, iustitiam
DEI effugimus. De quo & S. Paulus I.
Cor. 2. Quod si (inquit) nos ipsos dijudicare-
mus, non utique judicaremur. Et ubinam ho-
mo hoc sui ipsius iudicium exercet? non-
ne in sacro poenitentiae tribunali? Ubi dum
seipsum accusat confitendo suos reatus
plurimum consulit & prospicit suæ salutis
causæ, faciens juxta doctrinam & præmo-
nitio-

nitionem Christi Judicis, Matth. 5. ubi di-
 cit: *Esto consentiens adversario tuo cito, dum es
 in via cum eo, ne forte adversarius tradat te judi-
 ci, & judex tradit ne ministro, & in carcerem
 mittaris. Adversarius hic noster* (ait S. Atha-
 nasius) *est ipsa conscientia nostra, hominem*
propter peccata contra Deum commissa
*accusans, arguens, mordens, traditura ju-
 dici ad poenam, nisi peccator eam illa ad-
 huc in via ante judicium scilicet in hac*
mortali vita consentiat. Consentit autem
 peccator cum hoc adversario, dum seip-
 sum accusat, & peccata coram iudice Chri-
 sti in seipsum confitetur. Et sic jam non
 habet adversarium, qui se vel è coram Deo
 accuset. Quia vero homo in hoc eodem
 salutis iudicio seipsum ad poenam con-
 demnat, ac gehennæ & mortis æternæ lo-
 esse dignum fateretur, poenamque tempora-
 lem sibi assignatam libenter adimplet, at-
 que de solutione debitorum à Sacerdote
 per sententiam absolutionis quietatur, per
 hoc iudicium Dei, ejusque justitiam effu-
 git, ne ipsum secundo de culpa criminis
 judicet, & in æternum puniat. Itaq

Itaque æger homo, antequam invale-
 scat morbus, quam citissime confiteatur
 peccata sua, & imprimis illa quæ adhuc non
 est confessus, enarrans omnia gravia &
 mortifera secundum speciem & numerum,
 prout ratio & conscientia de numero di-
 ctaverit, addendo plus & minus si certus
 omnino numerus nesciatur. Et si possit
 fieri conscientiaque non fuerit multum
 scrupulosa & turbulenta, faciat Confes-
 sionem generalem totius vitæ, considerando
 prius: Utrum aliquis defectus, scilicet:
 Omissio, oblivio, malitia in præteritis Con-
 fessionibus non contigerit. Et si ita in-
 venerit, debet in Confessione defectum
 supplere, & errorem corrigere. Quod si
 DEUS avertat peccatum mortiferum ali-
 quando ex timore noxio & pudore in
 Confessione reticuerit, non solum pecca-
 tum commissum, sed etiam illam reticen-
 tiam omnino confiteatur, aperiatque tem-
 pus per quod illud peccatum in Confessi-
 onibus reticere solebat; explicetquæ rati-
 onabilior numerum Confessionum simul

cum Sacris Communionibus. Nam talis Confessio non solum fuit nulla, sed sicut Communio, ita & Confessio fuit sacrilega: & quoties cum illa reticentia confitebatur & communicabat, toties horrenda sacrilegia committebat: Peccatum autem cum reticentia in Confessione apertum nullum ipsi fuit dimissum; & sic omnes Confessiones præteritas, & peccata omnia gravia à prima reticentia debet fidelissimè confiteri. Et quia in Confessione sacramentali ista debent intervenire scilicet dolor ex corde de peccatis, Confessio integra, peccatorum, propositum firmum amplius non peccandi, & satisfactio, seu pœnæ satisfactoriæ ab iudice spirituali impositiæ adimpletio, ideo servus volens obtinere, syngraphe absolutionis à peccatis, debet hæc omnia præstare. Igitur pœnitens antequam incipiat Confessionem sacramentalem, humiliet se tanquam reus coram suo Domino quem multis & gravibus peccatis offendit, ac pro illis summo opere & ex corde doleat atque dicat.

*Aeger pœnitens dolet se aliquando
DEum offendisse.*

EHeu misericordissime DEus, piissime
Redemptor meus Domine JESU: ego
enim sum homo miserrimus, & peccator
maximus. Virtutum decore nudatus de-
bitorum onere gravatus sordibus delicto-
rum fœdatus unde quaque vulneribus pec-
catorum plenus; siquidem conscientia
me torquet, superbia inflat, avaritia præ-
mit, luxuria urit, invidia mordet, gula,
distendit, ira perturbat, ambitio pungit,
Vana gloria rodit, oculus concupiscentiâ
ardet, Auris detractionis strepitu sonat,
lingua veneno infecta manet, Cor viperis
& scorpionibus cogitationum fœdarum
& aliarum illicitarum fecat. Et sic sa-
nitatis in me non est, sed omnis animæ in-
firmitas cruciatus & dolor. Et hæc mea
miserrima conditio Dulcissime Deus jubet
me coram te gemere; Verum super o-
mnia coram te Piissimo Patre meo cogunt
me cordiculis singultire, & amarissime

plorare meæ maximæ in te ingrati-
tudi- nes, & gravissimæ offensæ Bonitatis &
Majestatis tuæ.

Heu heu me centies millies sanguineis
lacrimis deplorandum peccatorem : ego
enim sum ille infelix homo, qui te fontem
vivum & indeficientem, Dulcissimum
Deum dereliqui & sprevi : & fodi mihi
cisternas veteres & dissipatas, non habentes
aquis, nisi vanissimæ & turpissimæ
delectationis, vel potius diræ amaritudi-
nis; quod feci superbiendo, terrena ap-
petendo, sensibus obediendo, prava de-
sideria sectando, concupiscentiæ fræna
laxando. Ego sum vermis ille contemptus
qui tuam Deus infinitam dignitatem &
Majestatem læsi. Ego sum qui abomi-
nanda cogitavi, dixi, feci, contra tuam pi-
issimam Bonitatem. Ego tuam legem O
Rex & Judex supreme conculcavi, iugum
servitutis tuæ abjeci, & dixi effrons :
Non serviam. Ego sum nudus & exulcera-
tus in sterquilino jacens mendicus, quem
ex tua Misericordia piissima accepisti,
lavi-

lavisti, gratia tua vestivisti, in filium adoptasti, hæredem Regni Cœlestis fecisti; & ego impiguatus, incrassatus, dilatatus recalcitravi: te Deum factorem & Patrem meum dereliqui, & recessi à Te salutari meo. Tot beneficiorum maximorum immemor alienavi me à te tam bono Domino, & summo Bono, ac propter vilissimam ac turpissimum peccati mercedem, tyranno me diabolo in servitutem miserissimam venundavi; excusloque Christi jugo suavissimo, durissimum diaboli, elegi & portavi. Ego te Dulcissimum hospitem à me expuli, & diabolum spurcissimum in animam introduxi. Et quidem si hoc semel fecissem, quanta tua injuria esset? sed ô quoties peccavi? quoties te ingratitudine satiavi? quoties te injuriâ maxima affeci? quoties cor tuum vulneravi? Ergone non centies millies inferno, ejusque maximis poenis dignus sum.

Verùm ô Deus piissime, coram tua Divina Majestate prostratus & nimio rubore suffusus, recorder filii prodigi, ad te

misericordissimum Patrem revertentis,
cujus, etiam nomen nec mihi arrogare
audeo, propter plurima & gravissima de-
licta mea. Reminiscor Manassis Regis
peccatoris, cum quo altitudinem Cœli
propter peccata mea videre non sum di-
gnus, sed tamen cum ipso ad te suspiro.
Desperarem, sed non possum, quia tu sum-
me bonus & Misericors es, dissimulans
peccata propter poenitentiam. Non me
latet, quia tu Benignissime Jelu Magda-
lenam flentem pedesque tuos lacrymis
lavantem non repulisti, sed recepisti. Za-
chæum iustificasti, Mattheum ad tuam
gratiam vocasti, Latroni tecum morienti
omnia condonasti, & paradysum intrare
dedisti. Prosterneo igitur & ego me ad
Sacratissimos tuos pedes ô Jezu Dulsissi-
me, flens & ejulans de peccatis meis &
offensis tuis. Centies millies immo infi-
nities præterit me peccasse. O quis mihi
daret singultus & Cordis dolores pro pec-
catis meis, sanctorum poenitentiam Davi-
dis, Petri, Magdalene: O quis dabit cordi

& capiti meo fontem lacrymarum, & plorabo die ac nocte injurias à me illatas tibi tam bono Deo Creatori meo? Cupio totus præ dolore in lacrymas dissolvi; & doleo ex toto corde meo, ex tota anima mea, ex totis viribus meis, quod te aliquando Piusime Deus, summè bonum, & summum Benefactorem ac Dulcissimum Patrem meum ostenderim, te summum Bonum vilipenderim, Creaturam loco tui amaverim, mandata tua non servaverim, tibi toto Vitæ meæ tempore fideliter non servierim, te super omnia toto corde non amaverim; & quod non doleam, sicut deberem dolere, maxime doleo.

Et nunc propter lacrymas tuas, dulcissimæque Matris tuæ in vitâ & in passione propter me effusas misericordissime Jesu, humillime rogo, infunde cordi meo gratiam Spiritus Sancti, intellectumque meum illumina, ut possim reatum conscientiae meæ perfectè cognoscere, peccata mea plenè confiteri, me humiliter, & simpliciter accusare, & tandem

per tuam piissimam Misericordiam, remissionem & veniam peccatorum meorum obtinere. Amen.

§. II.

*Infirmus Penitens revidet registra
debitorum suorum, & se de reatibus
coram iudice salutari ac-
cusat.*

Hic servus debitor librum & registra suorum debitorum scilicet conscientiam suam diligenter inspiciat & legat: an in aliquo se debitorem Domino Deo deprehensum inveniat; & hoc iudici furrogato scilicet sacerdoti in Confessione Sacramentali fidelissimè aperiat, ad hoc, ut syngraphe quietationis seu Sacramentalis absolutionis ratione debitorum scilicet peccatorum dimissorum ab eo recipiat, eam Iudicii supremo post mortem præsentaturus. Itaque se de omnibus præceptis, & imprimis de Divinis accuset si aliqua non servaverit, sed violaverit?

De Præcepto primo circa Deum colendum & amandum.

Ratione Fidei Divinae.

AN ignoret vel non credat Deum ex-
istere; & operum tam bonorum quam
malorum remuneratorem post mortem
futurum?

An idololatriam commiserit, hoc est:
cultum Deo debitum, vel ex odio Dei,
vel ex affectu aliquid à dæmone continen-
di, eidem dæmoni, vel alicui Creaturæ
derulerit?

An ignoret Mysterium sacratissimæ
Trinitatis, atque mysterium sacratissimæ
Incarnationis. Scilicet: quid in se con-
tineat Christus? id est Divinitatem &
Humanitatem.

An discrediderit alicui Articulo S. fidei
Catholicæ, vel saltem de eo dubitaverit,
sive loquendo sive cogitando?

An apud se habuerit, vel legerit libros
Hæreticorum, aliosve Libros ab Ecclesia
prohibitos?

An in sua possessione synagogam Hæreticis vel Judæis ædificari concesserit; vel Pseudoreligionem exerceri permiserit? pejus si synagogam dotaverit?

An Concionem Hæreticam audiverit, complacendo in doctrina Hæreticorum, eorumque fidem atque devotionem publicam quam exercent, laudaverit?

An se auguriis habens illa pro regula suarum actionum occupaverit? vel hominibus fidem indubiam dederit?

An fuerit usus divinatione, quæ non sit sine invocatione sive expressa sive tacita dæmonis, ad cognoscendas res contingentes, & liberè futuras, aliasque occultas, & naturaliter incognoscibiles; idque tam per se quam per alios?

An Philistheos seu Cyngaros Polonicè Cyganos de occultis vel futuris contingentiis, eis credendo interrogaverit?

An inclusum in aliqua re dæmonem, vulgo dictum spiritum familiarem portaverit vel domi habuerit?

An amuleta, ligaturas, certos characteres,

res, contra vulnera, subitanæ mortem, vel ad conciliandam invisibilitatem, amorem, fortunam portaverit?

An maleficia ad nocendum alteri adhibuerit?

An superstitione usus fuerit? quod fit vel semendo aliquam portionem; vel aliquid usurpando ad scientiam aliquam subitò acquirendam; vel ex Casu fortuito de futuro eventu conjiciendo; vel dies aliquos habendo faustos, & alios infastos; vel foeminarum Cirminatricum benedictiones & preces ad morbum depellendum adhibendo; vel statuam alicujus sancti in flumen, ut pluat, projiciendo; vel certo festo v.gr. S. Joannis certas orationes dicendo; vel in festo S. Matthiæ haderæ folia, ut sciatur cuinam nubere debeat aquis imponendo &c. &c.

An Laicus existens Missam ut sacerdos celebraverit, vel Confessiones sacramentales non approbatus audierit?

An falsas reliquias venerandas proposuerit? vel imaginem aliquam esse miraculo-

culosam finxerit? vel falsum miraculum propalaverit? Vel fictas Indulgentias publicaverit?

An Deum explorando, ejus aliquam perfectionem tentaverit?

Ratione Spei.

An diffidendo Misericordiae Divinae, de remissione peccatorum, vel emendatione vitae desperaverit?

An presumendo de Misericordia Divina, non ex tentatione vel fragilitate, sed in spem Misericordiae Dei peccaverit, poenitentiam differendo in malo statu perveraverit?

An spem & beatitudinem suam ultimam posuerit in solis terrenis, non curando Coelestia?

An sine poenitentia & mediis à DEO institutis se posse Misericordiam Dei, & salutem æternam consequi speraverit?

Ratione Charitatis.

An Deum odio abominationis, aversionis & displicentiae, eo quod peccata,
maxi-

maxime æternaliter puniat, odio inquam habuerit ?

An Deum maledixerit ; vel Contumeliolè contra eum, vel sanctos ejus aliquid dicendo blasphemaverit ?

An Contra Deum, quasi non esset justus & providus, ac juxta necessitatem hominum aliqua tribuens murmuraverit ?

An Deum supra omnia bona creata non appretiaverit, & amaverit ?

De Præcepto Secundo.

Non assumes nomen Dei tui in vanum.

AN juraverit falsum sciens esse vel dubitans esse mendacium, sive de re gravi, sive de levi, sive jeco factum ?

An juraverit facere rem illicitam, cum intentione, vel sine intentione faciendi ?

An juraverit facere rem licitam, quam postea non fecit, vel non habuit intentionem faciendi cum juraret ?

An induxerit alium ad falsò jurandum,
vel

vel non ad implendum juramentum in re licita?

An juraverit adjuncta maledictione dicendo v. gr. si non fecero, diabolus me rapiat?

An juraverit minando alicui cum vel sine intentione perficiendi juramentum?

An in iudicio interrogatus à iudice in materia bonorum temporalium, vel famæ falsò juraverit, vel alios ad falsum juramentum induxerit? Quo casu non solum peccat mortaliter, sed etiam tenetur ad restitutionem, si inde secutum est damnum notabile proximo.

An habuerit consuetudinem jurandi sæpe, non curando, aut non considerando, num verè, vel falso juraret; Et hanc consuetudinem tollere non curaverit?

An fecerit Votum faciendi aliquod bonum, & non curaverit exequi, vel executionem ad longum tempus distulerit?

An voverit aliquid cum intentione non adimplendi votum? An voverit facere aliquid malum vel facere bonum ob malum finem?

De

De 3tio Præcepto.

Memento ut diem Sabbathi sanctifices.

AN in diebus festivis opera servilia & laboriosa exercuerit, vel exercere mandaverit, sive ex lucro, sive ex recreatione, sive cum intentione pia, sive cum vana & turpi?

An in festo iudicium forense fecerit, alios citaverit, testes adduxerit, juraverit, sententiam exequi procuraverit; Contractus emptionis permutationis iniverit.

An die Dominico, aliisque festis diebus missam integram non audierit, vel notabilem ejus partem omiserit? Vel audiendo Missam, diu dormierit? vel distractus valde ridendo, loquendo, sese inanibus occupando fuerit, ita ut non sciverit quid ageretur in missa quo casu censetur non audivisse missam.

De 4to Præcepto Dei.

Honora Patrem & Matrem.

AN parentibus signa odii ostenderit, & eos asperè tractaverit? An torvo semper

per oculo intuitus fuerit, & ita aspera locutus fuerit, ac si odio haberet?

An parentes egentes noluerit alere; vel eis in gravi necessitate, tam Corporali, quam spirituali subvenire noluerit cum posset?

An testamenta vel legata Parentum non adimpleverit? An parentibus grave malum v. gr. mortem etiam propter capiendam hæreditatem optaverit?

An eis maledixerit? An etiam vel leviter eos percusserit; vel manum ad percutiendum levaverit?

An eos graviter contristaverit; vel animo deliberato ad iram gravem provocaverit? An eos verbis contumeliosis convitiis affecerit? An parentes pauperes despexerit, vel agnoscere noluerit?

An eos in foro externo de crimine (exceptis criminibus hæreseos, Proditionis, Conjuratōis in Principem) accusaverit?

An eis in re gravi inobediens fuerit? An contra voluntatem Parentis uxorem indignam, scilicet cum dedecore, vel dispen-

oſpendio familiæ duxerit? vel proficiam
parentibus, quam illi volunt ducere no-
ſcuerit?

An in ſcholis negligenter ſtuderit,
ſumptus parentum dilapidaverit?

An Præceptoribus ſuis gravem ingra-
titudinem irreverentiam ottenderit, vel
eos gravi injuria affecerit;

An ſuperiores ſuos contempſerit, vel
eis inobediens fuerit, vel eum eis verbis
contumeliolis contenderit?

An ſuperioribus ſuis tam Eccleſiaſticis,
quam ſæcularibus, Parochis, Confeſſa-
riis, Regibus, Præceptoribus, Doctoribus,
graviter detraxerit?

De 5to Præcepto DEL *Non Occides.*

AN Vindiſtam gravem de aliquo ſum-
pſerit, vel ſumere voluerit?

An aliquem odio gravi habuerit? An
optaverit alicui mortem, vel aliud dz-
mnium grave ſanitatis, famæ, honoris,
bonorum tam temporalium, quam ſpiri-
tualium?

An

An cum aliquo verbis mordacibus & valde læsivis contenderit? An aliquem verbis contumeliosis, convitiolis affecterit?

An aliquem graviter verberaverit; vulneraverit, occiderit? aut commiserit aliis ut facerent; vel quod suo nomine erat ab aliis factum approbaverit; vel ad id auxilium dederit, vel consilium favorem præstitit?

An ad duellum provocaverit vel provocatus duellaverit?

An noluerit veniam petere vel pacem inire cum illis quos graviter offendit; vel pro injuria illata non satisfecerit?

An ex odio omiserit alloqui vel salutare aliquem; vel sine odio quidem, sed cum aliorum scandalo?

An in rebus adversis & intortuniis sibi mortem optaverit; aut ex furore & ira seipsum graviter percusserit, vel maledixerit; vel rapti se à dæmonibus imprecatus fuerit?

An maledixerit vivis vel defunctis, ex animo?

An

An seminauerit salsania, excitando discordias & inimicitias inter alios, siue leuato effectu, siue non?

An ex odio vel inuidia affectus fuerit tristitiâ de prosperitate aliorum, tam temporali, quam spirituali; & an gavisus fuerit de aliquo malo, vel damno notabili aliorum?

An aliquid inali de proximo dixerit, patefaciendo ejus occultum peccatum vel defectum cum infamia vel damno illius? An audierit detractorem in gravi materia, ita ut auditione sua fuerit illi causa ad detrahendum?

An literas aliorum contra voluntatem scribentis aperuerit?

An secretum sibi commissum in re gravi revelauerit?

An temerè alium de peccato mortali judicauerit & condemnauerit?

An percusserit personam sacram, scilicet Clericum vel Religiosum; vel ei aliquam violentiam injuriosam intulerit? Nam hinc præter peccatum mortale, sequitur Excommunicatio. De

De 6to & 9no Præcepto Dei.

*Non machaberis, & Non concupisces
Uxorem proximi tui.*

AN a³u peccaverit cum foemina, idque cum soluta vel Conjugata, Consanguinea vel affine?

An commiserit sodomiam, hoc est peccatum contra naturam cum aliqua persona utriusque sexus?

An peccaverit cum persona Deo consecrata scilicet Clerico ordinato, Religioso, Moniali?

An habuerit cogitationes inhonestas & immundas illisque se voluntariè oblectaverit?

An deliberatè desideraverit peccare cum aliqua vel aliquo: quod peccatum est ejusdem speciei, cujus est opus ipsum? An animo libidinolo aspexerit aliquem?

An locutus fuerit verba inhonesta & obscena, oblectando se illis, vel provocando alios ad peccatum; vel dando scandalum pusillis scilicet pueris & puellis?

An

An aspexerit bestias coeuntes cum voluptate, vel eas inhonestè tetigerit, vel cum eis peccaverit?

An commiserit mollitiem cogitando de certa persona scilicet: soluta, conjugata, consanguinea Ecclesiastica?

An impudicè tetigerit foeminas vel adolescentes; vel se permiserit tangi ab aliis; vel si fecerit amplexus & oscula libidinose?

An animo peccandi miserit literas, munera; vel induxerit suadendo consulendo ad peccandum carnaliter? An verba inhonesta, vel contilenas lascivas libidine cum voluptate audiverit?

An consultò dederit causam ad pollutionem futuram in somno vel vigilia? An conjugatus in actu matrimoniali, de alia persona tali vel tali præter suam conjugem cogitaverit?

An aspexerit imagines impudicas; vel legerit libros lascivos, & historias inhonestas, cum voluptate carnali, vel periculo habendi illam?

De 7mo & 10mo Præcepto Dei.

Non furtum facies : Non concupisces rem proximi tui.

AN rem notabilem invito ejus domino re-
eidem abstulerit ; idque sacram ve
de loco sacro ?

An rem alienam apud se retinuerit, & ita
non restituerit cum posset ? An solutio-
nem creditoribus potens solvere distule-
rit, propter quod illi damnum passi sunt de

An rem inventam domino non resti-
tuerit, quem scivit, vel scire potuit ? An
emendo vel vendendo fraudem fecerit
vel in pretio, vel in pondere, & mensura

An emerit ab illis qui potestatem ver-
dendi non habent, ut à famulis, vel filiis
familias ? An emerit res quas sciebat
vel dubitabat esse furto ablatas : & sciet
vel dubitando aliquid de hujusmodi
consumpserit ?

An commiserit Usuram, vel fecerit
contractum Usurarium, vel societatem
injustam in mercatura ? An accepta
lutione vel salario ad gerendum officium

vel opus peragendum, non bene & fide-
liter illud gesserit?

An habuerit voluntatem opus acqui-
rendi per fas & nefas? An ministros suos
vel operarios mercede sua fraudaverit,
aut cum damno, ipsorum solutionem di-
stulerit?

An litem moverit contra justitiam, vel
in lite iusta usus fuerit fraude aliqua &
deceptione ad vincendum.

An ludis prohibitis usus sit? An in
ludo per fraudem aliquid lucratus sit; vel
traherit cum illis, qui non possunt res suas
alienare, ut cum filiis familias &c.

An defraudaverit gabellas justas? An
simoniam commiserit quocunque modo?
An Decimas Ecclesiis non reddiderit,
vel census ex fundatione pia debitos sa-
cerdotibus non solverit?

An per media illicita vel malos infor-
mationes obtinuerit rem aliquam, quæ
nullo jure ei obveniebat; vel an alios
impediverit injustè quominus aliquid
commodum, vel lucrum consequerentur?

An participaverit cum raptoribus, furibus, latronibus, eos juvando, informando, eis consulendo &c. Et in his omnibus casibus damnificationis proximi, teneatur poenitens ad restitutionem.

De 8vo Præcepto Dei.

AN juridicè interrogatus, falsum testimonium dederit in judicio, vel extra, vel alios ad illud induxerit?

An testificando mentitus sit cum præiudicio & damno notabili proximi? Si atque enim faciendo peccavit mortaliter & teneatur ad restitutionem.

De Peccatis quæ dicuntur Aliena.

*Peccata Aliena exprimuntur
his versiculis.*

*Iussio, Consilium, Consensus, palpo, recursus
Participans, mutus, non obstant, non manifestantur.*

Hinc queritur:

AN poenitens præceperit, vel coegerit aliquem committere aliquod peccatum

utrum grave? An consilium dederit, vel
author fuerit alteri, ut peccatum grave
committeret?

An consenserit peccatis aliorum, eaq;
approbaverit?

An provocaverit alios ad peccandum?

An adulando aliis, qui malè agunt; vel
laudando ipsorum opera mala author
fuerit aliis ad peccandum?

An cum posset & deberet, peccata alio-
rum non impediverit; vel reprehendere
Siquid admonere peccantes omiserit? An
fuerit socius, vel quodocunque particeps
peccati aliorum? An hospitio receperit,
vel defenderit homines malè agentes?

An cum posset & deberet non mani-
festaverit aliorum peccata, iis quorum
officium erat ea corrigere?

De Peccatis Capitalibus.

Peccata Capitalia sunt: Superbia, Avaritia, Luxuria, Ira, Gula, Invidia, Acedia.

Unde quæritur:

D ;

An

AN Pœnitens ita excellere appetierit, ut Deo, superioribus, eorumque legibus subijci noluerit?

An inordinate honores & dignitates sibi non debitas appetierit; vel eas modo indebito procuraverit?

An se extulerit super alios, cum contumelias aliorum dicendo cum Phariseo: Non sum sicut ceteri, velut hic Adulter &c.

An gloriatus fuerit de peccato mortali, vel glorianti applausit? An vituperaverit alium ob non sumptam vindictam, vel aliud grave peccatum omissum v.gr. fornicationem, adulterium in certa occasione?

An terrena Coelestibus anteposuerit? An divitias cum violatione festorum, vel damno proximi comparaverit? An proximo in gravi necessitate constituto non subvenit cum posset: vel elemosynam extremo indigenti negaverit propter suam tenacitatem?

An aliquid contra castitatem Corporis

vel Animæ commiserit? An cōmederit
superfluè cum gravi læsione sanitatis?
An jejunia Ecclesiæ violaverit, in quanti-
tate, vel qualitate ciborum?

An perfectè inebriatus fuerit ut non
fuerit rationis compos; An inebrietas
aliquid inhonestè, idque cum scandalo
puerorum fecerit: vel verba obscœna di-
xerit; aut cantilenas turpes cantaverit?

An ira commotus graviter indignatus
vel rixatus fuerit? vel convitia, maledicta
contumelias in alium projecerit; vel eum
calumniatus fuerit?

An de bono magno proximi tristatus
fuerit; vel de malo gravi lætatus fuerit?

An ex eo quod alter ipsi æqualis sit, vel
superior ipso, in fortuna, divitiis dignitate
doluerit?

An non libenter videns amicitiam ali-
quorum, inter eos discordiam semina-
verit?

An ex negligentia annuam confes-
sionem vel communionem paschalem
omiserit? An aliquid ex voto dicendum
ex negligentia non dixerit?

De

De Peccatis Hominum
diversorum Statuum.

De Peccatis Cleri.

Episcopus.

AN pro Episcopatu pretium vulgo dictum Honorarium dederit? An sponsam suam scilicet Cathedralem Ecclesiam curare, collabentem restaurare, ditare, ornare omiserit?

An Diocesim suam sedulo & an raro, sive per se, sive per alium non visitaverit? An Clerum sibi subditum in disciplina Clericali & honestate rigide non tenuerit: sed petulanter & scandalose vivere permiserit?

An ovibus in pietate, Virtutibus, bonis operibus exemplum non præbuerit; sed mundanam vitam duxerit, & per hoc aliis scandalo fuerit?

An Bona temporalia Ecclesiæ in conviviis computationibus, luxibus, vanis hospitum tractationibus, donationibus abiguriverit?

An

An aulam splendidam, superfluam, ad
solam pompam mundi, & non ad neces-
sitatem servaverit?

An pauperes, alere, vestire; viduis,
pupillis, ab infortunio humiliatis de bo-
nis Episcopalibus, quæ ei ad hoc data
sunt, subvenire neglexerit immo nolue-
rit?

An venationibus cum multitudine plu-
rima canum, more principum sæcularium
sefe occupaverit?

An de Bonis Ecclesiæ consanguineos
diraverit?

An ad Beneficia Ecclesiastica dignos;
ad Curata doctos & exemplares non pro-
moverit?

An Ecclesias suæ Diæcesis collapsas,
vel Collabentes restaurari non curaverit?
An census piarum foundationum deperdi-
tos, vindicari non studuerit &c.

Praelatus vel Canonicus.

An plures prælaturas vel Canonicatus
habuerit?

D s

An

An insolenti vitæ scilicet conviviiis, comotationibus continuis, & choreis indulserit; & in hoc proventus Ecclesiasticos consumpserit?

An præter Prælaturam vel Canoniam, parochiam pinguem habuerit, & eam non curaverit; Ecclesiam depauperari, desolari, collabi permiserit, & solum proventus ex parochia collegerit?

An Eleemotynam de Bonis Ecclesiasticis dare pauperibus omiserit?

An Parochiam titulo & colore Anni gratiæ alteri vendiderit? An Census pro ex fundatione pauperibus debitos sibi uluipaverit?

Sacerdos inferior.

An tonsuram & habitum Clericalem non portaverit?

An Horas Canonicas quolibet die integrè & attentè non recitaverit? An plura Beneficia incompatibilia, scilicet vel curata, vel residentiam requirentia, vel aqualia, vel uniformia sub eodem tecto habuerit?

An

An in peccato mortali potens confiteri celebraverit ?

An mercaturam & negotiationem cum vilipensione gravi status Clericalis exercuerit ?

An mulierem cum suspitione gravi vel scandalo domi habuerit ? vel cum ea peccaminose vixerit ?

An in vestibus sacris valde sordidis, & laceratis, & corporali multum maculato at turpi, cum irreverentia venerabilis sacramenti missas absolverit ?

An Censuram aliquam violayerit ? An ejus culpâ & negligentiam aliquis Parochianus, sine Baptismo, Confessione sacramentali, Eucharistia, extrema unctione mortuus fuerit ? An prædicare, & doctrinam necessariam ad salutem animæ tradere omnibus intermiserit ?

An se inebriare scandalosè solitus fuerit ?

An tabernas frequentaverit, ibique choreas duxerit ; & alia indebita statui clericali fecerit ?

An bona provenientia ex Beneficio in profanos usus v. gr. in convivia, compositiones frequentes & superfluas expenderit?

An Ecclesiam collabentem restaurare cum posset omiserit? An à parochia sua, non substituto alio sese diu absentaverit? An infirmos visitare; peccata Parochianorum corrigere neglexerit?

An Simoniam in aliquo commiserit?

De Peccatis Parentum.

An adhibuerint diligentiam saltem medicorem ut acquirerent bona, quibus liberi alantur; habeantque hæreditatem secundum suum statum?

An bona dilapidando impotentes se reddiderint ad liberos honestè secundum statum suum educandos & dotandos? An dotem sine Causa negaverint?

An filiam ad matrimonium ineundum, vel ingrediendum ad Religionem invitam coegerint? In utroque enim casu non solum peccant graviter, sed etiam

incurrunt excommunicationem, ex] Tri-
dent.

An quantum est in ipsis non curave-
rint, ut liberi bonis moribus imbueren-
tur, doctrinam Christianam seu rudimen-
ta fidei addiscerent, pravorum consortia
vitarent, mandata Dei & Ecclesiæ obser-
varent, sacramenta frequentarent & à
peccatis abstinerent.

An occasiones peccandi ab eis non
averterint; vel ad loca periculosa, aut do-
mus suspectas eos frequentare permise-
rint? An liberos consilio vel exemplo
malo depravaverint? An dissolutos non
correxerint, vel puniverint.

De Peccatis.

Domini & Famuli ac subditi.

Dominus.

AN possessionem alicui per vim vel per
astutias iurísticas non eripuerit? An
consuetudines onerarias & contributio-
nes, quæ in usum perpetuum cesserunt
subditis non imposuerit.

An subditos laboribus novis & indebitis gravaverit? An eos diebus festivis ad servitia opera coegerit? An liberos eorum contra voluntatem ipsorum ad aulam tanquam mancipia acceperit ac tenuerit?

An post mortem parentum, bona ipsorum acceperit liberis ea eripiendo? An pecuniam à subditis pro necessitate Rei publicæ contributam sibi usurpaverit?

An bona mobilia subditorum legata Ecclesiis, xenodochiis sibi retinuerit, & ad suos usus converterit?

An bona pupillorum sibi acceperit; pupillos non curaverit, eos in miseria servaverint, vel pessimè tractaverit.

An officiales suos crudeliter tractare subditos permiserit & dissimulaverit.

An extorquens ab Arendario magnam summam in contractu cum eodem, libertates & commoda subditis abstulerit, & illis nova onera imposuerit; ut Arendarius possit colligere quod Hæredi dedit.

An

An sine iusta causa famulos vel subditos impedierit ne missam audirent ; vel præceperit illis ea quæ sine peccato fieri non possunt.

An occasiones peccandi famulis vel subditis permiserit ; vel graviter & quidem publice delinquentes non correxerit, non punierit ; vel negligentes Divina & necessaria ad salutem, non corripuerit.

An famulos vel subditos graviter idq; frequenter percussèrit, in vinculis tenuerit, gravibus injuriis, verbis contumeliosis deliberatè affecerit ; eos de furto & aliis delictis temerè sine fundamento judicaverit, atque coram aliis diffamaverit.

An mercedem justam artificibus denegaverit, eos percussèrit, verbis injuriosis affecerit ? An famulos volens privare mercede eis debita, furtum vel damnum sibi factum eis mendaciter inposuerit ?

An volens famulum sibi diu servire, per tot annos mercedem ejus apud se retinuerit, vel eam absolutè non dederit ; vel loco mercedis, chartam promissoriam
fa-

famulo dederit? An ante tempus elapsum non solum mercede malitiosè famulum à se expulerit?

An eum qui liberos, aliosve domesticos verbis exemplis, vel moribus pravis corumpit non corripuerit, aut domo non dimiserit?

Famulus vel Subditus.

An non servierit vel laboraverit fideliter? An grave damnum Domino intulerit, vel inferri permiserit cum posset impedire? An subditus absque gravissima causa: famulus verò ante tempus temerè à domino discesserit.

An famulus aliis Confamilis gratiam apud dominum invidendo, eosdem coram domino calumniatus fuerit, atque gratiam destruxerit.

An adulando, laudando, suadendo, mentiendo, dominum in aliqua gratia peccata v. gr. Homicidium Rapiam, Fornicationem, Adulterium &c. induxerit.

De Peccatis Conjugum.

An in aliquo peccato mortali, vel con-

san-

sanguinitate aut affinitate sive corporali, sive spiritali matrimonium contraxerint? An uli sunt matrimonio dissolutè, modo indebito, vel cum periculo abortus; aut cum periculo pollutionis tactus impudicos habuerint? An incautè scilicet cum scandalo puerorū matrimonio uli fuerint.

Maritus.

An uxorem graviter cædere solitus fuerit? An eam verbis contumeliosis, vel diffamatoriis affecerit? An cum ea in continua discordia vixerit? An uxori sine causa cohabitare noluerit?

An gubernationem domūs, & rem familiarem neglexerit: ac alimenta propter uxorem & liberos procurare noluerit? An continuò bibendo, pugnando substantiam dilapidaverit?

Vxor.

An maritum rixis, vel verbis mordacibus, adgravem iram, maledictiones vel blasphemiam provocaverit.

An aliquid notabile expenderit extra utilitatem domus, contra voluntatem Viri, de his quæ ad eum pertinent. An

An Ipse viro imperium sibi usurpa-
verit; vel se ingesserit in administratio-
nem domus sine iustè causa?

An sine legitima causâ debitum con-
jugale negaverit?

An sine sufficienti iudicio, malè de ma-
riti incontinentia iudicaverit, atque eum
diffamaverit?

De Peccatis militum.

Duces Tribuni Centuriones atque alii Officiales.

An pauciores habuerint milites, quam
in solutione stipendii exhibent? An in
transitu per Regiones, à Civitatibus, op-
pidis & pagis contributiones quascun-
que extorserint?

An acceperint pecunias ab oppidis &
pagis, ne isthic pernoctarent, vel mora-
rentur? An uni militi dederit plures as-
signationes ad diversas domos? An mi-
litibus stipendia subtrahentes, permiserint
extorquere ab incolis Regionum neces-
saria?

faria? An famulos suos, ubi & quæcunque possent rapere permiserint?

Miles.

An in bello injusto militaverit? An in bello, sive justo, sive injusto militare paratus fuerit? An accepto stipendio justo à Principe, vel Republica strenuè & fideliter non pugnaverit, sed se à prælio subtraxerit?

An in hospitio Patrifamilias & domesticis gravis & molestus valde fuerit? An sive in hospitio, sive in locis per quæ transibat aliquid notabile abstulerit, extorserit, rapuerit?

De Peccatis.

Burgermagistri, seu Proconsulis Civitatis.

AN cum fuerit rudis & illiteratus, ac ad regendum ineptus, officium tamen hoc ambiverit, procuraverit ac per corruptiones obtinuerit?

An disciplinam civilem servare, insolentias compescere, peccata publica punire & corrigere neglexerit?

An

An bonum suum privatum, & non bonum commune civitatis promovere studuerit; vel civitatem notabiliter damnicaverit? An debita contracta pro Civitate cum posset, non solverit, sed cum suis Collegis confidentibus in compotationibus consumpserit.

An contributiones publicas æqualiter ex pauperibus & divitibus exegerit? An per respectum consanguineis, vel amicis suis, contributiones debitas dimiserit, & eas aliis cum gravamine illorum imposuerit.

An ex odio, vel respectu iniquo aliquem civem, gravi pœna vel ære mulctaverit? An injuriam gravem patienti, rogans iustitiam facere omiserit?

An iustitiam in rebus vendendis & emendis, per eum taxandis in civitate non attenderit? An festa per artifices violari permiserit? An levi de causa aliquem graviter puniverit, carceraverit, oppresserit?

An adulteria intuitu aliquo punire dissimulaverit?

De Peccatis Judicis.

An carens scientiâ necessariâ, & peritiâ juris, officium judicis procuraverit, & suscepit? nam damna inde sequentia tenetur resarcire.

An sine justa ratione Causas præsertim pauperum pupillorum, Viduarum judicare notabiliter distulerit? aliàs tenetur ad restitutionem. An propter respectum personæ insignis, vel sanguinis, vel amicitiae, vel timore correptus iniquam sententiam protulerit?

An non habita sufficienti inquisitione, & plenæ Causæ discussione ad sententiam accesserit? An odio vel corruptione munerum ductus, causam alteri adjudicaverit?

An propter suum fructum, uti multa pecuniaria multum excesserit; vel an propter eundem finem multavarit inmarcupio, quem jura jubebant punire in vita?

An judex extorserit confessionem à reo per injuriam v. gr. si torserit exemptos;
vel

vel si sine sufficientibus indiciis ; vel si dolo , mendaciis , ficta impunitatis promissione induxit ad fatendum ; vel si notabiliter excesserit in tortura ? Quo casu non solum iudex peccat , sed etiam Confessio est nulla ? An Iudex sciens reum privata scientia nocentem , si iuridice probatus sit innocens , condemnaverit ?

De Peccatis Advocati seu Patroni

Causa.

An cum non sit idoneus , scilicet sufficienter in iure peritus officium Advocati seu Patroni exercuerit ?

An defenderit causam injustam volendo vincere ?

An ob nimias dilationes illicitas , subornationes testium &c. notabiliter nocuerit parti adversae habenti alias justam causam ?

An simul & semel utrique parti patrocinatus fuerit : vel simul advocatus & iudex , vel assessor fuerit ?

An

An defendendo causam justam, produxerit tamen scripturas falsas testes falsos, & instrumenta falsa?

An cum gravamine partis alterius, quæserit delationes impertinentes? An requisierit & acceperit mercedem superfluum?

An rationes & fundamenta Clientis, quem justè defendit, vel secreta causæ adversario detexerit; propter quod cliens causam perdidit, & grave passus est damnum? Nam tum Advocatus & peccat graviter, & ad restitutionem tenetur.

An expeditiones causarum multum distulerit, postposuerit, plures quam posset expedire acceptaverit, negligenter tractaverit, ut propter hoc causa perita fuerit?

An suaserit suæ parti, ut injustè viritatem negaret, vel falsò juraret? An corruptus muneribus adduxerit partes ad concordiam iniquam? An informationibus falsis perverterit Judicem?

De

De Peccatis Scribæ, seu Notarii
& Secretarii.

Notarius publicus.

AN sine sufficienti peritia officium hoc
suceperit? An iuramentum violaverit?
An depositioni testium aliquid non levis
momenti addiderit, vel detraxerit?

An examen famulo ad describendum
cum periculo graviter errandi commise-
rit? An protocolla & acta negligenter
cum damno partium custodierit? An di-
stulerit expeditionem causarum ut pecu-
niam extorqueret?

An testamentum hominis usu rationis
destituti scripserit tanquam ejus qui est
rationis compos? An sciens falsos testes
admisit? An solemnitates juris neces-
sarias ex malitia vel ignorantia culpabili
prætermiserit?

An testimonium aliquod necessarium,
unius rogatu, & alterius damno non ex-
hibuerit? An confecerit instrumentum
Usurarium, vel falsum in damnum al-
terius?

An

An formaverit ita processus, ut Causæ deberent venire ad alios iudices, quam ordo tribunalis postulat?

An secretum violaverit v. gr. aperiendo parti dicta testium, ante eorum publicationem? An parti petenti acta vel instrumenta occultaverit, vel transumptum processus negaverit? An in testamento moribundi quod scribebat, pia legata scribere prætermiserit? An testamenta continentia pia legata occultaverit, ex protocollo disciderit, combusserit?

An ei qui amisit publicum instrumentum, vel testamentum, aliud simile confinxerit? An extradando instrumenta injustam mercedem extorserit?

An Notarius thesauri Regni, milites in stipendio defraudaverit, cunctando, milites cum assignatione venientes in expectatione longa detinendo, pecunias in thesauro non esse mentiendo; eos per hoc ad remissionem stipendii in medietate, vel magna parte cogendo, & eam pecuniam sibi applicando &c.

E

An

An accipiens munera ab eo qui non solvit quartam ex starostia, syngraphe quietationis de soluta quanta dederit?

Secretarius.

An iuramentum violaverit? An arcanum prodiderit? An sententiam nondū publicatam propalaverit? An testimonia infideliter transcripserit, sive exaggerando, sive minuendo, sive immutando, aut invertendo?

De Peccatis

Medici, Pharmacopolæ, Chirurgi

Medicus.

An absque sufficienti doctrina & peritia medicinali curare tentaverit

An occurrente gravi & insolito morbo, speciali studio operam non intenderit? An habens medicamenta probabiliter utilia, vel explorata, adhibuerit inexplorata experiendi gratia? An non cognita bene morbi naturâ, temerè adhibuerit remedia obvia, vel periculosa, præsertim cum periculo vitæ, vel gravis læsionis?

An ægroto existenti in periculo, opportunè non adfuerit, eum curare neglexerit?

vel

vel alios medicos adhiberi non permiserit?
 An aliquid Dei honori, vel Divino præcepto contrarium v. gr. incantationem, pollutionem, superstitionem &c. suaserit?

An facile & sine necessitate ab jejuniis abolverit, esum carniū permittendo?
 An pauperem ægotantem, & in discrimine vitæ existentem, juvare contempserit?

Pharmacopola.

An rudis & ignarus munus exercuerit?

An sine arte vel diligentia medicamenta confecerit? An in potionibus loco machari, melle usus fuerit? An unum medicamentum pro alio contra præscriptum & voluntatem Medici ægroto porrexerit?

An medicamentum ad non concipiendum, vel ad abortum efficiendum vendiderit?
 An pharmaca inutilia scilicet vetera, quæ vel evaporaverunt, vel compurruerunt, tantumquam utilia adhibuerit?

Chirurgus.

An sine scientia & peritia vulnera curare tentaverit cum periculo infirmi? An cum gravitas vulneris exigeret Medicum

(propter quod æger mortuus est) non An
consuluerit? An propter lucrum majus non
curationem protraxerit? An

An mercedem justo majorem acceperit? cor
rit? An abortus causa venam aperuerit, stu
vel aliud remedium adhibuerit?

De Peccatis Opificum.

Mercator.

An venenum & alia prohibita vendiderit? A
personis suspectis de pravo usu veneni? A
paratus fuerit pretium quodcunque etiam bru
injustum ab emptore accipere?

An mercium gravem defectum occul
tum non aperuerit? An in injuriam emptor A
rum, monopolium, cum aliis instituerit? A
An merces unius generis, sibi soli vendendicu
das obtinuerit, cum immoderato suo luma
cro, & damno emptorum?

An merces ab ignorante pretium merd
emerit pretio vili, vendiderit autem prdapi
tio magno? An merces veteres & inutilitio
pro recentibus vendiderit, novis admiscue
rit, & utrasque eodem pretio vendiderit? A

An gabellas & justa tributa defraudaverit? A

An tempore debito cum posset creditoribus non solverit, cum gravi eorum damno?

An juraverit falso se tanto pretio merces comparasse? An iniverit contractum injustum, vel de cujus justitia dubitabat?

An à simplici & ignorante, excessivum pretium acceperit?

Bibliopola.

An vendiderit libros prohibitos, perniciosos, Machiavelisticos, lascivos? An librarium defectu laborantem pro integro vendiderit?

Argentarius seu Aurifaber.

An metallum vile pro pretioso vendiderit? An auro vel argento plus ejus admiserit, quam ars requirit, & emptoribus mixtionem non significaverit, neque premium minuerit? An ex rebus furtivis aliquid emerit mala fide? An communem lapillum pro pretioso vendiderit? vel pretiosum, pro vili emerit?

Sartor, Sutor, Faber.

An juraverint se tali die opus perfecturos, quod sciunt vel dubitant non futurum?

An plus materiæ exegerint quam opus sit
necessarium ; vel partes residuas sibi re-
tinuerint contra voluntatem domini, &
cum damno ejus?

An diem festum sine gravi causa per se
vel suos famulos violare ausi fuerint? &c.

S. III.

*Æger pœnirens offert suam Con-
fessionem Domino.*

FACTA plena suorum reatuum confessio-
ne servus debitor seu infirmus, offerat
illam Domino atque humillimè dicat : Sit
tibi Misericordissime Domine meus, Dul-
cissime Jesu, obsecro per clementiam tuam
& merita Beatissimæ Virginis Matris tuæ
& omnium sanctorum, grata & accepta
ista mea Confessio : & quidquid defuit ad
perfectionem Contritionis ; ad puritatem
& integritatem Confessionis, suppleat pie-
tas & Misericordia tua : suppleat Passio tua
pretiosissima, suppleant inestimabilia me-
rita tua. Et ego hæc peccata, de quibus me
acculavi, & alia quorum recordari non
possum ; vel quæ per oblivionem, aut in

con-

considerationem non sum confessus; vel
illa pro peccatis non reputavi, iterum cen-
ties millies confiteor: de illis me accuso,
confundor, & erubesco. Tu qui es abyssus
pietatis & Misericordiae, miserere mei.

§. IV.

Ager paenitens proponit se emendaturum.

Heu me miserum Misericordissime Deus.

Tua sunt optime Domine meus omnia
quæ in Cœlo sunt & quæ in terra. ego autē
infelix non sum tuus quia non sum servus
tuus sed servus mundi, carnis & diaboli;
servus sensuum, Concupiscentiarum, &
pravorum desideriorum; servus superbiæ
Avaritiæ, Gulæ, Iræ, Invidiæ, Luxuriæ, &
aliorum flagitiorum meorum. O cœcam
insaniam? O stultissimam voluptatis pec-
caminosæ aviditatem? Quem fructum re-
tuli ex illis, de quibus nunc erubesco? De-
lectatio occidit & præterit. vulneravit &
transiit, ac me miserum fecit. Nunc verè
cognosco solam esse libertatem, non ser-
vire peccatis: & quod qui facit peccatum,
servus est peccati. Nunc scio verè, maxi-

mam esse felicitatem & veram sapientiam;
 peccati non rubere culpâ, nec ferre crude-
 lem peccati dominatum. Toties hæc audi-
 toties expertus sum; & tamen miser à pec-
 catis nondum destiti, sed à scelere in scelus
 impetu furibundo delapsus sum. Qua pro-
 pter confundor in memetipso, nec dignus
 sum oculos in Coelum levare, sed magis di-
 gnus essem illos plorando amittere. Exau-
 di Domine, Placare Domine. Aspice infe-
 licem pieras immensa; respice miserum
 Misericordia infinita. Jam ab hinc volo esse
 servus tuus. Desidero me ipsum tibi in-
 spontaneam oblationem offerre, & tu per-
 petuò manere. Domine in simplicitate
 cordis mei, offero me ipsum tibi hodie in
 servum sempiternum, in obsequium, & in
 sacrificium laudis perpetuæ. Suscipe ser-
 vum tuum in bonum. Præsentio tibi omnia
 debita & peccata mea: & tu Deus piissime
 Miserere mei, secundum magnam Miseri-
 cordiam tuam. Et secundum multitudinem
 miserationum tuarum, dele iniquitatem
 meam; dele omnia debita mea, & conscien-
 tiam

tiam meam ab omni delicto emunda: & restitue mihi gratiam tuam quam peccando amisi, omnia mihi plenè indulgendo, & in osculum pacis me misericorditer assumendo.

Quid possum agere pro peccatis meis, nisi ea humiliter confiteri & lamentari, ac tuam Misericordiam incessanter deprecari. Deprecor igitur te, tu propitius exaudi me. Omnia peccata mea maximè displicent mihi: nolo ea unquam amplius perpetrare; sed pro eis dolco, & dolebo, quam diu vixero; paratus pœnitentiam agere, & pro posse satisfacere. Contemno omnia mundana; execror prohibitas sensuum voluptates; odi summe offensam tuam. Maledictum peccatum. Maledicta peccati voluptas. O summum Bonum, Dulcissime Deus, utinam te nunquam sprevissem? utinam te nunquam offendissem. Malo centies millies mori, quam semel peccato fœdari, & te piissimum Patrem offendere. Et tu age mecum secundum Bonitatem tuam, & non secundam malitiam & nequitiam meam.

E s **ACTIO**

ACTIO V.

*Ager gratias agit, & benedicit Dominum
pro restitutione sui in gratiam.*

Ela Misericordissime Pater. Confitebor
tibi Domine Deus meus in toto corde
meo; & glorificabo Nomen tuum in æter-
num: quia Misericordia tua magna est su-
per me; & erulisti animam meam ex infer-
no inferiori. Nam cum essem filius perdi-
tionis, me toties mortiferè peccantem,
subitanea & mala morte non sustulisti, ad
infernum non condemnâsti; sed scelera
mea dissimulâsti, me patienter expectâsti,
misericorditer ad te vocâsti, horrendè la-
psum de abyssò perditionis sublevâsti &
erexisti, locum pœnitentiæ dedisti, in gra-
tiam tuam (ut spero) perduxisti, ex hæ-
rede inferni, hæredem Cœli iterum fecisti.

Benedico igitur piissimum Dulcissimum
Deum Cœli, & coram omnibus viventib9
confitebor ei, quia fecit mecum Misericor-
diam suam. Benedictus sit Deus Pater, Vni-
genitusque Dei Filius, Sanctus quoq; Spi-
ritus, quia fecit mecum Misericordiam
suam.

suam. Te Deum Patrem ingenitum; te Filium Unigenitum: te Spiritum S. Paraclitum, Sanctam & individuum Trinitatem, toto corde & ore, confiteor, laudo, atque benedico: tibi Gloria in secula seculorum: Benedictus Deus, Pater Misericordiarum, & Deus totius consolationis, qui consolatur me in omni tribulatione mea.

Benedic anima mea Domino, & omnia quæ intra me sunt Nomini sancto ejus. Benedic anima mea Domino, & noli oblivisci omnes retributiones ejus. Qui propitiatur omnibus iniquitatibus tuis: qui sanat omnes infirmitates tuas. Qui redimit de interitu vitam tuam; qui coronat te in Misericordia & miserationibus. Qui replet in bonis desiderium tuum: renovabitur ut aquilæ juvenus tua.

Laudent te misericordissime Deus, Cœli, terra, maria, & omnia quæ in eis sunt. Laudet te ipsa Bonitas & Misericordia tua, quā ostendisti mihi. Et ego viribus omnium Creaturarum tam actualium quam possibilem infinities te laudo, Benedico, adoro,
amo,

amo, glorifico, tibi; gratias, ago, pro eo:
quia recordatus es Misericordiae tuae ma-
gnae; & eam mihi misero praestitisti. Sis
in aeternum Benedictus. Amen.

ACTIO VI.

*Ager reconciliatus, recipit hospitio Domi-
num suum in Sanctissimo Eucharistiae
Sacramento.*

Bonus Dominus Dulcissimus Jesus, ser-
vum debitorem scilicet peccatorem,
non solum recipit, eidem debita dimittit,
gratiam per peccata amissam restituit; sed
etiam illum suo sacratissimo corpore &
sanguine, esurientem pascit, deficientem
reficit, atque ipse in sacramento occultatus
adeum venire dignatur, desideratam sibi
in ejus anima constituens mansionem.
Quocirca servus Domino reconciliatus
per sacram confessionem peccatorum sci-
licet ager, curet huic Benignissimo &
Amabilissimo Domino, summo devotio-
nis affectu occurrere, eum recipere, ei
maximas gratias agere, atque aliquid gra-
tissimum offerre.

§. I.

*Ager reconciliatus, summo pietatis affectu
currit obviam Domino Jesu in Sanctis-
simo Sacramento adventanti.*

ET unde hoc mihi servo indignissimo,
peccatori maximo, ut veniat Dominus
meus ad me? Quid tibi Domine Jesu, ut di-
gneris me vilitare servum tuum, atq; sic te
mihi communicare. Tu Creator, ego crea-
tura. Tu Dominus maximus, ego homun-
cio servulus, & vermis. Tu Deus, ego li-
mus. Tu infinitæ perfectionis Essentia ego
nihil, Tu sanctitas ipsa, Bonitas & Beati-
tudo; ego impius flagitiosus & infelix.
Cur ergo ad me properas? Cur mortem
minaris nisi suscepero? An tu fortassis
præ amore mei nescis, quis qualis & quan-
tus sis? sed quia scis, ad me tamen venire
non dedignaris, pro tua bonitate & digna-
tione infinites sis Benedictus in æternum.
Veni ergo Dulcissime Domine & noli
tardare, tui enim amore langveo.

Euge serve licet non bone annuntio tibi
gaudium magnum: gaude & lætare, quia

venit ad te Dominus tuus, non iratus, sed placatus, Placidissimus Creator, Benignissimus Pater, Deus & Homo, Christus Jesus, cujus deliciae sunt esse cum filiis hominum. Occurre illi, & hunc Amabilissimum suscipe hospitem. Sed quomodo te Domine, Deus sancte, fortis & immortalis audebo suscipere? Ecce Oza sacerdos declinantibus bobus, Arcam Dei sustinens percussus moritur. Ecce Bethsamitarum curiosè Arcam Dei inspicientium, tot occiduntur millia; quomodo ergo, non Arcam Dei, sed temetipsum Deum suscepturus non exhorreiscam? Ecce S. Joannes Baptista dicit se non esse dignum corrigiam calceamenti tui solvere. Ecce S. Petrus praesentiam tuam extimescens dicit: Exi à me Domine, quia homo, peccator sum ego; quomodo ego non solum palpare, sed manducare praesumam? O Deus meus, pulcherrime sponsae animae meae, quomodo ad me pollutum & sordidum intrabis? Ergone huc se demitteret Majestas & pietas tua, ut in me cloacam foetidam, & sentinam vitio-

rum ingredi non dedigneris? tanta est
bonitas tua, tantus est amor tuus in me.
Igitur Amabilissime Domine propter im-
mensam pietatem tuam, noli me recipien-
tem te averfari, qui non es averfatus mu-
lierem profluvio sanguinis affectam te
tangentem; qui cæcos, claudos immun-
dos, leprosos ad te appropinquantes non
rejecisti; qui te à meretrice tangi permi-
sisti; qui cum peccatoribus manducasti.
Veni ergo Dulcissime Domine, nam te
millies desidero.

Scio te Domine Jesu esse Fontem omnis
dulcedinis, & immensum mare gratiarum,
ideoque quemadmodum desiderat cervus
ad fontes aquarum: ita desiderat anima
mea ad te Deus, ut in me habites, apud me
commoreris, nunquam à me discedens.
Scio ô suavisime Jesu, Amabilissime ani-
marum sponse, dum te in sacramento re-
cipio, fieri me thalamum tuum, templum
Spiritus Sancti, tabernaculum Sanctissimæ
Trinitatis, sepulchrum tuum vivum: ideo
te in me ardentissime volo, scio ô Amator
ho-

hominum Desideratissime Jesu, dum communico carnem meam tangi à benedicta carne tua; me tua dulcissima membra amplecti, osculari: ideo sumendi te summo ardeo desiderio. Scio denique me communicantem ex servo fieri amicum, & domesticum tuum: scio me tunc assidere mensæ Regiæ, vesci epulo pretiosissimo: scio me panem Angelorum sumere, deliciis Coelestibus frui, ac bonis omnibus cumulari, denique in terris fieri beatum: ea propter cor meum & caro mea exultaverunt in te Deum vivum.

Festina ergo Domine, & ne tardaveris; patent tibi cordis mei penetralia. Veni Dilecte mi. Veni Dilecte votorum meorum, & visita indignum famulum tuum. En ostium apertum animæ meæ. Veni Jesu infinite amabilis. Veni milles desiderate, Veni in cor meum; posside illud, & conforma cordi tuo. Veni lux vera, quæ illuminas omnem hominem venientem in hunc mundum. Veni ô amator peccatorum, reparator confractorum, Veni ô dulcis

cis Pater pauperum. Et quia sum infirmus, foedus, pauper, nudus, cœcus, ac tanto hospite indignus; tu pro tua immensa pietate, meam digneris curare infirmitatem, lavare foeditatem, ditare paupertatem Vestire nuditatem, illuminare cœcitatem, dignificare indignitatem. Da mihi ut te suscipiam, cum tanta fide, humilitate, religionē, pietate, devotione, charitate, timore reverentia, sicut decet tuam Majestatem sanctitatem & dignitatem. Desidero enim te suscipere, sicut te suscepit in Vterum sacratissima tua Mater; atque omnes qui te dignè susceperunt & suscipient in hoc sacramento, quorum omnium affectus, & actus sanctos atque merita, in unione tuorum actuum tibi offero. Tu quoque Dulcissime Jesu, da mihi tua merita, & virtutes tuas sanctissimas, quibus vestitus & decoratus, oculis tuis inveniar gratus, & tua Divina præsentia dignus.

§. II.

*Agrotus ingredientem excipit Dominum
in Sanctissimo Eucharistiæ Sacramento.*

Do-

Domine non sum dignus ut intres sub
tectum cordis mei; sed quia tu bonus
vis ut de hospitio ad manendum suscipiam:
ecce mancipium tuum, fiat mihi secundum
verbum tuum. Bene veneris ad me Domi-
nus meus, Deus meus, Creator & Redem-
ptor meus. Prosterne me & projicio ante
pedes tuos, eosque amorosissimè ample-
ctor & osculor. Ergo ô hospes Dulcissime.
desideratissime, gratisime, Jesu amabilis-
sime delicia mea, amor meus, omne bo-
num meum, sis meus, & ego semper tuus:
nunquam me à te separari permittas. Do-
minus meus & Deus meus. Deus cordis
mei, & pars mea in æternum. Deus meus
& omnia.

§. III.

*Infirmus Dominum à se susceptum Salutat,
laudat, benedicit, eiꝫ gratias agit.*

Salve melliflue, salve suavissime JESU,
hospes diu desiderate, anxie quælite, tol-
licite adamare. Saluto te ex intimis animæ
meæ visceribus, cum Patre & Spiritu S.
apud me indignissimum permanentem.

O ani-

O anima mea habes multa bona, non ter-
restria; sed omnia bona vera, Coelestia &
divina, dum habes in te summum Bonum,
& fontem omnium bonorum pretiosis-
simum Jesum: gaude ergo & lætare felix,
tantis cumulata bonis. Sed quid retribuam
Domino, pro omnibus, quæ retribuit mihi?
Quid tibi reddam omnipotens Domine?
quid rependam? quas gratias agam, pro
tanta gratia: quia tu ad me venisti, & te
mihi in cibum dedisti? Non sufficio. Scio
te dixisse Ps. 49. Sacrificium laudis hono-
rificabit me. Igitur ego te totis viribus
quantum possum laudo & benedico.

Laudent te Gloriosissime Jesu Coeli, Ter-
ra, Mare & omnia quæ in eis sunt. Laudent
& benedicant te omnes justi, electi tui;
laudent & superexaltent te in secula. Lau-
dent & benedicant te sancti Angeli tui;
laudent & superexaltent te in secula. Lau-
det & benedicat te Gloriosissima Dei ge-
nitrix, Virgo & Mater tua Dulcissima. Lau-
det & benedicat te sanctissima & Divinis-
sima Humanitas tua. Laudet te denique

infinita bonitas & pietas tua, quam ostendis
 omnibus Creaturis, & præcipuè mihi
 indignissimo & ingratissimo Laudet te in-
 finita sapientia, omnipotentia tua, infinita
 pulchritudo Magnitudo tua. Et ego viri-
 bus omnium Creaturarum tam actualium
 quam possibilium, infinites te laudo,
 benedico amo, adoro, glorifico, tibi que
 gratias ago, pro tuis maximis, innumeris,
 inestimabilibus beneficiis tuis mihi ab
 æterno, & in tempore tam in communi,
 cum aliis, quam in particulari mihi soli
 concessis: præcipuè quia me in gremio S.
 Ecclesiæ Catholicæ collocasti & mori tri-
 buisti, Sanctis Sacramentis tuis uti dedisti,
 sanctissimo corpore & sanguine tuo, tam
 diu pavisti, & nunc me eodem suavissimè
 refecisti. O quanti Paganorum, Judæorum,
 Hæreticorum carent hoc Cœlesti pabulo?
 quanti Catholicorum inter Hæreticos com-
 morantium desiderant hoc divinum Con-
 vivium, & non habent? quanti moriuntur
 non refecti hoc Angelico pane? Hoc me
 tu pati non es passus, sed te mihi in escam de-

dedisti, & me teipso satiasti, refecisti, honorasti, ditasti. Pro quo sis infinites benedictus. Gloria Patri & Filio & spiritui S. Sicut erat in principio & nunc & semper. Et in secula seculorum Amen.

Benedictus es Domine in firmamento Cœli. Et laudabilis & gloriosus, & super-exaltatus in secula.

6. I V.

*Ager Domino Jesu, apud se hospitanti
offert munera.*

PAUPER & nudus, ac abyssus nihili cum sim, nihil habeo, quod tibi offerrem. Dulcissime Domine Jesu, præter hoc quod à te accepi. Scio te dicere mihi: Præbe fili mi cor tuum: Prov. 23. hoc ego tibi ardens amore, & ipsum offero amorem; quo propter te contemno omnia terrena, & arbitror ut stercora, atque abominor omnia quæ tibi displicent te autem omnipotenter amo summè Bonum, & summum Bonum. O quis mihi daret omnes affectus & actus sanctissimæ tuæ Matris, quos habuit erga te quando te concepit, in Vtero portavit,

tavit genuit educavit, & tecum vixit? O si habere omnes affectus & actus pios omnium celebrantium & communicantium: hos omnes Dulcissime Jesu tibi offero, & ipse elicere desidero.

Accipio quoque de tuis meritorum tuorum Pretiosissime Domine Jesu omnes cogitationes sanctas, quas hic in mundo habuit; omnes affectus & actus, quibus Patrem & Deum orasti, adorasti, laudasti, benedixisti, honorasti, dilexisti, ipsi gratias egisti, & infinites meruisti; Cum quibus omnibus jungo & unio omnes (quæ fuerunt, sunt, & erunt, in Ecclesia Dei) cogitationes sanctas, affectus pios, actus Virtutum, opera bona, & tibi placita, atque Sacro Sancta sacrificia (desiderans ista omnia ipse perficere) & hæc sibi Dulcissimo Domino præsentio, atque in munus gratissimum offerro. Et quia in me requiris dignos fructus poenitentiae, & ego illos non habeo; pro his offero tibi tua Sacro Sancta jejunia, & omnem vitæ tuæ austeritatem, totam Passionem & mortem tuam.

Vir-

Virtutibus quia nudus sum, offero tibi tuas sanctissimas & perfectissimas Virtutes, scilicet: Religionem, Humilitatem Charitatem, obedientiam, Innocentiam, Virginitatem, Castitatem, Paupertatem, Mansuetudinem, Patientiam, fortitudinem, Constantiam, temperantiam, aliasq; omnes. Tu Benignissime Domine Jesu suscipere à me digneris; nam ego te in his virtutibus pro posse meo imitari volo & desidero.

S. V.

Ægrotus supplicat Domino apud se hospitanti pro necessitatibus.

Liberalissime Domine, Dulcissime Jesu, procidens ad pedes tuos, humillimè deprecor immensam pietatem tuam; ut sicut me indignum servum tuum visitare dignatus es: ita preces meas exaudire, & indigentias meas sublevare digneris. Esum unde quaque miser; tu illos tuos misericordissimos oculos ad me converte & miserere mei. Sum infirmus, sana me. Sum debilis conforta me. Sum lapsus & clisus, erige me. Sum tepidus, animò frigidus, acce-

accende & inflamma me. Sum cæcus,
Domine ut videam, illumina me. Sum foe-
dus & maculatus, ablue & munda me.
Sum nudus, vesti & operi me gratiâ tua &
Virtutibus Sanctis. Sum pauper, dita me.
Sis mihi in omnibus omnia. Esto mihi
ductor in dubiis, Magister in scientiis, Vir-
tus in tentationibus, Medicus in ægritu-
dine, solamen in angustis, clypeus in ad-
versitate, salus in agone. Libera me ab omni
peccato; & à terrenis procul remove cor
meum. Da ut mihi moriar, & tibi vivam.
Fræna & mitiga inordinatos motus meos.
Cohibe cæcam & furibundam carnis con-
cupiscentiam. Cor mundum crea in me
Deus, & spiritum rectum renova in visce-
ribus meis. Ne projicias me à facie tua, &
spiritum Sanctum tuum ne auferas à me.
Da mihi ambilissime Jesu sedium tua-
rum assistricem sapientiam, & gratiam
quæ mecum sit, & mecum laboret, me
roboret & protegat, ne succumbam in
tentationibus, & cadam coram inimicis
meis. Ne derelinquas me in cogitatu ma-
ligno.

ligno. Da mihi voluntatem bonam, eamq;
 amore tuo inflamma; & libera me à vo-
 luntate mala. Da intentionem rectam &
 desiderium tibi placendi in omnibus acti-
 bus meis. Da gratitudinem pro tuis lan-
 tissimis beneficiis; Contritionem veram,
 detestationem peccatorum summam, fir-
 missimum propositum amplius non pec-
 candi. Illumina oculos meos, ne unquam
 obdormiam in morte; ne quando dicat
 inimicus meus: prævalui adversus eum.
 O Dulcissime mi Jesu, da mihi omnia quæ
 pertinent ad feliciem mortem, cui jam sum
 vicinus. Per tuum dolorosissimum ago-
 nem, & tuas amarissimas horas, quibus in
 cruce pependisti, miserere mei in illo mor-
 tis tremendo articulo, à quo pendet vel
 vita, vel mors & perditio æterna. Parce
 mihi, parce malis meis, parce peccatis meis.

Supplico quoque Misericordissime Do-
 mine, pro Parentibus & cognatis, Bene fa-
 ctoribus, amicis & inimicis meis. Miserere
 omnium in statu peccati, in agone, in ten-
 tatione, in desperatione, in ægritudine, in

F

peri-

periculo, in captivitate vel carcere, in afflictione & adversitate, vel in aliqua necessitate existentium. Miserere etiam omnium eorum, pro quibus ego piissime Deus orare debeo, & tu rogari vis; pro quibus orare promisi; nec non eorum qui se indignis meis orationibus commendaverunt; vel mei in suis orationibus memoriam faciunt, vel mihi aliquod Charitatis officium, & pietatis studium impenderunt; vel in aliquo nocuerunt. Miserere omnium, quos ego servamus, indignis precibus meis coram tua Majestate juvare possem, in omnibus statibus tam in communi, quam in particulari; vel à me subsidium expectant vivorum & mortuorum. Per te ipsum qui es spes & propitiatio ac salus nostra Amen.

§. VI.

Infirmus invocat Beatissimam Dei Matrem, suosq; SS Patronos, ut suppleant ejus defectus in Communione sanctissimi.

O Sacratissima Virgo & Mater. O serenissima Coeli Terraeque Regina, DE

Ge

Genitrix Maria Gloriosissima, quæ omni-
 potentem Creatorem omnium Creatura-
 rum, in tuo sacratissimo utero portare,
 & tuis virgineis uberibus sola lactare di-
 gna fuisti. Cujus verissimum corpus, ego
 indignus peccator modo sumere præsum-
 psi, tuam humiliter deprecor Mitericor-
 diam, quatenus apud ipsum pro me inter-
 cedere digneris; ut quicquid in sanctissima
 Communione mihi defuit; & per me ne-
 gligentem, tepidè, indevorè, irreverenter,
 atque culpabiliter commissum est, per tuas
 sacratissimas preces, & tua merita pretio-
 sissima, mihi benignissima indulgere di-
 gneatur, idem Dominus noster Jesus
 Christus, Filius tuus; quem pro nobis o-
 mnibus vivis & defunctis exorare inces-
 santer digneris. Vos quoque S. Michaël,
 S. Gabriel, S. Angele mi Custos, SS. Patroni
 mei N. N. invoco, & humiliter deprecor:
 adite in conspectu Divinæ Majestatis, &
 gratias eidem passimæ Majestati, necum-
 que; deficius meos supplete; & pro no-
 bis omnibus, tam vivis, quam Defunctis
 intercedere dignemini Amen.

ACTIO

ACTIO VII.

*Æger pius Actibus compensat omissum,
vel negligenter persolutum servitium
divinum.*

SI quilibet servus debet facere voluntatem domini sui, multò magis servus Dei scilicet Christianus fidelis debet facere voluntatem Domini Dei; & sese occupare in ejus labore & operibus, seu actibus, qui Deo maximè placent, & cedunt ad ejus Honorem & laudem, servo autem inerentur apud Dominum Deum gratiam, ac præmium vitæ æternæ. Opera vero & actus isti sunt: Actus fidei, spei, charitatis, Adorationis, Laudis, Gratiarum actionis &c. Quem laborem Deo debitum quia servus, scilicet æger in vita omisit, vel vix aliquando idque negligenter persolvit: ideo dum vivit, & in quantum potest omissionem vel negligentiam diligenter compenset, atque Actus prædictos affectuosissimè eliciat.

Actus Fidei.

O Deus æterna & suprema veritas, credo, & pro infallibili veritate confiteor

Quil

Quia tu es Deus in Trinitate Vnus, Pater,
 Filius, Spiritus Sanctus. Tres personæ in
 una Deitate, æquales sibi per omnia. Credo
 Vnice Filii Dei, quia tu Deus verus existens,
 propter salutem hominum factus es Homo;
 atque passus & Crucifixus nos sanguine
 tuo & morte ignominiosissima redemisti;
 septem sacramenta ad consequendam vi-
 tam æternam instituisti; Verum corpus &
 sanguinem tuum, & te ipsum solum in Bea-
 tissimo Eucharistiæ sacramento nobis in
 Cibum & potum reliquisti; Mercedem
 omnibus hominibus tam bonis quam malis
 pro operibus, post mortem præparasti &c.
 Et præter hoc, omnia quæcunq; Ecclesiæ
 S. Catholica ad credendum proponit, li-
 benter amplector, & firmiter confiteor.
 Omnes errores Paganorum, Judæorum,
 Hæreticorum condemno. De hoc coram
 Deo, & omnibus Creaturis protestor: quia
 in sinu S. Matris Ecclesiæ Catholicæ Ro-
 manæ mori volo & desidero; atque nullis
 dubietatibus contra fidem hujus Ecclesiæ
 consentire volo.

Hoc unicè & cordiculus doleo, & de-
ploro optimè Deus: quod in te totus mun-
dus non credat; te non adoret non laudet;
de tuis myfteriis sic non sentit, sicut tu re-
velasti, & per S. Ecclesiam ad credendum
tradidisti. Igitur ego te humiliter & obnixè
deprecor, quatenus me in Fide S. Catholica
robores & confirmes, Pro qua Fide omnia
tormenta, & mortem crudelissimam cum
auxilio tuo Domine Deus sustinere & pati
paratus sum, si tuæ sanctissimæ placeret
voluntati. Ergo velle meum suscipe; &
meritorum SS. Martyrum, qui propter
Fidem S. passi sunt, digneris me facere
participem.

Actus spei.

O Deus optime, dum ego inspicio con-
scientiam & librum vitæ meæ, facta &
opera mea non bene mihi ominentur.
Nam omittens benefacere, feci hoc, quod
carni, mundo & diabolo placuit; & in
hoc vitam meam consumebam, & te Deum
meum offendebam: sicut nunc peccata
mea minentur & promittant ultiram

iram

iram tuam, & poenam æternam. Attamen ego nunquam desperabo de gratia & Misericordia tua: sed respiciens infinitum Oceanum seu mare immensum Misericordiae tuæ, illuc me contero; & à te Deo irato, fugio & appello ad te Deum Misericordissimum: ut me non ut Judex iustus judices, sed ut Pater Benignissimus peccata mea, & offensas tuas Clementiâ tuâ cooperias. Fugio quoque ad Sanctissima vulnera Filii tui, & Salvatoris mei Jesu Christi; & tibi ejus sanguinem arque Passionem totam pretiosissimam pro me presento. Recurro etiam ad potentissimam intercessionem Matris Dei Virginis sanctissimæ, nec non sanctorum tuorum, præcipuè Patronorum meorum.

Denique projicio me in abyssum infinitæ Bonitatis tuæ ô Clementissime Deus, & habeo spem firmam & immutabilem: quia mihi peccata dimittes, & ad Vitam æternam perduces: sic, ut etiam si in fortibus inferni constitutus essem, de Misericordia Dei nunquam desperabo; neque

illis terroribus, & minis diabolicis respectu peccatorum meorum terreri me permittam.

Actus Amoris Dei.

O Deus Essentia incomprehensibilis, O sapientia investigabilis O pulchritudo increata inconceptibilis, Fons infinitæ bonitatis, ex quo abundè cunctæ hauriunt Creaturæ; & quidquid habent, inde omnes accipiunt. O quanto dignus es amore ab omnibus creaturis? ô quam te rationalis Creatura præsertim homo diligere debet? Igitur ego te ex toto corde meo, ex totis viribus meis, ex tota anima mea diligo Deum meum. Ex intimo affectu gratulor tibi hoc, & ex corde lætor inde: quod sis infinitæ potentiæ, sapientiæ, pulchritudinis; quod sis immutabilis, æternus, incorruptibilis, bonus, misericors, sanctus, iustus immensus, incomprehensibilis, in ulla perfectione finem non habens.

Gratulor tibi hoc: quod tu ipse à te, & non ab aliquo alio habes talem potentiam gloriam & dominium super nos, & omnem
Crea-

Creaturam; quæ ut te honoret, laudet,
glorificet, diligat tanquam Creatorem, &
Dominum suum optimum, toto corde opto.
Et ex hoc, quod te Creaturæ omnes suffi-
cienter nequeunt laudare, amare, infinito
honore & amore dignum, vehementer
gaudeo. Et quia amor meus nihil est re-
spectui Tui, summi Boni & infiniti; tunc te
tam intente, & perfecte desidero amare,
sicut te dilexerunt, & diligunt in æternum
omnes sancti homines & Angeli, inimo sic:
sicut tu te ipsum infinito amore diligis; &
hunc tibi amorem, sicut tibi debitum tri-
buo. Tali amore semper diligam te, etiam-
si mihi in hac vita, & post mortem nihil
boni præstares; immo etiam si omnes ad-
versitates, & calamitates in me permittere-
res; denique etiam si me in æternas Infer-
ni poenas damnares, diligere te Benefa-
ctorem & summum Bonum non desistam.
Et quia Dulcissime Deus præcepisti me di-
ligere proximum meum, gratias ago pro
tam dulci mandato: & ideo flecto volun-
tatem meam ad hoc, ut secundum volun-

ratem tuam, eum diligam; Ergo illum licet
inimicum meum maximum sincerè & in-
timè diligo; eidem omnes injurias ab eo
mihi factas, ex corde dimitto. Cuilibet res
necessarias, à peccatis resipiscenciam, gra-
tiam tuam, & æternam salutem sincerè
opto; & ex hoc, quod proximus meus hæc
obtineat, valde lætor.

Actus Adorationis Dei.

O Deus infinitæ Majestatis & Magnifi-
centiæ Trinitas sanctissima, Pater, Fili &
Spiritus Sancte; ecce ego cum maxima quâ
possum submissione, & humilitate, cadens
in faciem coram Divina tua majestate con-
fiteor me esse tuam Creaturam, & opus
manuum tuarum. Te autem agnosco Deū
Creatorem, & Dominum meum proprium,
cui debeo, servire, & sanctam tuam volun-
tatem facere. Pro tali Domino, ut te omnes
homines habeant, intimè opto: nunc autem
re Deum, Creatorem, Redemptorem, &
Dominum infinitæ Majestatis, servus &
mancipium tuum adoro; omnem tibi ho-
norem, & debitam subditiōem tribuo;
in-

invocans omnes Creaturas in Cœlo & in terra, ut te mecum adorent, honorent; à quibus quidquid honoris & adorationis habuisti, habes, & habebis in æternum, hunc ego honorem & adorationem, tibi nunc, & semper exhibeo atque offero.

Actus Laudis Divinæ.

O Deus Gloriosissime, sicut diligere, sic & laudare te summè obligatus sum; nam hoc postulat infinita Majestas tua, infinita Præstantia, infinita Dignitas, Magnificèntia & Omnipotentia tua. Igitur ego te Deum meum, qui es Principium & finis, omnem possibilem, & infinitam perfectionem in te perfectissimè continens, ex totis viribus meis magnifico, laudo, exalto, benedico; & hoc desidero, ut te semper in omni loco possem laudare, honorare, benedicere, sicut te laudant honorant, benedicunt; & honorabant, laudabant, benedicent omnes sancti in æternum; animo sicut te potuerunt, possunt, & poterint laudare, honorare, benedicere omnes actuales & posibles Creaturæ.

Desidero tibi tantum laudis tribuere,
quantum laudis habes à Virgine & Matre
Gloriosissima Maria, ab Humanitate sanctissima Christi, denique à Te ipso Deo,
in infinita laude ab æterno existente. Gau-
deo ineffabiliter ex hoc : quod te neque
sancti omnes homines, neque Angeli, neque
infinitorum Mundorum Creaturæ suffi-
cienter laudare valeant; nam cunctas lau-
des creatas, dignitate, præstantia, Majeſta-
te, atque infinitis perfectionibus superas,
infinita laude dignus. Hanc ego tibi
promptissimè tribuo. Sis Laudabilis &
Gloriosus & superexaltatus in secula.

Actus Gratiarum actionis Deo.

O Deus Pientissime, si multum debeo
parentibus, qui me genuerunt, Præcepto-
ribus qui me docuerunt, & cuilibet qui
mihi benefecit; quid ego tibi ô largissime
fons bonitatis debeo, qui me ex nihilo fe-
cisti, qui mihi parentes dedisti, imagine me
tua insignivisti, omnia tam in terra, quam
in Cœlo propter me creasti, me tuo san-
guine & vita inæſtimabili redemisti; per
totam

totam vitam meam nutritiſti, tanquam
 pupillam oculi cuſtoditiſti; in manibus tuis
 & Angelorum portâſti; & alia innumera,
 inæſtimabilia beneficia mihi præſtuliſti.
 Quid tibi pro his omnibus rependam ô
 Bonitas Divina? Quomodo tibi reſtatiſ-
 cabo? Gratias tibi quantum poſſum ago.
 Et quia tibi dignas gratias agere nequeo,
 invoco Chriſtum Jeſum, Matrem
 tuam ſanctiſſimam, nec non Creaturas
 omnes, tam viſibiles, quam inviſibiles,
 actuales & poſſibiles; quatenus mecum
 Tibi Deo pientiſſimo & Liberaliſſimo pro
 his Beneficiis gratias agant: & nunc quoq;
 gratiarum actiões, quas habuiſti, habes
 & habebis, ab hominibus in terris, à ſan-
 ctis in Cœlis, ab Angelis à Virgine & Matre
 ſanctiſſima, ab ipſo Chriſto Domino no-
 ſtro, qui tibi in quantum homo, pro bene-
 ficiis mundo præſtitiſti gratias reddit; de-
 nique gratiarum actiões quas potes ha-
 bere à cunctis creaturis tam actualibus,
 quam poſſibilibus; has omnes cum omni
 gratitudine tibi offero & tribuo. Et quia

sum tibi pro Beneficiis ad regradificandum obligatissimus, tunc me tibi ipsum, in servum & mancipium, ad faciendam sanctissimam voluntatem tuam, nec non ad laudandam Bonitatem tuam ineffabilem, plenissimè offero.

Actus Oblationis pro omissis functionibus à servo peragendis.

Deus misericordissime, ego deplorandus homo & tuus malus servus, vivens in hoc mundo, multis fui obstrictus obligationibus; nam debui declinare à malo, & facere bonum imitando virtutes tuas Domine Jesu, & sanctissimæ tuæ Matris. Debui diligere, & tuam sanctam voluntatem facere; Passionem Salvatoris mei considerare, & ei pro me passio summè condolere. Ego autem contrarium feci: nam bona opera intermittebam virtutes sanctas negligebam, te Deum non diligebam, voluntati tuæ non obtemperabam, Passionis sanctissimæ non recordabar; nec Redemptori meo in tormentis compatiebar. Pro quibus omnibus dolens piissime Deus

Pater,

Pater, offero tibi hoc, quod tibi gratum & placitum spero pro eo quod te Deum bonum offenderim, offero dolores injurias, contemptus, proba, irrisiones, blasphemias, plagas horrendas, vibices, livores, tumores, vulnera, sanguinem effusum, denique crudelissimam & ignominiosissimam mortem unigeniti Filii tui Domini mei Jesu Christi, & hoc totum quod per rotam Vitam suam passus & pro eo quod bona opera intermiserim, offero tibi omnes actiones, tibi gratissimas & acceptissimas ejusdem Filii tui, omnes ejus virtutes, omnia merita; similiter & Matris ejus sanctissimæ atque omnium sanctorum qui tanta bona opera fecerunt, faciunt, & facient, uniens hæc omnia, quæcunque tibi offerre possim, cum actibus, virtutibus, meritis & passione Filii tui & Redemptoris mei. Pro eo quod Passionem salvatoris mei devotè meditatus non fuerim, nec ipsi compassus fuerim, offero tibi dolorosas meditationes ineffabilem tristitiam, amarissimas lacrymas, sacratissimæ Matris Jesu,

Jesu, videntis. & postea meditantis Passio-
nem Filii sui. Offero tibi quoque omnes
meditationes, actus, compasiones, dolo-
res, amores, fletus Sancti Francisci super
Passione Christi; & aliorum Justorum &
sanctorum, qui hic vixerunt, vivunt & vi-
vent: horum omnium sanctas cogitatio-
nes, affectus pios & actus, bona opera,
nec non Sacro Sancta sacrificia, pro me
nudo & vacuo bonis operibus, tibi offero.

Denique, habeam intellectum & Volun-
tatem atque alias potentias internas & ex-
ternas omnium hominum, vivorum &
mortuorum, sanctorum & damnatorum;
Angelorum, bonorum & Malorum; de-
nique omnium Creaturarum, non tantum
quæ fuerunt sunt & erunt, sed etiam quæ
sunt possibiles: harum omnium vires con-
verto ad te Deum laudandum, honoran-
dum, magnificandum, benedicendum, di-
ligendum; & ad omnes actus pios & san-
ctos, quibus te laudare, honorare, adorare,
glorificare, benedicere, amare, tibi que pla-
cere ac mereri possunt cunctæ creaturæ.

Hos

Hos omnes actus libenter vellem Deus meus elicere innumerè & infinites. Suscipe ergo ô Bonitas infinita voluntatem meam, & affectum meum erga te, & æstima pro ipsis bonis operibus,

ACTIO VIII.

*Ager eosdem actus præmissa Fide
Catholica breviter elicit.*

Credo in Deum in Trinitate Sancta
Unum Patrem & Filium & Spiritum
Sanctum. Confiteor Patrem esse Deum &
Filium esse Deum & Spiritum Sanctum esse
Deum, Unicum Dominum, & tres in Dei-
tate Personas Patrem Filium & Spiritum S.

Credo in Filium Dei Christum Jesum
Redemptorem meum. Confiteor quia ille
sicut est verus Deus ex Patre ab æterno ge-
nitus. Sic etiam est homo ex Matre Virgine
Maria in tempore natus Carnem & ani-
mam habens, in duabus Naturis una Per-
sona existens.

Credo & confiteor in sanctissimo Eu-
charistiæ Sacramento esse verum corpus &
Sanguinem Salvatoris mei & ipsum Chri-
stum

stum Jesum Deum & Hominem nobis hominibus datum in cibum Spiritualem.

Credo denique & confiteor ea omnia quæcunque Sancta Ecclesia Romana cum Supremo Pastore suo credit & nobis credendum & confitendum tradit. In hac fide semper vivere & mori desidero. Hanc Solam fidem pro vera agnosco alias omnes Sectas Hæreticas damno & rejicio.

Profitendo hanc fidem ô mi Deus bone diligo te super omnia ex toto corde meo ex totis viribus meis ex tota anima mea tanquam supremum & infinitum bonum & benefactorem meum omni amore dignissimum & diligere volo in æternum quantum possum & debeo quinimo sicut te ipsum diligis amore infinito.

Gratias tibi ago pro omnibus beneficiis tuis tam Spiritualibus quam corporalibus mihi in communi cum aliis & in particulari factis & præstitis.

Adoro te reddoque tibi gloriam & honorem cum Sanctis Angelis & hominibus nec non cum omnibus creaturis quæ quia

te sufficienter laudare non possunt, inde
lætor & hoc tibi gratulor.

Et quia te Creatorem Redemptorem &
Benefactorem meum tam magnum ac Pa-
trem amabilissimum gravibus peccatis
meis toties offendi, ex toto corde meo do-
leo non pœnam sive æternam sive tem-
poralem formidans, sed te dulcissimum
Patrem sincerissimè amans atque ampliùs
offendere nolo & statuo abominans & re-
jiciens omnem iniquitatem.

Confido & habeo spem firmam de gratia
tua & remissione peccatorum meorum
propter quod projicio me in abyssum Mi-
sericordiæ tuæ divinæ atque immergo me
in mare Sanctissimæ Passionis tuæ, fugioq;
ad sacratissima vulnera tua pretiosissima
sicut & omnia merita vitæ tuæ & sanctis-
simæ Matris tuæ nec non omnium sancto-
rum in cœlo & in terra viventium, & in sa-
tisfactionem pro peccatis meis offero.

Et quia tu misericordissime Jesu inimicis
& Occisoribus tuis dimittebas & pro illis
ad Deum Patrem tuum orabas tunc & ego

ex corde dimitto omnes injurias meas
propter te & amorem tuum omnibus ini-
micis & debitoribus meis qui me aliquan-
do licet gravissimè læserunt & offende-
runt. Et rogo te Deum Redemptorem
meum ut sis ipsis propitius & dones illis
singularem gratiam pro hoc quia me odio
habuerunt & in aliquo nocuerunt, me per-
secuti sunt. Et quia ego dimitto tu quoque
Benignissime Domine dimitte mihi offen-
sas tuas & peccata mea. Tu enim dixisti &
promisisti, Dimittite dimittetur vobis
Deus propitius esto Mihi Peccatori

ACTIO IX.

*Ager Religiosus pœnitex de non servatis
Votis solemnibus.*

De non Servata Obedientia.

Doleo Domine Deus ex toto corde meo
quod Obedientiam tibi & superioribus
meis promissam prout debui non serva-
verim.

Agnosco Domine Deus me Voluntatem
meam plenè & perfectè non abnegasse
me paratum semper ad facienda mandata
su-

superiorum non fuisse, imo neglecta superiorum Voluntate meam propriam secutum fuisse, atque superioribus meis toties non obediuisse & reluctasse de quo Doleo & poenitentiam ago.

Confiteor Domine Deus me iussa superiorum flocci pendisse, aliquando irritasse reprehendisse, me ab impletionem Voluntatis eorum futiliter excusasse. Pro quo doleo & poenitentiam ago. Agnosco Domine Deus meus me superioribus meis non libenter, non alacriter, non velociter, non fortiter, non humiliter obediisse sed illibenter, amarè, cunctanter, segniter, remissè & fere coactè iussa eorum fecisse. De quo doleo & poenitentiam ago.

Confiteor Domine Deus illa mandata quæ naturæ & sensualitati ac timori meo aridebant, me alacriter suscepisse, quæ verò illis adversabantur magna cum repugnantia indignatione & quærimonia admisisse, pro quo doleo & poenitentiam ago.

Propono & promitto Domine Deus reliquo tempore quo supervixero facere volun-

luntatem cujuslibet superioris mei' ad
cujus mandatum paratus sum etiam mori,
meque tuæ sanctissimæ Voluntati plenis-
simè resigno, siue me vis morbis affici, siue
solum esse siue vivere siue mori, fiat Vo-
luntas tua.

De non Servata Paupertate.

Doleo Domine Deus quod paupertatem
tibi promissam non servaverim.

Confiteor Domine Deus meroto corde
& affectu à teneris rebus alienatum non
fuisse. Sapius me rebus curiosis & appa-
rentibus adhesisse easque affectasse. Pro
quo doleo & Pœnitentiam ago.

Agnosco Domine Deus me his rebus
quæ ad modestum victum & amictum
pertinebant contentum non fuisse, super-
flua à me non abieciisse, pretiosioribus ve-
stibus ad ostensionem mundanam ausum
fuisse, & inde tumuisse. Quod lachrymis
deploro & pœnitentiam ago.

Agnosco Domine Deus me sapius sine
licentia superioris aliqua recepiisse, abis
dedisse contra Voluntatem superioris ha-
buisse

huiffe ab oculis ejus occultaffe. Pro quo doleo & poenitentiam ago.

Confiteor Domine Deus vilitatem ciborum fastidiiffe defectum & penuriam in victu & amictu patienter non toleraffe ob amiffam vel surreptam rem etiam modicam turbatum fuiffe nimis, pro congregandis cibariis alijsq; necessariis nimium sollicitum fuiffe atque aliquando lautius vixiffe aliosque tractaffe De quo doleo & poenitentiam ago.

Promitto & propono Domine Deus per residuum tempus paupertatem promiffam fervare. Et nunc ex proprio me totaliter ac quidquid habeam in vestibus & utensilibus in manus superioris resigno & trado pauper & nudus cum paupere & nudo Christo volo mori cujus paupertatem & nuditatem pro transgressionem paupertatis meae ei poenitens offero.

De non Custodita Castitate.

Doleo Domine Deus quod castitatem mundissimam & tibi promiffam non custodiverim sed roties contra eam tam cogitatione Verbo & opere deliquerim. A-

Agnosco Domine Deus me cogitationibus inhonestis segniter restitisse & aliquando proch dolor oblectatum fuisse & sic templum Deo consecratum maculasse & prophanasse. Pro quo doleo & poenitentiam ago.

Confiteor Domine Deus me appetitum sensuum non refrænasse oculos periculose vagari permisisse, aures verbis & cantilenis illecebrosis aperuisse, verba æquivoca turpem sensum redolentia & aliquando inhonesta ac turpia locutum fuisse. De quo doleo & poenitentiam ago.

Agnosco Domine Deus me superfluis cibis & calidis poculis carnem meam toties inflammasse ac in illa concupiscentias & prava desideria excitasse atq; me toties à sensuum execrabili voluptate ad inordinatos & prævaricationis plenos actus seductum & adductum fuisse. Pro quo maxime doleo & poenitentiam ago.

Propono Domine Deus potius centies millies mori, quam aliqua carnis spurcitia foedari. Et pro transgressione mea commissa

commissa contra castitatem offero tibi Domine Jesu tuam sanctissimam tuæque Matris intemeratam Virginitatem, castitatem, puritatem; Tu amabilissime & misericordissime Jesu respice meam infirmitatem, parce stultitiæ, ignosce malitiæ Amē.

DEUS Propitius esto mihi Peccatori. O Jesu per illam omnem amaritudinem quam sustinuisti in cruce. Et per dolores sanctissimæ Matris tuæ Miserere mei.

ACTIO X.

Infirmus Testamentum pium conficit.

DOMINE meus, Deus piissime, moriarne, an consurgam ex hac mea infirmitate? nescio, tu scis Domine, in cujus manu sunt Mors & Vita. Verum tamen si moriturus modò, si victurus quàm diutissimè, etiamsi ad ipsum judicii diem, hanc ultimam & immutabilem habeo voluntatem; atque tale coram te Deo meo conficio testamentum. De Bonis internis quæ à te accepi, scilicet de Anima & Corpore sic dispono. Animam à te Domine Jesu creatam, & tuo pretiosissimo sanguine redemptam, trado tibi in dilectissimam sponsam: qua-

G

tenus

tenus cum ea, & in ea, cum Patre & Spiritu
S. semper maneat & habites. Intellectum
meum destino ad cogitationes sanctas,
præsertim ad cognoscendum te infinitè
bonum, pium, Misericordem, sanctum, ju-
stum, liberalem, pulchrum, magnum,
omnipotentem, in omnibus mirabilem.
Memoriam tibi do, ad recolenda innumera
& inæstimabilia Beneficia tua mihi à te
concessa. Voluntatem meam tibi ordino,
ad execrandum peccatum, ad amandum te
ex totis viribus meis & ad parendum san-
ctissimæ voluntati tuæ.

Corpus meum offero tibi ut jumentum
tuum ad exequenda mandata tua; ad fe-
renda flagella poenitentiae meæ, & ad susti-
nenda onera diversarum afflictionum per
te mihi infligendarum. Oculos meos con-
verto ad fletum pro peccatis meis, & su-
per sanctissima Passione Domini mei Jesu
Christi; atque ad videndum te in Creaturis;
Aures ad excipiendam vocem & Volunta-
tem tuam in prædicatoribus, Confessariis,
& prælatis meis; Os & linguam ad te lau-
dandum & benedicendum semper & ubi-
que;

que; manus meas ad facienda opera bona; pedes ad ambulandum in viis mandatorum tuorum, & ad subveniendum miseris, quibus potero. Quæ omnia diligenter exequi volo, quamdiu mihi vivere in mundo concesseris.

Abrenuntio omnibus mundi pompis, vanæ gloriæ, pulchris & pretiosis ornatibus, conviviis, ludis, jocis, risibus, musicis & cantilenis carnalibus, scurilitatibus, solatiis & recreationibus ac occasionibus quibus potest caro tentari, allici & delectari; & spiritus impediri atque inquinari. Horreo & abominor omne quod tibi displicet. Execror illicitam carnis, & cujuslibet peccati voluptatem. Relinquo omnia mundana & vana. Te verò hodie eligo mihi in Deum, summum bonum, & ultimum finem meum, protectorem meum in gubernatorem vitæ meæ, in provisorum necessitatum mearum, in consolatorem meum in omnibus doloribus angustis ac tentationibus atque laboribus meis. Tu refugium meum, tu domus mea, tu civitas mea, tu habitatio mea. Tu cibus meus, tu

potus meus, tu requies & refectio mea. Tu socius dilectus, tu intimus amicus, tu cognatus & proximus, tu frater & soror, tu Pater & Patronus. Tu Custos totius vitæ meæ, cui me & omnia mea fideliter commendo: quia non est salus extra te, nec tuta vita absque te. Fiat ergo misericordia tua Domine super me, & gratia tua in omnibus comitetur inecum; sitq; oculus tuus super me die ac nocte; & manus tua protegat me semper à dextris & à sinistris. ac recto itinere me perducere digneris in domum habitationis gloriæ tuæ, ubi te laudare merear sine fine.

Inimicis meis omnibus Pientissime Jesu sicut tu in cruce ignovisti, ita & ego ignosco, ac omnes offensas e sdem condono, atque pro illis rogo: non solum ut injurias meas super eis non vindices, sed etiam ut specialem eis gratiam pro mei persecutione tribuas. Amo enim illos, non ut inimicos & mihi noxios, sed ut maximos amicos & benefactores meos; ut pote qui odio ac afflictione mei, peccata mea in me puniverunt, poenitentiam me pro
 pec-

peccatis agere fecerunt, atque mihi tuam gratiam, & Cœlestia bona comparârunt.

Protestor Dulcissime Domine DEUS meus coram te, & Angelis tuis atque cunctis Creaturis: quia mori volo & desidero in gremio & fide S. Matris Ecclesiæ Catholicæ Romanæ: quia dolco summè pro peccatis meis; & ampliùs in æternum peccare, & te Deum piissimum offendere nolo: quia amo te amore omnipossibili, & gaudeo maximè de omnibus bonis tuis eaque sibi opto; ita ut si per impossibile tua infinita Essentiâ, Omnipotentiâ, Gloriâ Felicitate, Majestate, Beatitudine deberes carere; ego ut hæc non acciderent tibi, pœnas Luciperi, & omnium damnatorum in æternum pati paratus sim. Et hæc est voluntas mea ultima, firmissima, & testamentum meum, quod à te Deus meus, & tota Curia cœlesti confirmari & roborari postulo.

Testamentum de Temporalibus.

Finis dies vitæ meæ ego N. N. finio quoque opera mea; inter quæ etiam & hoc est singulare opus homini Christiano

conveniens: ut ille non tantum ut est ratione præditus, sed etiam ut est timens Deum, pia ultima voluntate, & discreta domus suæ dispositione cursum vitæ huius terminet ad laudem Domino Deo, Animæ suæ utilitatem, vivis posteris ad contentationem. Voluntas igitur mea ultima, cum qua coram vobis omnibus præsentibus protektor, est hæc.

1mo. Quia in gremio S. Matris Ecclesiæ Catholicæ Romanæ mori desidero. Credo in Deum Trinum & unum, Patrem, Filium & Spiritum S. Confiteor Dominum Jesum Christum Salvatorem meum, Credo omnia, quæ credit S. Ecclesia Catholica Romana.

2do. Animam meam trado & commendo Domino Deo, quam ille creavit, & passionis suæ pretiosissima redemit. Ad cuius in purgatorio existentis juvamen relinquo pro sacris Misis ad Ecclesiam N. vel ad Monasterium N. florenos &c.

3tio. Corpus meum commendo terræ, quod volo sepeliri in Ecclesia N. Ad cuius Ecclesiæ contentationem & subsidium.

lego

lego florenos tot &c. Funus meum fiat Christianum modestum sine pompa mundana. In eo adsint quam plurimi sacerdotes & pauperes.

4to Debita mea recognosco. Debeo huic N. florenos tot &c. & illi N. florenos tot &c. Ad quorum debitorum solutionem relinquo flore tot. Famulis & famulabus debeo hoc & illud &c.

5to. Uxorem, Liberos & Consanguineos relinquo sic & sic &c.

6to. Executores Testamenti eligo & designo ipsos: N. N. Quos obnixè rogo, & tremendo iudicio obstringo, ut voluntati meæ ultimæ in omnibus satisfaciant.

7mo. Ad Ecclesiam N. Ad Monasterium N. pro Laude & Honore Dei, atque suffragio animæ meæ lego & depono hoc & hoc &c. Volo ut pro mea pecunia comparatur ad Missæ sacrificium calix, vel planeta, vel Alba, vel mappa pro Altari &c.

ACTIO XI.

Servus æger resignat se in Voluntatem Domini, paratus tam mori, quam vivere.

O Dulcissime Domine Pater Misericordiarum, Domine Jesu, neque vitam neque mortem, sed tuum beneplacitum desidero: hoc expecto, fiat mihi secundum voluntatem tuam, si non potest calix iste infirmitatis & dolorum meorum transire nisi bibam illum, & epotem usque ad feces mortis, fiat. Dominus es, quod bonum est, in oculis tuis, facias. Fiat voluntas tua, sicut in Cœlo & in terra, scilicet in me pulvere tuo. Paratum cor meum Deus, paratum cor meum: mori, & finire hanc miseram vitam Tu Misericordissime Conditor, & Redemptor meus, suscipe spiritum meum. Et licet ad vesperam novissimus ad laborandum venerim, da mihi tamen denarium diurnum æternæ gloriæ, ut tecum & in te requiem accipiam sempiternam, quia bonus, & nimis largus es. Si vero Amabilissime Jesu vis, ut diutius vivam, propono per gratiam tuam, (quam firmiter peto) reliquum vitæ meæ in melius commutare, & corrigere, ac in servitio tuo fideliter insumere, secundum beneplacitum tuum, ad honorem & gloriam tuam.

ACTIO

ACTIO XII.

*Ager implorat à Domino patientiam
in infirmitate.*

Benedictus sis tu Domine Jesu, qui me infirmari, & doloribus concuti permittis. Tu ergo qui percutis, da sustinendi fortitudinem; & qui exterius flagellas, da interius micam ineffabilis patientiæ tuæ, quam habuisti in tota vita, & præsertim in Passione & morte tua: da ut æquo animo, non solum suavia, sed etiam adversa & tristia quæque, tanquam de manu tua paterna libenter hilariterque suscipiam. Da ergo mihi Domine (re go cum S. Fulgentio) modo patientiam, & postea indulgentiam. Patientiam ô Domine, patientiam, postea da indulgentiam.

ACTIO XIII.

*Infirmus appellat ab judicio Domini sui,
post mortem futuro.*

SCIO Misericordissime pariter & Justissime Domine dixisse tuum Apostolum: si nos ipsi dijudicaremus, non utique judicaremur. Et ego quidem peccata mea

G r con-

confitendo me judicavi & condemnavi; &
sic obtinui syngraphe quietativum abso-
lutionis à peccatis quoad culpam. Verùm
tamen per hoc non effugi iudicium tuum
Iustitiæ tuæ severissimæ, injurias & offen-
sas à me tibi illatas vindicare, & me gra-
visimè punire volentis. Quid ergo miser
faciam? scio quid faciam? provoco & ap-
pello. Sed à quo & ad quem? Appello à te,
ad te ipsum. Appello à te iraro, ad te pla-
catum. Appello à tribunali Iustitiæ, ad tri-
bunal Misericordiæ. Apello à throno Ma-
jestatis, ad thronum Crucis. Ibi me quia
judicari oportet, illuc recurro, illuc con-
fugio. Ibi amplectens tuos sanctissimos
pedes dico cum S. Bernardo.

Dulcis Jesu pie Deus,

Ad te clamo licet reus.

Præbe mihi te benignum.

Ne repellas me indignum.

De tuis sanctis pedibus.

Coram Cruce procumbentem,

Hosque pedes complectentem

Jesu bone ne me spernas,

Sed de cruce sancta cernas.

Compassionis gratia.

*In hac cruce stans directe.
Vide me ô mi dilecte,
Ad te totum me converte.
Esto sanus, dic aperte.
Dimitto tibi omnia.*

*Ecce tuo præ amore.
Te complector cum rubore.
Me coopto diligenter.
Tu scis causam evidenter.
Sed suffer & dissimula.*

*Hoc quod ago non te gravet,
Sed me sanet & me lavet.
Inquinatum & ægrotum,
Sanguis fluens hic per totum
Ut non supersit macula.*

Non diffido, sed multum confido causæ
meæ: nam ecce tibi ô bone Domine præ-
sento duplicem legem scriptam pro me.
Primam: Ubra dulcissima sanctissimæ
Matris tuæ. Scio enim canente tuo dilecto
servo quod: *Liber legis fit pectus niveum,
Et cum legit hunc os Virgineum.
Mox horroris Iudex aculeum
Justè frangit, & facit melleum.*

Hunc in librum & legem ô Fili Dei & Mariæ inspice & lege; ac propter ubera dulcissimæ Matris tuæ, quæ contra venenum peccatorum nostrorum quam dulciter suxisti, obliviscere delictorum meorum, & Miserere mei.

Alium quoque librum & legem in eodem toto libro pro me scriptam, tibi ostende, scilicet: Carnem tuam sanctissimam in Cruce appensam, totam vibicibus, livoribus, plagis vulneribus, doloribus plenam, & sanguine circumfusam. Clamat clavus, clamat vulnus pro me. Tot pro me ora, quot tua vulnera. Tot pro me oratores, & defensores, quot livores & dolores. Quot sunt tua tormenta, tot pro mea salute argumenta. Sanguis tuus innocentissime Abel copiosissime effusus, clamat de terra, non contra me, sed pro me. Lege ô Jesu piissime Redemptor meus, hunc totum librum; Pondera legem; audi voces validissimas pro me: & non intres in iudicium cum servo tuo; sed secundum multitudinem Miserationum tuarum dele iniquitatem meam.

Adest

Adest quidem infelix chirographum quo me hosti meo, diabolo inscripsi. Adest maledictus contractus, quo pro voluptate momentanea peccati, Animam meam, Gratiam tuam, Gloriam Cœlestem, deniq; Te ipsum, summm Bonum, Deum optimum, toties vendidi & perdidi. Et dum me tantis Bonis exhæredavi, factus sum hæres inferni, filius damnationis & perditionis æternæ cum dæmonibus. Verum tu Misericordissime Salvator & liberator, qui sicut universale totius generis humani simile chirographum cruci tuæ affixisti, & illud sanguine tuo delevisi: ita meum chirographum Cruci tuæ affige, & pretiosissimo sanguine tuo, qui fuit de latere tuo, & omnibus Vulneribus tuis dele, & scripturam maledictam peccatorum absterge. Et absolve me sicut à culpa, ira & à pœna peccatis debita, propter gravissimas pœnas tuas, quas pro salute mea pertulisti.

ACTIO XIV.

Ager, membra sacratissima Domini sui Crucifixi, osculans et adorans, rogat Virtute illorum tolli peccata membrorum suorum.

Plissimus Salvator noster Dominus Iesus propterea in omnibus membris suis passus est, ut omnibus in membris nostris infirmis mederetur, & tolleretur peccata membrorum nostrorum, quibus Deum offendimus, ac pœnas gravissimas Justitiæ Divinæ promeruimus. Propterea servus æger recurat ad membra sacratissima Christi, in quibus ille gravissimè passus est. Atque accepta lignea cruce, & imagine sculpta Crucifixi, devotissimè membra Domini Iesu amplectetur: & mente adorans ea, amorosissimè exosculetur, dicendo affectuosè ad quodlibet singillatim:

Ad pedes.

O Speciosi pedes Domini mei Iesu Christi, qui grossis ac horrendis duobus clavis transfixi fuistis, & pretiosum sanguinem in magna quantitate emisistis: adoro vos reverenter, & osculor diligenter, petens mihi dimitti, quidquid stando vel ambulando deliqui.

Ad Crura & Genua

O decora Crura, & humilia genua Domini mei Iesu Christi, sæpè in oratione,
super

super nudam terram incurvata & prostrata
jacuistis, & in Passione nutantia, & mul-
tū gravata fuistis: adoro vos humiliter,
& osculor suppliciter, rogans mihi pro-
pitius ignosci, quoties in Dei servitio pi-
ger & indevotus extiti.

Ad Venter.

O Sacer & incontaminatus Venter Do-
mini mei Jesu Christi, quem portavit &
aluit Virginalis aula sanctissimæ Mariæ:
qui multis verberibus fuisti acerrimè per-
cussus: adoro te dignauter, & osculor com-
patienter. Supplicans mihi relaxari, quo-
ties corpori meo, ampliorem quam ne-
cessitas exigebat curam impendi.

Ad Latus.

O dignissimum latus Domini mei Jesu
Christi, in quo Divini amoris patet vulnus
amplissimè transforatum: adoro te præ-
cipuè & osculor perintimè, flagitans mihi
veniam concedi, quoties charitatem fra-
ternam læsi, & ab amore Cœlesti refrigui.

Ad Dorsum.

O patientissimum dorsum Domini mei
Jesu Christi, quod promptum fuit portare
lignum

lignum Vitæ, & omnia peccatorum onera sine contradictione, perferens etiam durissimos ictus flagellorum: adoro te devotè, & osculor amarosè, orans mihi remitti, quoties minus patienter gravamina imminencia pertuli.

Ad manus.

Venerabiles manus Domini mei Jesu Christi, in Cruce longius extensæ, & ferreis grossis clavis perforatæ: adoro vos fideliter, & osculor dulciter, postulans in me abstergi, quidquid illicito actu, vel contactu perpetravi.

Ad Pectus.

O mundissimum pectus Domini mei Jesu Christi, in quo nulla peccati labes fuit, nec intrare potuit; super quod Beatus Johannes Apostolus in coena recubuit, adoro te sincerè, & osculor affectuosè, deprecans in me purgari, quidquid sordida cogitatione contraxi.

Ad Collum.

O candidum collum Domini mei Jesu Christi, fame ac siti frequenter extenuatum, nunquam curiosè adornatum, nec in
altum

altum vanè extensum; sed humili reverentia Patri & Matri subiectum; quod in passione duriter fuit pugno percussum, fune & torque ferrea onustum: adoro te humiliter, & osculor amabiliter, orans mihi dimitti, quidquid ostentationis causa peregi.

Ad Faciem.

O inclyta & pulcherrima facies Domini mei Jesu Christi, plena omni dulcedine, & amicabili reverentia, turpiter à Judæis consputa, nequiter cæsa, jocaliter velata; adoro te reverenter, & osculor affectanter, petens ut mihi indulgeas, quoties vultum tuæ serenitatis offendi.

Ad Os.

O suavissimum os Domini mei JESU Christi, à quo salutis verbum prodit in mundum; quod Judæorum sputis extitit inquinatum, & aceti ac fellis poculo amaricatum: adoro te condignè, & osculor benignè, flagitans mihi ignosci, quoties edendo, bibendo aut loquendo deliqui.

Ad Aures.

O felices aures Domini mei Jesu Christi,
 quas

quas nullius vanitatis aura perflavit; nec ullus ridiculosus sermo, aut injuriosus à statu rectitudinis permutavit: adoro vos honorabiliter, & osculor amabiliter, deprecans in me celerius aboleri, quidquid vanitatis hausi per illicitum auditum.

Ad Oculos.

O præclarissimi oculi Domini mei Jesu Christi, ab omni concupiscentia puri, & in mortis violentia obscurati; unde dulcis sæpè lacrymarum profluxit imber: adoro vos cordialiter, & osculor suaviter, obsecrans mihi indulgentiam concedi, pro omni macula ex visu nocivo quæsita.

Ad Caput.

O sublime ac reverendum Caput Domini mei Jesu Christi, habens acutissimam coronam, de spinis vertici impressam; cujus circumpendentes capilli sanguine defluente sunt intincti: adoro te cum Angelis & Potestatibus universis, & super omnia sacra Vulnerum loca, osculor te charius, ac deprecor instantius, ut ab omni peccatorum spinositate me absolvas, & in numero electorum tuorum inter minima saltem membra computare digneris. Amen.

ACTIO XV.

*Infirmus de thesauro Passionis Christi
solvit debita peccatorum suorum.*

Eheu dulcis Jesu, ego omni tempore vitæ
meæ in te benignissimum Creatorem
& Redemptorem meum ingratus fui, teq;
graviter offendi, veteribus delictis nova
semper accumulans. Gratiâ tuam multis
modis impedivi, & dona tua destruxi, non
servans ea integra, neque ex eis dignè pro-
ficiens. Fateor prorsus quia indignus sum
non solum filii, sed servi tui nomine. Ve-
rum tamen te Dominum & Patrem meum
agnosco. Tu es bonus Dominus, & verus
Pater meus; tu es tota fiducia mea; tu es
fons miserationum inexhaustus, qui sordi-
dos ad te confugientes, à te non repellis,
sed abluis. Ecce ô suave refugium meum,
ecce ego omnium Creaturarum periplema
venio ad te, nihil mecum adferens præter
sarcinas peccatorum. Humiliter procido
ad pedes pietatis tuæ, & imploro miseri-
cordiam tuam. Ignosce mihi obsecro ô spes
mea certissima, & salva me propter No-
men tuum sanctum. O Dul-

O Dulcis Jesu, ego in remissionem omnium peccatorum meorum, offero tibi stupendam illam charitanem, quæ tu Deus æternæ Majestatis, homo passibilis pro nobis fieri, & plus quam triginta annis inter multiplices labores, ærumnas atq; persecutiones fatigari non es dedignatus. Offero illum mærorem, illum sanguineum sudorem, illas angustias, quibus in horto afflictus fuisti, quando Patrem fixis in terræ genibus orabas. Offero summum illud patiendi desiderium quo flagrabas quando te ipsum inimicis tuis ultro obtulisti capiendum. Offero vincula verbera, improperia, convitia, blasphemias, alapas, colaphos, sputa, atque alia genera injuriarum, quas in domo Annæ, & domo Caiphæ, per totam noctem passus fuisti. Hæc tibi offero gratias agens, rogansque immensam pietatem tuam, ut horum meritis me purifices, & placentem reddas, atque ad vitam æternam perducas.

O Dulcis Jesu, ego pro universis iniquitatibus meis, offero tibi inauditam illam ignominiam tuam quam sustinuisti, quando

do cæsus, conputus ac vinctus, mane ducebaris ad Pilatum; deinde à Pilato ad Herodem, rursusque ab Herode ad Pilatum: Offero illud tuum sanctum silentium, quo humiliter tacuisti ad illatas contumelias & injurias. Offero contemptum tui, & ridiculæ vestis probum, quo ab Herode affectus fuisti. Offero acerbissimam illam poenam, quam perpeßus es, quando ad columnam ligatus dirisimè flagellabaris. Offero ipsorum flagellorum sulcos, & purpurei sanguinis rivulos, è sanctissimis membris tuis, undique profluentes. Hæc tibi offero gratias agens, rogansque immensam pietatem tuam, ut horum meritis me purifices, & tibi placentem reddas, atque ad vitam perducas æternam.

O Dulcis Jesu, ego pro omnibus delictis meis offero tibi ineffabilem illam patientiam, quam habuisti, quando veste coccinea, in majus ludibrium indutus, spinis coronabaris, nugatoriè salutabaris, impiè cõspuebatur, alapis & arundine cædebaris, ante tribunal statuebaris, injustè damnabaris; demumque ad Calvariæ locum, crucem

ba-

bajulans ignominiolè trahebaris. Offero dolendam illam sacratissimi Corporis tui fatigationem, & laboriosos pedum tuorum gressus, atque humerorum tuorum gravissimam pressuram. Offero sudores, sitim & cætera omnia, quæ mitissimo, promptissimoque corde, mei causa tunc pertulisti. Hæc tibi offero, gratias agens, rogansque immensam pietatem tuam, ut horum meritis me purifices, & ad vitam perducas æternam.

O Dulcis Jesu, ego pro universis sceleribus meis, offero tibi atrocissimos illos dolores, quos passus es, quando sanctissimi Corporis tui vulnera vestimentorum detractatione innovabantur: quando manus & pedes tui cruci affigebantur: quando membrorum tuorum compages solvebantur: quando pretiosus sanguis tuus è vulneribus tuis, velut è fontibus copiosè profluens fundebatur. Offero singulis ossibus illius cruoris guttas. Offero inexplicabilem illam mansuetudinem, quâ iniquorum tibi insultantium proterviam patientissimè tolerasti. Hæc tibi offero gra-

tias agens, rogansque immensam pietatem tuam, ut horum meritis me purifices, & tibi placentem reddas, atq; ad vitam perducas æternam.

O Dulcis Jesu, ego pro universis culpis vanitatibus & negligentis meis, offero tibi incomprehensibiles cruciatus illos, quos pertulisti, quando angustiis totus expositus, miserabiliter in Cruce pendeabas, medius inter latrones; & quando vehementi siti æstuans, felle & aceto potabaris. Offero benignissimam illam misericordiam, quâ tu venerandum caput inclinans, pro nobis emisisti spiritum. Offero pretiosum illum sanguinem, & salutiferam illam aquam, quæ de latere tuo lancea transfollo effluerunt. Hæc tibi offero gratias agens, rogansque immensam pietatem tuam, ut horum meritis me purifices, & ad vitam æternam perducas.

O Dulcis Jesu, ego in perfectam remissionem omnium offensarum, quas in te quovis modo hætenus admisisti, offero tibi totam Redemptionis nostræ seriem quam peregisti. Offero incarnationem, nativita-

tem,

tem, conversationem, Passionem ac mortem tuam. Offero quidquid in Gloriosa. summa Genitrice tua, Virgine Maria, & cæteris sanctis unquam tibi placuit. Eia suavissime Jelu, satisfaciat quæso pro peccatis meis, coram Patre tuo summa innocentia tua. Totam vitam meam nimis indignam ac sceleratam, purissima sindone meritorum tuorum involve, ut mea quæ immunda sunt tuis copulata mudentur; & quæ in me imperfecta sunt, tuis unita perficiantur. Ad laudem Nominis tui. Amen.

ACTIO XVI.

Egrotus, haurit de fontibus salvatoris Jesu Christi; & suas maculas abstergi curat.

Dilecte mi Jelu, rogo te per purissimas lacrymas, quæ ex beatissimis oculis tuis promanârunt, absterge omnes oculorum meorum maculas, quas per visûs incontinentiam contraxi: ut finito hujus vitæ curriculo, mente munda, tuam clarissimam, inelutissimamque faciem contemplari merear.

Dilecte mi Jelu, rogo per Coelestem venerabilium aurium tuarum pietatem,
abluere

abluè omnem sordidarum aurium mearum iniquitatem : ut in hora mortis meæ, ab auditione mala securus, ad evocationem tuam libenter hinc enigrem ; ut te summo ac unico Bono meo, in sempiternum feliciter fruar.

Dilecte mi Jesu, rogo te per sincerissimam cogitationum tuarum intentionem, ardentemque transfixi cordis tui amorem, dissolve omnium vitiolarum cogitationum & affectionum mearum, impurique cordis mei culpam. Ipsum cor tuum amore raptum, fiat mihi gratum in morte umbraculum ; & post mortem sit animæ meæ perenne domicilium.

Dilecte mi Jesu, rogo te per dulcem, vividamque virtutem sacratissimorum verborum, quæ Divino ore tuo protulisti, deterge omnem oris mei, & linguæ meæ spurcitiam atque offensam, ut immaculatus post hoc exilium, ad te perveniens, tibi laudes in æternum cum gaudio decantem.

Dilecte mi Jesu, rogo te per dolendam incontaminatorum pedum tuorum fatigationem, & terebrationem, condona
H omnem

annem pollutorum pedum meorum
transgressionem : ut ubi carnis sarcinam
deposuero, statim locum tabernaculi tui
admirabilis, & thalamum tui amoris expe-
ditus ingrediar, ibique perenniter in te
exultem.

Dilecte mi Jesu, rogo te per admiran-
dam operum tuorum perfectionem, & pa-
tentia manuum tuarum vulnera, aufer o-
mnem impiam manuum mearum foedita-
tem ac scelera : ut postquam defunctus
fui, illico in suavissimos amplexus tuos,
absque impedimento ruere merear.

Dilecte mi Jesu, rogo te per totius vitæ
tuæ venerandam innocentiam, dele totius
vitæ meæ horrendam spurcitiam : ut post-
quam finita fuerit misera hæc captivitas,
totus mundus mox inveniar in te, qui es
verus Paradisus deliciarum : ubi torrente
voluptatis tuæ inebriatus, jugiter cum ju-
bilo, glorificem Nomen sanctum tuum
in æternum. Amen.

ACTIO XVII.

*Ager recollectione pia de Jesu Nato, Vivente,
Patiente & moriente, omnia Animæ bona
procurat.* Dul-

Dulcissimus Salvator noster Christus Jesus est thesaurus suorum Fidelium; nihil enim est in illo quod non cedat homini, ad consequendam vitam & felicitatem æternam. Nihil Christus gessit, quod non sit ordinatum ad levandam miseriam & inopiam hominis, atque ad salutem æternam ipsius, dicente S. Paulo: *Cum esset dives, propter nos egenus factus est, ut nos inopiâ ejus ditaremur.* De hoc thesauro sancti Angeli acceperunt; & omnes homines Beati accipiunt, quidquid capiunt Spiritualis & æternæ felicitatis dicentes: *Omnes nos de plenitudine ejus accepimus.* Joan. I. Est Amabilissimus Redemptor noster vera Arbor vitæ in medio paradisi Ecclesiæ constituta; tota homini vitalis & salutifera. Poma hujus arboris pretiosæ, quid sunt nisi actus & gesta Domini Jesu in tota sua vita; quæ poma afferunt homini misero vitam & beatitudinem æternam, ac ipsam Divinitatem. Servus ergo æger, miser, pauper & infelix, ut possit sublevare suam miseriam, & consequi ultimam felicitatem, & vitam æternam, per peccatum amissam; accipiat

de hoc inæstimabili thesauro; sumat de fructu hujus Arboris salutiferæ piè de Christo Nato, Vivente, Patiente meditando; cum affectu laudis, benedictionis, gratiarum actionis prosequendo, atque pro suis necessariis ad salutem precando.

Recolitio Prima.

De Jesu Concepto & Nato.

Laudo & benedico te, gratiasque tibi ago Unice Fili Dei, pro illa tua immensa charitate & misericordia, per quam perditio generi humano succurrere, & hominem Salvare ab æterno voluisti. Et rogo quatenus misericordiam & gratiam tuam non auferas à me toto tempore vitæ meæ.

Laudo & benedico te, gratiasque tibi ago ô Proles Altissimi Dei, pro illo tuo de Coelis in terram descensu in uterum Virginis. Et rogo; quatenus, descensus ille tuus faciat me in Cœlum ascendere.

Laudo & benedico te, gratiasque tibi ago ô Nate Dei, & verus Deus pro assumptione Naturæ humanæ, & mansione per novem menses in sacratissimo Virginis Intra utero.

de utero. Et rogo quatenus Humanitas tua
de Divinissima, assumat me ovem erraticam
n- & perditam in humeros suos; & asportet
a- in ovile gregis tui Coelestis. Mansio illa
ro tua in utero Matris, tanquam in paradiso,
faciat me manere in paradiso gloriæ tuæ.

Laudo & benedico te, gratiasque tibi
ago Dulcissime Jesu pro tua amabilissima
& desideratissima Nativitate, & lætissimo
go in mundum adventu: pro pannis involu-
sa- tione: pro reclinacione in præsepio, ac
r- Pastoribus & Magis tui manifestatione;
go pro tua illa dulcissima infantia. Et rogo
m- dulcissime Jesu: quatenus Nativitas tua,
e- faciat me tibi, cœloque renasci. Adventus
bi tuus in mundum jucundissimos, faciat me
de in tuo secundo adventu terribili securum,
r- Fasciæ & panniculi illi, quibus involutus
le fuisti, tegant & calefaciant me ac amore
bi tui faciant ardere cor meum. Reclinatio
n- tua in præsepio, donet mihi sydeream inter
er Coelestes incolas sedem. Manifestatio tua
his facta hominibus, manifestet te mihi post
o- mortem, ut te clarè facie ad faciem videam.
Infantia tua, faciat me semper de te gau-

dere, & te in æternum laudare & benedicere.

Recolitio 2da.

De Jesu in terris Vivente.

Laudo & benedico te, gratiasque tibi ago, ô Amator hominum Dulcissime Jesu pro tua nuditate cum qua natus apparuisti: pro tua paupertate, ita ut non haberes, ubi reclinares caput tuum: pro tua in oculis hominum vilitate. pro tua abjectione & humilitate, ut diceres de te: *Ego sum vermis & non homo: Ps. 21.* pro tuis incommodis quæ passus es per totam vitam tuam pro me: pro tuis jejuniis: pro nimia austeritate vitæ: pro itineribus: pro laboribus & fatigationibus: pro fame & siti, pro me susceptis. Et rogo pretiosissime Jesu, quatenus nuditas tua, nudum cooperiat me. Paupertas tua pauperem dicit me. Vilitas tua, vilem coram Angelis & te, pretiosum reddat me. Abjectio & humiliatio tua, in Cœlesti curia exaltet me. Incommoda tua quæ passus es, præparent mihi comoda in Patria cœlesti, quibus fruar tecum in æternum. Jejunia tua faciant me cibus Cœlestibus

stibus vesci. Austeritas tua det mihi deliciis
æternis abundare. Itinera tua pro me con-
fecta, introducant me in regnum tuum.
Labores tui faciant me præmio tuo frui,
quod Angelis & hominibus meruisti. Fati-
gationes tuæ, nunc & post mortem, in
æternum reficiant, & recreent me. Fames
tua satiet me de te, & epulis Cœlestibus in
æternum. Sitis tua potet me dulcedine tua,
quâ omnes sancti in Cœlo inebriantur ab
ubertate Domûs tuæ.

Recolitia 3tia.

*De Jesu Eucharistiam SS. instituyente, in
Horto orante, ibiq; se in potestatem
hostium tradente.*

LAUDO & benedico te, gratiasque tibi ago
Dulcissime Jesu, pro SS. Sacramentis,
quæ pro salute nostra instituisti; & præci-
puè pro Sanctissimo Eucharistiæ sacra-
mento, in quo tuum Corpus & Sanguinem,
& te ipsum in cibum Cœlestum nobis reli-
quisti & dedisti. Et rogo misericordissime
Jesu, quatenus: Corpus tuum sacratissi-
mum, vivificet, reficiat, roboret animam
meam, ut custodiat me in vitam æternam.

H 4 Laudo

Laudo & benedico te, gratiasque tibi ago Amabilissime Jesu, pro illa tua proluxa oratione in horto facta: pro summa, eaq; mortifera tristitia: pro illo summo povere ac tædio: pro utraque amarissima agonia: pro sudore sanguineo quo totus ma defactus fuisti: pro tua arduissima obedientia, & in voluntatem Patris resignatione: pro tua immensa charitate, per quam mori potius crudelissimè, quàm me non redimere voluisti. Et rogo Dilectissime Jesu quatenus oratio tua illa impetret mihi vitæ emendationem, gratiam Dei, robur in tentationibus, & vitam æternam. Tristitia tua liberet me à tristitia æterna, & obtineat mihi lætitiā, quàm hîc habent justī, & in Coelis Sancti.

Pavor tuus liberet me à povere, in tuo tremendo judicio. Tædium tuum eripiat me à tædio poenarum inferni & purgatorii. Agonia tua det mihi agonem lætum, ac felicem ex hac vita exitum. Obedientia tua tollat omnes inobedientias meas, & resistentias à me factas Divinæ voluntati, & superioribus meis,

Charitas tua operiat totam multitudinem peccatorum meorum, & suppleat omnem defectum charitatis, quam habere debui erga Deum & proximum, sudor tuus sanguineus sit mihi pretiosissimum balsamum, contra infirmitates animæ meæ.

Laudo & benedico te, gratiasque tibi ago Dulcissime Jesu pro ignominiosissima tui comprehensione à militibus: ubi infinitæ Majestatis Deus, Rex regum, & Dominus dominantium, sanctus sanctorum, tanquam iatro fuisti crudelissimè captivatus, clamoribus contemptivis impetitus, toties pugnis percussus, ad crines capitis & barbæ tractus, ad terram prostratus, genibus siccariorum pressus, funibus ligatus, torque ferrea oneratus; & sic violenter ad Urbem & per Urbem, cum tuo summo dishonore & pudore ductus.

Pro his omnibus te ô Jesu mi laudo & benedico, gratiasque tibi ago. Et rogo quatenus: potestas illa tenebrarum, in quam te spontaneè pro salute mea, ad tormenta & mortem tradidisti, eruat me à po-

testate tenebrarum infernalium scilicet demonum, hostium meorum. Captivatio tua liberet me à captivatione cohortis tenebrarum. Funes tui solvant, & liberam faciant animam meam à funibus peccatorum, & Inferni satellitum. Ductus ille tuus ad urbem, præcludat mihi viam ad Infernum & purgatorium.

Recolitio 4ta.

*De Jesu Judicibus præsentato, contempto,
& accusato.*

LAudo & benedico te, gratiasque tibi ago Dulcissime Jesu, pro ignominiosa tui statuitione coram tot judiciis tuis, pro sputis in faciem tuam pulcerrimam ex ore vipereo ejectis: pro tot horrendis alapis faciei tuæ sanctissimæ inflictis: pro velatione oculorum tuorum; & tui toties percussione, atque illusione: pro sententiis sacerdotum & Phariseorum reum te mortis in domo Caiphæ prodamentium: pro carcere illo, in quo pernoctasti: pro pœnis quos ibi tota nocte pro me passus es. Et rogo patientissime Jesu quatenus statuitio illa tui coram judicibus, statuat me à dex-

tris in extremo iudicio tuo; & prius post mortem statuas me per SS. Angelos tuos, coram te non irato, sed placato & benignissimo mei iudice. Sputa illa foetida in tuam faciem projecta ornent & decorent faciem animæ meæ. Alapæ tuæ, dent animæ meæ roseas genas, ut sit pulchra & decora, atque oculis tuis gratissima.

Velatio oculorum tuorum obumbret peccata mea ne videantur ab Iustitia tua Divina, ac severè puniantur. Percussio & illusio tibi facta, liberet me à percussio- nibus & illusionibus dæmonum.

Voces illæ, reum te proclamantes, libe- rent me à vocibus debitorum meorum & alienum me de peccatis meis coram te ac- cusantium: faciant autem me audire voces sanctorum tuorum, pro me apud te inter- cedentium. Carcer ille in quo tu ô Jesu pernoctasti, faciat me evadere carcerem, illum horribilissimum post mortem, tam æternum, quàm temporaneum. Pænæ illæ tuæ, tibi in carcere inflictæ, liberent me à pœnis Inferni & Purgatorii.

Laudo & benedico te, gratiasque tibi

ago mansuetissime Jesu, pro illo contemptu, quem passus es in palatio Herodis. Ubi tu Deus & infinitæ Majestatis Dominus, Exercituum Cœlestium Rex, à superbo illo Rege, exercitu, atque tota ejus aula furti spretus irrisus, exhibitatus, tanquam indignus præsentia Regis expulsus, tanquam fatuus veste alba indutus: & sic ignominiosissimè per plateas ad Pilatum reductus. Pro his omnibus ò Jesu te laudo, benedico, & tibi gratias ago. Et rogo quatenus contemptus ille tuus, coram te, & tota Curia Cœlesti glorificet me, & in tuo palatio Cœlesti faciat me in æternum manere. Vestis illa alba, quâ indutus eras, operiat & dealbet nigram propter peccata animam meam.

Laudo & benedico, gratiasque tibi ago modestissime Jesu, pro criminationibus, & contumeliosis accusationibus tui innocentissimi & sanctissimi; dum in foro Urbis coram Præside Cæsareo, ab impia turba & sacerdotibus dicebaris subversor gentis tuæ, seditiosus & commotor populi, Rebellis Cæsari, Malefactor &c. dignusque cru-

crudelissima Crucifixionis morte. Et rogo te amabilissime Jesu, quatenus Crimina illa tibi falsissimè objecta, tollant mea vera crimina, de quibus dæmonum turba, coram te justissimo Iudice, posset me accusare & condemnari petere.

Recolitio 5ta.

De Jesu Flagellato, & Coronato.

LAudo & benedico te, gratiasque tibi ago mitissime Jesu, pro tuadirissima ad columnam flagellatione. Ubi tu innocentissimus Dei Filius, fuisti ignominiosissimè, cum tuo ineffabili pudore vestibus exutus, & totus denudatus, funibus & loris ad columnam alligatus, virgis & flagellis acerrimè cæsus, toto corpore vulneratus, sulcatus, laceratus, à planta pedis usque ad verticem capitis, vulneribus & livoribus plenus factus, totus sanguine circumfusus. Pro his omnibus ô Jesu te laudo, benedico, tibi que gratias ago. Et deprecor, quatenus denudatio tua restituat mihi vestem innocentiae perditæ. Pudor tuus quem habuisti ex denudatione tui, cooperiat impudicitiam

meam. Tormentum illud atrocissimum flagellationis deleat luxuriam meam, atq; aboleat omnes immunditias, quas vitio carnis, & insultu concupiscentiæ, pravorumque desideriorum in me contraxi.

Laudo & benedico te, gratiasque tibi ago Amantissime Jesu, pro illa crudelissima & probrosissima Coronatione. Ubi tu Rex Cœli & terræ gloriosissimus, & infinitæ Majestatis Dominus, per ludibriū tanquam fallus Rex fuisti purpurâ irritoria veltitus, sceptro ludicro scilicet arundineo donatus, ferto spineo coronatus, tot aculeis spinarum in capite & fronte punctus & vulneratus sanguine super caput, crines, frontem aures, oculos, faciem superfusus, falsa adoratione honoratus, irrisione Rex salutatus, consputus, alapisatus, in Caput percussus, irritus, illusus, cachinnis & insultationibus impetitus, populo rabido, ex alto in miserandissima specie, utpote non habens speciem neque decorem in se ullum ostentus ad commiserandum fuisti. Pro his omnibus ô Jesu te laudo, benedico, & tibi gratias ago. Et precor te, quatenus
Coro-

Coronatio tua ignominiosissima & dolo-
 rotissima deleat peccata meæ superbiæ,
 pompæ mundanæ, vanæ gloriæ, ambitio-
 nis, apparentiæ, splendidi ornatus, osten-
 tationis, elationis. Chlamys tua coccinea,
 donet mihi purpuram Regiam in Regno
 tuo. Corona tua spinea det mihi coronam
 auream gloriæ tuæ. Sceptrum tuum com-
 paret mihi sceptrum sydereum. Illusiones
 tuæ faciant me illudere inimicis meis dæ-
 monibus. Contemptus & despectus tui,
 efficiant mihi gloriam, in conspectu SS.
 Angelorum tuorum, & totius Curiae Cœ-
 lestis.

Recolitio 6ta.

De Jesu Crucifixo & Moriente.

LAudo & benedico te, gratiasque tibi ago
 Dulcissime Jesu, pro tuo judicio mortis.
 Ubi tu Innocentissimus Dominus fuisti à
 rabido populo ad mortem postulatus, lin-
 guis Judæorum crucifixus, pejor Barraba
 sanguinario homicida reputatus; à Pilato
 inquisitus judicio ejus statutus, ad mor-
 tem turpissimam condemnatus, Carnifi-
 cibus traditus, patibulo crucis oneratus,
 à sic-

à sicariis & tortoribus per Urbem ad locum supplicii ignominiosè tanquam latro ductus. Pro his omnibus ô Jesu te laudo, benedico, gratiasque tibi ago. Et precor, quatenus sententia illa tua mortis contra te lata, liberet me in tuo judicio tremendo à sententiâ mortis æternæ, & donet mihi audire à te sententiam vitæ sempiternæ.

Laudo & benedico te, gratiasque tibi ago misericordissime Jesu, pro tua Crucifixione. Ubi tu Deus & Author vitæ sanctissimus, in medio latronum tanquam maximus latro fuisti in patibulo crucis suspensus. Caro tua sanctissima in cruce fuit violentissimè extenta, pedes horrendis clavis transfixi, & Cruci affixi; manus quoque clavis proforatæ & affixæ; artus in manibus & pedibus evulsi; venæ omnes ruptæ; Caput spineo sermo coopertum & revulneratum; oculi sanguinis & lacrymarum plenissimi. Totus ô Jesu in cruce pendeabas vulneratus, lividus, pallidus sanguinolentus, miserabilissimus, contemptus, despectus blasphematus, irrisus, illulus, dolorum intus & foris plenissimus; tandem post

amarissimum agonem mortuus; in latere
& corde lancea transverberatus, de Cruce
depositus & sepultus.

Pro his omnibus te laudo & benedico, &
tibi gratias ago ô Jesu Clementissime. Et
deprecor te, quatenus: Confortes mortis
tuæ latrones faciant me tui confortio frui
in æternum. Caro tua sanctissima in altari
crucis extensa, sit sacrificium tibi pro pec-
catis meis acceptabilissimum. Clavi tui, sint
mihi claves ad aperiendum Paradisum Cœ-
lestem. Vulnera tua sanent omnia vulnera
animæ meæ. Livores tui curent omnes li-
vres concupiscentiæ meæ, & pravorum
desideriorum meorum. Sanguis tuus ad
ultimam guttam effusus deleat omnia
peccata mea: & abluat, atque candidam
faciat animam meam, species tua misera-
bilissima, tribuat faciem speciosissimam
animæ meæ. Contemptus & despectus tui,
solvant & obliniant omnes contemptus,
quos tibi peccando irrogavi, & me in Cœ-
lis gloriosum reddant. Dolores omnes tui
liberent me à doloribus inferni & purga-
torii, & dent mihi delicias Paradisi Cœle-
stis.

stis. Agonia tua altera amarissima faciat
mihi agonem dulcem & felicem. Mors
tua det mihi vitam tecum in æternum. La-
tus tuum apertum, sanguinem & aquam
effundens, efficiat me torrente voluptatis
tuæ in Cœlis inebriari & satiari. Cor tuum
lanceâ transfixum, det mihi te in æternum
amare, & te summo Bono frui. Sepultura
tua liberet me à sepulturâ inferni, & fa-
ciat me tecum in æternum vivere & re-
gnare. Amen.

ACTIO XVIII.

*Ægrotus supplicat toti singillatim Sanctis-
simæ Trinitati pro sua salutè secundum
vires suas & tempus.*

Ex Meditat. S. Augustini
Snpplicatio.

AD DEUM PATREM.

INvoco te ô Deus meus, invoco te ô Deus
Pater Misericordiarum, & Deus totius
consolationis; invoco te, qui me de nihilo
creasti, & imagine Dei insignivisti. O Pater
Amantissime, peccavi in Cœlum & coram
te; indignus quidem veniâ, imploro tamen
tuam

tuam misericordiam. Et quia delinquentes
servuli evadunt supplicia dominorum,
dum pro eis intervenit dulcedo filiorum:
sic te omnipotens Pater per omnipotentis
Filii charitatem postulo: educ de carcere
ad confitendum nomini tuo, animam
meam. Libera me à vinculis peccatorum,
per Coæternum flagito unicum tibi Na-
tum; meque cui propria merita lethalem
minantur sententiam, pretiosissimæ ad
dexteram tuam consedentis, prolis inter-
pellatione restaura placatus ad vitam.

Quem enim alium dirigam intercesso-
rem tibi? nescio, nisi hunc qui est propi-
tatio pro peccatis nostris; qui sedet ad
dexteram tuam interpellans pro nobis.
Ecce Advocatus meus apud te Deum Pa-
trem. Ecce Pontifex summus, qui non alic-
no eget expiari sanguine; quia proprio
refulget perfusus cruore. Ecce Hostia san-
cta beneplacens & perfecta in odorem
suavitatis oblata & accepta. Ecce Agnus
sine macula, qui coram se tondentibus ob-
mutuit; qui alapis cæsus, sputis illitus, op-
probriis affectus, os sum non aperuit. En
qui

qui peccatum non fecit, peccata nostra
pertulit, & languores nostros suo livore
sanavit.

Aspicè pie Pater piissimum Filium, pro
me tam indigna passum. Respicè Clemen-
tissime Rex, quis patitur? & reminiscere
benignus, pro quo patitur? Intuere dul-
cem Natum, toto corpore extensum. Cer-
ne man9 innoxias, promanantes sanguines;
& remitte placatus scelera, quæ patrârunt
manus meæ. Considera inerine latus cru-
deli perfossum cuspide & renova me sacro
fonte, quem inde credo fluxisse. Vide im-
maculata vestigia, quæ non steterunt in
via peccatorum, diris conficta clavis, &
obliviscere vias iniquitatum mearum.
Aspicè mitissime Conditor dilectæ sobolis
Humanitatem, & miserere super infirmi
plasmatis debilitatem.

Candet nudum pectus, rubet cruentum
latus, tensa arent viscera, decora languent
lumina, Regia pallent ora, procera rigent
brachia, crura pendunt marmorea, rigat
terebratos pedes beati sanguinis unda.
Specta gloriose Genitor gratissimæ prolis
lace-

lacerata membra, & te totum flecte in me
ad misericordiam. Amplectere serenus &
benignus Pastorem & respice Misericors
allatam propriis humeris ovem. Ecce Pa-
stor bonus refert tibi, quod commisisti ei.
En gregi tuo Pastor mitis reportat, quod
prædo violentus abegerat. Ecce tibi dile-
ctus Filius plasma reconciliavit, quod à te
procul deviavit. Ecce reddit tuis conspe-
ctibus servum, quem sua conscientia te-
cerat fugitivum; ut qui per se meruit pœ-
nam, per satisfactionem ejus mereatur ve-
niam: Cuique pro culpis supererat ge-
henna tanto Advocato jam confidat re-
vocari ad patriam.

Si me pro mea ut dignum est despicias
iniquitate, respice me saltem pro dilectæ
sobolis charitate. Attende in Filio, quo
propitius in servo. Quoties beatæ Proles
tibi patent vulnera, delitescant obsecro
scelera mea. Multum quidem est, quod
meretur mea impietas: longè autem ma-
jus est, quod Redemptoris mei jure re-
poscit pietas. Magna quidem est mea in-
justitia: satis vero major est Redemptoris
justitia. Proinde Misere mei, Sup-

Supplicatio

AD DEUM FILIUM.

ET te Domine Jesu Christe Filii DEI
vivi, qui in cruce expansis manibus,
propter me Calicem passionis hausisti in-
voco. Nunc mihi præbere digneris auxi-
lium. Ecce pauper clamo ad te divitem,
miser ad misericordem, succurre mihi.
Ecce Domine iniquitates meæ supergressæ
sunt caput meum; & sicut onus grave gra-
vatæ sunt super me. Et nisi tu cui propri-
um est miteri, dexteram majestatis tuæ
supponas, mergi cogor miserabiliter in
profundum. Attende Domine Jesu & vide,
quoniam ecce insultat adversum me inimi-
cus dicens: Deus dereliquit eum, persequar
& comprehendam eum, quia non est qui
eripiat. Et tu Domine usquequo? Con-
vertere & eripe animam meam. Salvum me
fac propter Misericordiam tuam. Miterere
servi tui, sed & filii tui, quem in tantis do-
loribus genuisti. Nunquid oblivisci potest
mater infantem uteri sui? Et certè si illa
oblita fuerit, tu piissime Pater promisisti
te non oblivisci.

Ecce

Ecce clamo exaudi me; dolorē crucior
 conſolare me. Ecce jam morior, & Jeſus
 non eſt mecum? abſit. Adeſto miſericor-
 diſime Jeſu. Et ubi ſunt Miſericordiæ tuæ
 antiquæ Domine Jeſu? Nunquid irasceris
 mihi in finem? Placare obſecro & miſerere
 mei; & non avertas faciem tuam à me, qui
 pro me redimendo non avertiſti faciem
 tuam ab increpantibus & conſpuentibus
 in te. Fateor quia peccavi; & Conſcientia
 mala meretur damnationem; & poeniten-
 tia non ſufficit ad ſatiſfactionem: ſed Mi-
 ſericordia ſuperat omnem offenſionem.
 Noli quaſo piſſime Domine ſcribere ad-
 verſum me amaritudines meas, ut intres
 in judicium cum ſervo tuo; ſed ſecundùm
 multitudinem miſerationum tuarum dele
 iniquitatem meam.

Tu Domine qui non viſ mortem peccato-
 rum, nec delectaris in perditione morien-
 tium: immo ut mortui viverent, tu mor-
 tuos, da ut te mortuo pro me, & nunc
 vivente, non moriar in æternum. Mitte
 manum tuam de alto, & libera me de ma-
 nu inimicorum meorum, ne ſupergau-
 deant

deant mihi & dicant: devorabimus eum.
 Quis unquam Domine Jesu diffidet de misericordia tua? qui cum inimici essemus, redemisti nos in sanguine tuo, & reconciliasti nos Deo. Ne memineris dulcissime Jesu tuæ Justitiæ adversus servum tuum; sed esto memor benignitatis tuæ erga creaturam tuam. Ne memineris iræ adversus reum; sed memor esto miserationis tuæ adversus miserum. Obliviscere superbum offendentem, & respice miserum invocantem. Quid enim est Jesus nisi Salvator? Ergo ô Jesu propter te ipsum exurge in adjutorium mihi, & dic Animæ meæ: salus tua ego sum. Multum Domine de tua Bonitate præsumo; respice fragilitatem meam, ignosce malitiæ meæ. Parce ô Jesu, parce & miserere mei.

Supplicatio
 AD DEUM SPIRITUM
 SANCTUM.

Tu quoque ô Divini Amor Numinis,
 Patris Omnipotentis, Prolisque Beatissimæ, Sanctissima Communicatio, Omnipotens

potens Paraclite Spiritus Sancte. Moerentium solatium, Pater Clementissime, adesto mihi invocanti. Veni nunc veni dolentis animæ benignissime Consolator, in opportunitatibus & tribulatione adjutor. Veni mundator scelerum, veni fortitudo fragilium, releuator labentium. Veni humilium Doctor, superbiorum destructor. Veni orphanorum pius Pater. Veni spes pauperum, Refocillator deficientium. Veni navigantium tydus; naufragii Portus. Veni omnium viventium vita; Morientium unica salus. Veni sanctissime spiritus, veni & miserere mei. Sicut Patris creavit me Potentia; Filii redemit me pietas & sapientia; ita tua tibi propriissima parcat & misereatur mihi Clementia. Postula pro me ô spiritus dulcissime gemitibus tuis inenarrabilibus, & fac ut non peream, sed tecum vivam, & laudem te cum Patre & Filio in æternum, Amen.

ACTIO XIX.

*Ager Litanias de Domino Jesu devote
recitat vel recitari audit.*

Kyrieleyson Christeleyson Kyrieleyson
Christe

Christe audi nos. Christe exaudi nos.

Pater de Coelis Deus.

Fili Redemptor mundi Deus.

Spiritus Sancte Deus.

DEUS. Sancta Trinitas Unus Deus.

Qui sanas contritos corde.

Qui vulneras & mederis.

Qui mortificas & vivificas.

Qui deducis ad inferos & reducis.

Qui orantes in sua infirmitate curare consue-
visti.

Qui propter misericordiam tuam magnam,
salvos facis omnes sperantes in te.

DEUS. Qui Job ulcere pessimo percussum sanasti.

Qui Ezechiam ad te clamantem à morbo
liberasti.

Qui dæmonium à Sarra depulisti.

Qui Tobiam lumen coeli videre fecisti.

J E S U

Qui Chananæam pro filia deprecantem ex-
audisti.

JESU. Qui socrum Petri à febre liberasti.

Qui mulierem Spiritu infirmitatis annis octo-
decim inclinatam ad sanitatem perfectam
erexisti.

Qui filium Principis, jam mori incipientem
à febre salvasti.

JESU. Qui puerum Centurionis verbo sanasti.

Qui paralyticos & leprosos curasti & mundasti.

Qui à Spiritibus immundis vexatos & obsessos
liberasti.

Miserere nobis.

Miserere nobis.

Miserere nobis.

Miserere nobis.

Qui mulierem per tactum fimbriæ tuæ à sangui-
nis fluxu sanasti.

Qui surdos audire fecisti.

Qui claudis gressum restituiſti.

Qui mutorum ora aperuiſti.

JESU. Qui cæcos illuminasti.

Qui omnes infirmos & ægrotos tangendo
sanasti.

Qui omnes oneratos & laborantes reficiſti

Qui omnes languores nostros portaſti.

Qui filium mortuum Matri viduæ vivum re-
stituiſti.

Qui filiam Archi ſynagogi ad vitam revocaſti.

JESU. Qui Lazarum quadriduanum à mortuis re-
ſuscitaſti:

Qui ægrotos viſitaſti, & viſitantibus præmia
æterna promiſtiſti.

Qui per umbram Petri, multos ab infirmita-
tibus ſuis liberaſti.

Qui per ſudaria & ſemicunctia Pauli multos
infirmos curaſti.

JESU, Adjutor & protector noſter

JESU, ſuſceptor & liberator noſter,

JESU, Refugium noſtrum & Cornu ſalutis
noſtræ.

JESU, Fortitudo & patientia noſtra

JESU, Salvator & Redemptor noſtre.

Propitius eſto. Parce nobis JESU.

Propitius eſto. Exaudi nos JESU.

Propitius eſto. Libera nos JESU.

Miferere nobis.

Miferere nobis.

Miferere nobis.

Ab omni malo
 Ab omni peccato.
 Ab omni morbo & languore.
 Ab omni impatientia & pusillanimitate.
 A peste & omni contagione.
 Ab insidiis diaboli.
 A periculis mortis.
 A doloribus inferni.
 A subitanea, & improvisa morte.
 A damnatione perpetua
 Per tentationem tuam
 Per lacrymas & arumnas tuas.
 Per labores & defatigationes tuas.
 Per tristitiam & tædium tuum
 Per pavorem & mærorem tuum.
 Per famem & sitim tuam.
 Per agoniam & sanguineum sudorem tuum.
 Per SacroSancta Vûlnera tua.
 Per pretiosissimum sanguinem tuum.
 Per Crucem & Passionem tuam.
 Per mortem & sepulturam tuam.
 Per gloriosam Resurrectionem tuam.
 Per admirabilem Ascensionem tuam.
 In die iudicii.

PECCATORES. Terogamus audi nos.
 Ut nobis parcas.
 Ut nobis indulgeas.
 Ut spatium veræ pœnitentiæ nobis concedas.
 Ut compunctionem cordis & fontem lacry-
 marum nobis largiaris.

Libera nos JESU.

Libera nos JESU.

Terog. audi nos.

Ut

Ut nos visitare & consolari digneris.
 Ut sanitatem mentis & corporis nobis dones.
 Ut indulgentiam & remissionem omnium peccatorum nobis impertias.
 Ut gratiam & consolationem S. Spiritus infundas.
 Ut veram Christianam nobis patientiam tribuas.
 Ut in omni tribulatione nostra nobis succurras
 Ut nos in hora mortis, contra omnes insidias diaboli protegas.
 Ut nos in tua gratia mori, & ad finem usque perseverare facias.
 Ut extremis vitæ nostræ benedicas.
 Ut spiritum nostrum in manus tuas suscipias.
 Ut post obitum nostrum Paradisi januas nos gaudenter introire jubeas.
 Ut nos exaudire digneris.

Te rogamus audi nos.

Te rogamus audi nos.

JESU FILI DEI.

Agnus Dei qui tollis peccata mundi Parce nobis Jesu.

Agnus Dei qui tollis peccata mundi. Exaudi nos Jesu.

Agnus Dei qui tollis peccata mundi.

Miserere nobis Jesu.

Christe audi nos. Christe exaudi nos.

Kyrieleyson. Christeleyson. Kyrieleyson.

Pater noster &c.

Et ne nos inducas in tentationem.

sed libera nos à malo.

Salvos fac servos tuos.

Deus meus sperantes in te

Adjutor noster esto, ne derelinquas nos.

Neque despicias nos Deus, salutaris noster.
 Adjuva nos Deus auxiliator noster.
 Et propter gloriam nominis tui, libera nos.
 Domine exaudi orationem meam.
 Et clamor meus ad te veniat.

Oremus.

Deus humani generis benignissime
 Conditor & Milericordissime restaurator,
 qui hominem invidia diaboli ab æterna fe-
 licitate dejectum Jesu Christi Domini no-
 stri, pretioso sanguine redemisti; vivifica
 nos famulos tuos gratiæ tuæ vigore; & ja-
 centibus manuum porrige salutarem; reple
 nos gaudio cordis, & lætitiâ spiritûs; ex-
 pelle à nobis omnes hostiles insidias; &
 mitte nobis medicam salutis Angelum
 tuum sanctum qui nos in angustiis positos
 consoletur, atq; in omni adversitate pro-
 tegat, ut securi ex hac vita transeamus, &
 feliciter ad te perveniamus.

Imploramus Domine humiliter Miseri-
 cordiam tuam, quæ nobiscum sit semper,
 & animas nostras illæsas custodiat, gra-
 tiamque tuam quocunque insultu hostili
 nobis eripi non permittat. Suscipe ô Mife-
 ricordissime Deus præces nostras & præsta:

ut de omni aduersitate & angustia liberati,
incessabiliter in perpetua gratiarum
actione laudemus. Per Christum Deum
nostrum. Amen.

ACTIO XX.

*Infirmus implorat patrocinium Sanctis-
simæ Dei Matris Mariæ.*

Oratio I.

O Mater & Virgo Dulcissima. O Mater
Misericordissima. O Domina mea Cle-
mentissima. Ecce adsum ego servulus tuus,
cum intimo & devotissimo affectu cordis
mei. En humiliter projicio me ad sacratis-
simos pedes tuos, indignum scabellum pe-
dum tuorum. Quid aliud possum de Mise-
ricordissima Matre, & de Dulcissima Vir-
gine, nisi misericorditer & dulciter sentire,
in meum & omnium peccatorum solatium?
Esto ergo misericors mihi, & bona Mater
cordi meo semper. Precor te gloriosissima
Mater Dei Mariæ: quatenus ab hac præ-
senti hora usque ad extremum vitæ meæ
punctum, propitio ac sereno vultu, corde-
que dulcissimo, super me respicere non fa-
tigeris, sed in tuam custodiam me accipias

atq; sanctissima brachia tua super me mat-
 rinalium expendas. Cum autem venerit
 dies meus novissimus, & hora mortis me-
 tuenda valde, quam non possum præterire;
 ô Clementissima Domina, mea singularis
 fiducia in omni angustia, sed maxime in
 hora mortis meæ; tunc memento mei, &
 assiste fini vitæ meæ, consolando trepidan-
 tem animam meam: protege eam ab illis
 tetræ & immundis dæmonum spectris, as-
 sistendo ei cum multitudine Angelorum &
 sanctorum. Placare quoque digneris, mun-
 dissimis & pretiosissimis tuis precibus,
 priusquam decedam ex hac luce, Divinam
 faciem Filii tui; quem toties, & tam gravi-
 ter offendi peccatis meis. Statue me juxta
 te, & loquere ad Filium tuum, Judicem
 meum pro me verbum bonum, & suave.
 Post hæc suscipe enavigantē ex hoc exilio
 inopem animam meam: & introduce eam
 per portas Cœli, ad amœna Paradisi. Hono-
 ro te flexis genibus, inclino me tibi devotis
 nutibus, gratias tibi ago junctis manibus,
 commendo me tibi totis viribus, Et quam-
 diu possum saluto te cum Archangelo: Ave
 Maria gratia plena &c. Ora-

Oratio II.

Ave Maria, Ancilla & nobile Hospitium
 Sanctissimæ Trinitatis. Ave Maria,
 præelecta Filia Dei Patris. Ave Maria Spon-
 sa Spiritûs S. Ave Maria Mater Domini
 nostri Jesu Christi. Ave Maria soror Ange-
 lorum. Ave Maria, promissio Prophetarum.
 Ave Maria, Regina Patriarcharum.
 Ave Maria, Magistra Evangelistarum. Ave
 Maria, Doctrina Apostolorum. Ave Maria
 confirmatrix Martyrum. Ave Maria,
 fons & plenitudo confessorum. Ave Ma-
 ria, Decus & corona Virginum. Ave Maria,
 salus & consolatrix vivorum. Ave Maria
 vita mortuorum. Ave Maria, spes & fir-
 misimum refugium peccatorum, mecum
 sis in omnibus tentationibus, tribulatio-
 nibus, necessitatibus, angustis, infirmita-
 tibus meis; & maximè in hora mortis meæ
 ne desis mihi. Et impetra mihi omnium
 peccatorum veniam & Coelestis Patriæ
 Gloriam. Amen.

Hanc orationem, quicumque quotidie
 dixerit, sine poenitentia & sacramento
 corporis Christi non decedet sic fertur

revelatum S. Bernardo, cui ab Angelo data
fuit, Ex Hortulo Animæ. fol. 98.

Oratiunculæ III.

Pro felici morte.

I.

O Domina mea S. Maria, sicut Deus
Pater, per omnipotentiam suam, te po-
tentissimam effecit: ita mihi quæso adis
in hora mortis meæ, expellendo à me
omnem contrariam potestatem. Ave
Maria, gratia &c.

II.

O Domina mea S. Maria, sicut te Filius
Dei, tanta sui cognitione, & claritate do-
navit, ut totum Cœlum illumines: ita in
hora mortis meæ, animam meam cog-
nitione Fidei sic illustres, & corrobore, ut
nullo errore & ignorantia pervertatur.
Ave Maria gratia plena &c.

III.

O Domina mea S. Maria, sicut Spiritus S.
suum amorem tibi plenè infudit: ita in ho-
ra mortis meæ dulcedinem amoris Divini,
mihi instilla, ex qua mihi omnis amaritudo
reddatur suavissima. Ave Maria gratia
plena &c.

Ora-

Oratiunculas prædictas ipsamet beatissima Virgo sanctam Mechildem docuit, eique promisit in ipsius morte affuturam, si singulis diebus eas diceret, in fine cujuslibet addendo. Ave Maria gratia plena &c.

Ex magno Promptuario Corneri Ægid. Schitl. in suo mancip. Mariano.

LITANIÆ LAVRETANÆ.

De Beatissima Virgine MARIA.

KYrieleyson, Christeleyson Kyrieleyson.
Christe audi nos. Christe exaudi nos.

Pater de Cœlis Deus. Miserere nobis.

Fili Redemptor mundi Deus. Miserere nobis.

Spiritus S. Deus. Miserere nobis.

Sancta Trinitas unus Deus. Miserere nobis.

Sancta Maria. Ora pro nobis.

Sancta Dei Genitrix. Ora pro nobis;

Sancta Virgo Virginum.

Mater Viventium.

Mater pulchræ dilectionis.

Paradisus Voluptatis.

Lignum Vitæ.

Domus Sapientiæ.

Porta Cœli.

Desiderium Collium æternorum.

Civitas refugii.

Gloria Hierusalem.

Mater, Sanctæ spei

Ora pro nobis.

Sanctuarium Dei.
 Tabernaculum foederis.
 Altare thymiatis.
 Scala Jacob.
 Speculum sine macula.
 Liliū inter spinas.
 Rubus ardens incombustus.
 Vellus Gedeonis.
 Thronus Salomonis.
 Turris eburnea.
 Fanus distillans.
 Hortus Conclusus.
 Fons signatus.
 Puteus aquarum viventium.
 Navis institoris de longē portans panem
 Stella matutina.
 Aurora confurgens.
 Pulchra ut luna.
 Electa ut sol.
 Castrorum acies ordinata.
 Solum gloriæ Dei.
A cunctis periculis, tentationibus, & insultibus
 dæmonum. Libera nos gloriosa Virgo.
Ab ira Filii tui, & sententia damnationis æternæ.
 Libera nos gloriosa Virgo.
 Per immaculatam conceptionem tuam.
 Per desiderabilem Nativitatem tuam.
 Per admirabilem Annuntiationem tuam.
 Per purissimam Purificationem tuam.
 Per gloriosam Assumptionem tuam.
 Peccatores, Te rogamus audi nos.

Ora pro nobis. Ora pro nobis. Ora pro nobis. Libera nos gloriosa Virgo. Amen

- Ut veram poenitentiam nobis impetrare digneris.
- Ut Ecclesiae sanctae, cunctoque populo Christiano pacem & unitatem impetrare digneris.
- Ut nobis in hora mortis assistere digneris.
- Ut nos tunc in omnibus angustiis, pressuris, doloribus, & arumnis solari digneris.
- Ut in extremis vitae nostrae, nos ab insidiis & insidiis demonum defendere & liberare digneris.
- Ut Dulcissimum Filium tuum nobis placatum ostendere digneris.
- Ut nobis felicem exitum ex hac vita impetrare digneris.
- Ut omnibus fidelibus defunctis requiem aeternam impetrare digneris.

Mater Dei.

Agnus Dei qui tollis peccata mundi. Parce nobis Domine.

Agnus Dei qui tollis peccata mundi
Exaudi nos Domine.

Agnus Dei qui tollis peccata mundi.
Miserere nobis.

Christe audi nos. Christe exaudi nos, Kyrieleyson
Christeleyson Kyrieleyson.

Ora pro nobis S. Dei Genitrix.

Ut digni efficiamur promissionibus Christi.

Oremus.

O Maria Dei Genitrix dignissima, Virgo gratiosissima, omnium desolatorum ad te clamantium maximum solacium, per illa

I 7

gaudia

Te rogamus audi nos.

gaudia quibus repleta fuisti, dum Filium tuum Dulcissimum Jetum concepisti, in utero tuo sacratissimo portasti, genuisti, lactasti, educasti, eum miracula inaudita facere, & in eum homines, tanquam Deum verum credere vidisti: ac eum post mortem resurrexisse cognovisti, precor te: esto nunc consolatrix animæ meæ. Assiste mihi tanquam piissima mater, & adjuva me in omnibus doloribus, pressuris & angustis meis; & præsertim in ultima necessitate mea succurrere mihi. O Mater afflictorum non me deseras in hora mortis meæ. Et dum post mortem, in illo tremendo Filii tui iudicio, tremens totus stabo, tu ô Dulcissima Mater tuere me, defende me, responde pro me, ora pro me, intercede pro me: ut ob gratiam tui in æternum vivat anima mea.

ACTIO XXI.

Ager pro Patrocinio confugit ad SS. Angelos & suos Patronos. Ad S. Angelos.

O Sancte Angele mi Custos fidelissime, vosque purissimi Spiritus Cœlestes. S. Michaël,

chaël, S. Gabriel, S. Raphael, omnesque alii S. Angeli Dei, adeste benignissimi, & respicite in me. En jaceo gemens & suspirans. Mors mihi in oculis est; & mortalium nemo potest me juvare; sed vos potestis mihi succurre. O Angeli beatissimi, hominibus amicissimi, assistite quæso mihi migranti ex hoc seculo, & potenter eripite me ab immundorum spirituum insidiis & insultibus, animamque meam, in vestrum assumite consortium. Tu præcipuè Angele bone Custos meus in tota vita mea fidelissime, non me deseris in hoc tempore malo, horaque periculosissima sed omni diligentia gere curam mei finis. O vos omnes sanctissimi Angeli Dei, Vestris obsecro intercessionibus & armis defendite me, ut hostes mei canes infernales non mihi noceant, sed confusi discedant. Ah ne me deserite in his summis angustiiis meis, dum momentum illud imminet, à quo salus mea, aut perenne pender exitium. Ah juvate me. Ante Regem Regum, pro me supplices procumbite meumque mihi conciliate judicem. Supremam ego nunc expecto sententiam;

tentiam : Vos impetrate mihi eam ad vitam æternam.

Sancti Angli Custodes nostri, defendite nos in prælio, ut non pereamus in tremendo iudicio.

Ad S. Patronos.

O Sancti Patroni mei speciales N.N.N. quos in vita mea devoto affectu & servitio colui; omnes vos ardentissime invoco, & humiliter obsecro per amorem Dei, quo vos ille dilexit, & vos illum diligitis, adeste in conspectu Regis Cœlorum: & Vestris sanctis precibus ac meritis pro me intercedite, me juvate, protegite. Judicem Christum Jesum mihi placate; ut per ejus benignam sententiam, vobis annumerari dignus inveniar: atque ita summo bono in Cœlis frui, piissimumque Deum in æternum vobiscum laudare merear. Amen.

ACTIO XXII.

Ager implorat Misericordiam Dei.

Non intres in iudicium tuum cum servo tuo Domine; quia non justificabitur in conspectu tuo omnis vivens: sed miserere mei

mei Clementissime Deus, secundum magnam misericordiam tuam. Et secundum multitudinem Miserationum tuarum, dele iniquitatem meam.

Domine non secundum peccata mea quæ feci ego, neque secundum iniquitates meas retribuas mihi. Domine ne inemineris iniquitatum mearum antiquarum: cito anticipent me misericordiæ tuæ quia pauper factus sum nimis. Adjuva me Deus salutaris meus; & propter gloriam Nominis tui Domine libera me: & propitius esto peccatis meis propter nomen tuum.

Exaudi me Domine, quoniam benigna est Misericordia tua. Secundum multitudinem Miserationum tuarum respice me Domine. Multa sunt quidem, & valde gravia delicta mea: sed ostende in me divitias Bonitatis & Misericordiæ tuæ. Parce peccatis meis. Et erit tibi summa Gloria in æternis.

ACTIO XXIII.

Æger invocat auxilium Divinum.

Miserere mei Deus, miserere mei, quoniam
niam

niam in te confidit anima mea. Domine non confundar quoniam invocavi te. Ne derelinquas me Domine Deus meus; ne discesseris à me. Intende in adiutorium meum, Domine Deus salutis meæ.

In te Domine speravi non confundar in æternum: in iustitia tua libera me. Inclina ad me aurem tuam, accelera ut eruas me.

Esto mihi in Deum protectorem, & in locum refugii, ut saluum me facias. Quoniam fortitudo mea, & refugium meum es tu: & propter nomen tuum deduces me, & enutries me.

Educas me de laqueo hoc, quem statuerunt mihi: quoniam tu es protector meus. In manus tuas commendo spiritum meum: redemisti me Domine Deus veritatis. Deus in adiutorium meum intende: Domine ad adjuvandum me festina.

ACTIO XXIV.

Infirmus videns se deficere invocat adesse sibi Jesum & sanctissimam ejus Matrem.

Mane nobiscum Domine quoniam ad-
vesperascit & inclinata est jam dies.
Mane

Mane mecum Dulcissime Jesu, quoniam appropinquat nox; irruit horror & umbra mortis. Inclinata est valdè dies vitæ meæ. Defecerunt me non menses & dies, sed ipsæ horæ; defluunt & exhauriuntur momenta. Defecerunt vires meæ; sensus planè languidi. Amici & noti non prosunt quidquam. Sine te Dulcissime Jesu, nihil possum facere quod prosit saluti Animæ meæ, ac vitam meam feliciter finire. Quocirca Amabilissime Jesu veni, & mane mecum in fine vitæ meæ. Ostende te mihi benignum & sufficit mihi.

Audi & tu gemitus & dolores ultimos servuli tui Clementissima Domina, ac Dulcissima Mater mea Virgo Maria. Audi fons vitæ & veniæ, spes periclitantium, salus omnium in te sperantium. Ave gratia plena, Dominus tecum; & sicut est tecum, ita sit mecum; & tu ô Benignissima sis mecum.

Mortis hora Mater advenias
Pectus pro me Christo aperias
Et allega tot amicitias
Ut amore me dignum facias.
Ejus precor amore nimio
Qui se tibi dedit in gremio

Et quem carnis vestisti lilio
 Adsis mihi mortis in praelio.
 Summi Regis Mater & filia
 Cui nullus par est in gloria
 Tua Mater dulcis Clementia
 Sit tunc & nunc mihi propitia.
 Tunc assillas mecum in acie
 Et confringas conatus bestiae
 Ibi Matrem omnipotentiae
 Te declarans ; des regnum Gloriae.

ACTIO XXV.

*Ager amplexatur, & Osculatur affectuose
 membra Domini sui Crucifixi, pro venia
 peccatorum.*

Ex rythmis S. Bernardi.

Affectus

Ad Pedes.

Pedes tuos, plagas duras
 Et tam graves impressuras
 Circumplector cum affectu
 Tuo pavens in aspectu
 Tuorum memor Vulnerum.
 Quidquid est in me contractum
 Dissipatum aut distractum
 Dulcis Jesu, totum sana
 Tu restaura, tu complana
 Tam pio medicamine.

Te in cruce tua quaro.

Prout quaro corde mero.
Me sanabis hîc ut spero
Sana me & salvus ero
In tuô lavans sanguine.

Ad Genua.

Salve Jesu Rex. sanctorum

Spes votiva peccatorum.
Crucis ligno tanquam reus
Pendens homo verus Deus
Caducis nutans genibus.

O quam Pauper, ô quam nudus,

Qualis est in cruce ludus ?
Derisorum jocus factus.
Sponte tamen, non coactus
Attritus membris omnibus.

O Majestas infinita,

O egestas inaudita.
Quis pro tanta Charitate
Quærit te in veritate,
Dans sanguinem pro sanguine ?

Ad Manus.

Manus clavis perforatas

Et cruore purpuratas
Corde premo præ amore
Sitibunde bibens ore
Cruoris stillicidium.

Manus sanctæ uos amplector

Et gemendo condelector
Grates ago plagis tantis,

Clavis

Clavis duris, guttis sanctis
 Dans lacrymas cum osculis,
In cruore tuo lotum
 Me commendo tibi totum
 Tuæ sanctæ manus istæ
 Me defendant Jesu Christe.
 Extremis in periculis.

Ad Latius.

Salve latus Salvatoris
 In quo latet mel dulcoris
 Ex quo scatret fons cruoris
 Qui corda lavat sordida.
Ecce tibi appropinquo
 Parce Jesu si delinquo.
 Verecundâ quidem fronte
 Ad te tamen veni sponte
 Scrutari tua vulnera
Hora mortis meus flatus
 Intret Jesu tuum latus,
 Hinc expirans in te vadat
 Ne hunc leo trux invadat;
 Sed apud te permaneat.

Ad Pectus.

Salve salus mea Deus
 Jesu dulcis, amor meus.
 Salve pectus reverendum
 Cum tremore contingendum
 Amoris domicilium.
 Dulcis Jesu Christi pectus
 Tuo fiam dono rectus:

Absolutus à peccatis
Ardens igne Charitatis
Te amans super omnia.

Ave verum templum Dei.
Precor miserere mei.
Tu totius arca boni
Fac electis me apponi
Vas dives, Deus omnium.

Ad Cor.

Summi Regis cor aveto.
Te saluto corde lato.
Te complecti me delectat
Et hoc meum cor affectat
Ut ad te loquar animat.
Propter mortem quam tulisti,
Quando pro me defecisti.
Cordis mei cor dilectum,
Munda cor meum illectum
Dimittens mihi omnia.

Viva cordis voce clamo
Dulce cor namque te amo.
Ad cor meum inclinare
Ut te valeat amare
Debito tibi affectu.

Ad Faciem.

Salve caput cruentatum
Totum spinis coronatum
Congussatum, vulneratum
Arundine verberatum
Facie sputis illita.

Salve

Salve cuius dulcis Vultus,
Immutatus & incultus,
Immutavit suum florem
Totus versus in pallorem
Quem Cœli tremit Curia.

Sic affectus, sic despectus
Propter me sic interfectus
Peccatori tam indigno
Cum amoris interligno
Appare clara facie.

ACTIO XXVI.

*Æger Supplicat Domino, pro Venia
delictorum & salute.*

Supplicatio I.

O Amabilissime & Misericordissime Je-
su, per illas tristissimas horas, quibus
pendebas in cruce, & per illud totum mare
Passionis, & summæ amaritudinis tuæ, in
quo totus profundè immersus fuisti, me-
mento mei servi tui mali in Regno & ju-
dicio tuo, sicut memor fuisti Latronis te-
cum pendentis, & te confitentis. Nam
sicut ille, ita & ego magnus latro in te
credo, te confiteor, te Regem & Deum
prædico, tibi condoleo; te laudo, benedico,
amo, adoro, glorifico; ac pro peccatis meis
summæ

summè doleo. Sonet vox tua in auribus
meis; Vox tua dulcis, ut audiam ex ore tuo
dulcissimo: Hodie mecum eris in Paradiso.
Amen Amen. Fiat fiat Dulcissime Jesu.

Supplicatio II.

Ex Prosa Ecclesiæ pro Defunctis,

Rex tremendæ Majestatis
Qui salvandos, salvas gratis
Salva me fons pietatis.

Recordare Jesu pie
Quod sum Causa tuæ viæ
Ne me perdas illa die.
Quærens me sedisti lassus.
Redemisti crucem passus
Tantus labor non sit cassus.

Ingemisco tanquam reus
Culpa rubet vultus meus
Supplici parce Deus.

Iuste judex ultionis
Donum fac remissionis
Ante diem rationis.

Preces meæ non sunt dignæ
Sed tu Bonus, fac benignè,
Ne pereuni cremer igne.

Inter oves locum præsta.
Et ab hædis me sequestra,
Statuens in parte dextra.

Oro supplex & acclinis
Cor Contritum quasi cinis
Gere curam mei finis.

Supplicatio III.

Ex Rythmis S. Bernardi.

O Jesu ne me reum asperneris.

Nec indignum dedigneris

Morte mihi jam vicina

Ad me servum tu declina:

Benignus & Misericors

Tuæ sanctæ Passioni

Me gauderem interponi

In hac cruce tecum mori:

Præsta crucis amatori

Sub cruce tua moriat.

Morti tuæ tam amaræ

Grates ago Jesu chare

Qui es Clemens pie Deus.

Fac quod petit tuus reus

Ut absque te non finiar.

Dum me mori est necesse

Noli mihi tunc deesse.

In tremenda mortis hora:

Veni Jesu absque mora

Tuere me & libera.

Cum me jubes emigrare.

Jesu chare tunc appare:

O amator amplectende,

Te metipsum tunc ostende

In Cruce Salutifera. Amen.

ACTIO XXVII.

Egrotus peccatis suis territus, merum
desperationis de salute abjicit.

De.

Desperare utique potuiflem propter nimia peccata mea & infinitas negligentias meas. Sed desperare jam non audeo, neque ullo modo desperare debeo; sed sentio de Domino meo in bonitate: quia ego licet fim servus malus, tamen ille est Dominus summè bonus & Misericordissimus, qui dixit: Nolo mortem peccatoris, sed ut convertatur & vivat. Deinde quia nos omnes homines, cum inimici essemus, reconciliati sumus per mortem Filii Dei; quantò magis reconciliati, salvi fieri possumus per eum. Omnis namque spes, & totius fiduciæ certitudo mihi est in pretioso sanguine ejus qui effusus est propter nos, & propter salutem nostram. In ipso respiro, & in ipso confisus ad eum pervenire spero ac desidero non habens meam iustitiam, sed eam quæ est ex Domino nostro Jesu Christo. Non enim tam immitis est Deus, ut obliviscatur hominis, & non meminerit ipsius, quem ipse gestat, & quem mei causa suscepit. Nonne ille est, qui non venit vocare justos, sed peccatores? Nonne est ille, qui venit quærere, &

salvum facere quod perierat? Nonne est ille qui peccatores recipit, & conversatus est, atque manducavit cum illis? Nonne tot maximi peccatores per ejus Misericordiam, ac per ejus Passionem & mortem salvati sunt? Quocirca & ego me salvandum spero.

In Domino igitur confido; quomodo dicitis animæ meæ inimici mei: Euge, euge, devorabimus eam? Scio quia nullus speravit in Domino & confusus est. Et ego etiamsi occiderit me in ipso sperabo. Quis enim permansit in mandatis ejus & derelictus est? aut quis invocavit eum & despexit illum quoniam pius & Misericors est Dominus & remittet in die tribulationis; & protector est omnibus exquirentibus se in veritate. Audio à Sanctis Prophetis dici: Spera in Deo tuo semper; nam omnes qui sperant in eum non infirmantur. Bonus Dominus & confortans in die tribulationis, & sciens sperantes in se, Bonus Dominus sperantibus in eum; & animæ quærenti illum. Ergo in pace in idipsum, dormiam & requiescam: quoniam

tu Domine singulariter in spe constituisti me; Tu factus es spes mea, turris fortitudinis à facie inimici. Inhabitabo in tabernaculo tuo in lecula; protegar in velamento alarum tuarum, quies firmamentum virtutis, regimen ardoris, umbraculum meridiani, deprecatio offensionis & adiutorium casus, exaltans animam, & illuminans oculos; dans sanitatem & vitam & benedictionem, scilicet æternam.

ACTIO XXVIII.

*Ager morti proximus vivis sanis
valedicit.*

EGO moribundus contestor vos hodierna die de his:

1^{mo}. Quia pro peccatis meis, & offensis Divinis omnibus, sincerè & ex corde doleo. Et si quam diutissimè viverem, nunquam Deum offendere vellem.

2^{do}. Credo in Deum Trinum & unum. Credo in Christum Jesum Redemptorem meum Amabilissimum, Credens omnia quæ credit S. Mater Ecclesia Catholica Romana, Et in hac Fide & Ecclesia im-

mutabiliter morior. Hæreses omnes summè execror & abominor.

3to. Licet citatus ad Dei tribunal, rationem strictam redditurus de tot decadibus annorum, totus horreo ; nam ô quam horrendum est coram tanto Iudice stare, eique ad omnia respondere : tamen non despero, sed de venia, & indulgentia peccatorum meorum, firmissimam spem habeo. Nam licet ego sim servus infidus, damnosus, & improbus ; tamen Dominus Deus, est summè bonus, & infinitè misericors, condescens fragilitati, & parcens malitiæ humanæ.

4to. Deum summè bonum, & summum ac infinitum Bonum, Piusimum Patrem, & ineffabilem benefactorem meum, ex toto corde meo, & ex totis viribus meis diligo, laudo, benedico, adoro, glorifico : ipsumque ab omnibus Creaturis infinities amari, laudari, benedici, adorari glorificari exopto.

5to. Me in sanctissimam Dei Voluntatem totum plenissimè resigno. Bene valere, ægrotare ; vivere, mori : quomodo-

cun-

enique Deo placueris paratissimus. Fiat
Voluntas Dei.

6to. Vos omnes quotquot offendi dictis vel factis humiliter deprecor. Propter Dominum nostrum Jesum Christum, & Sanctissimam ejus Matrem, culpas meas, & offensas vestras, mihi condonate, & mihi ignoscite. Agnoscentem habetis reum & dolentem; atque hoc mihi, hinc abituro viaticum non negate. Et ego vicissim omnibus inimicis meis ex corde ignosco; injurias omnes mihi illatas, licet gravissimas condono. Sicut rogo & opto debita mea à Deo mihi dimitti, ita ego debitoribus meis me injuriantibus dimitto.

7mo. Vobis omnibus maximas ago gratias, quotquot mihi, præcipuè in hac infirmitate mea benefecistis: quotquot me, sive manu & opere, sive cura & consilio ac amore juvistis. Deus bonorum omnium fons inexhaustus, & amoris pelagus immensum, vicem reddat amoris nostro. Christus Jesus qui dixit: Quod uni ex minimis meis fecistis, mihi fecistis sit ipse vobis merces.

Et nunc commendo vos Deo, & Verbo

gratiæ ipsius. Ab hinc scio quia non videbitis faciem meam vivam me extincto, donec in extremo iudicii die; sed tamen mei meimentote; Deum pro anima mea exorate, eam in pœnis atrocissimis Purgatorii piis suffragiis juvate; præsertim vos Liberi & Amici mei, quos iterum rogo: Misere mini mei. Valete.

ACTIO XXIX.

Infirmus jam valde deficiens, Domino Deo reconciliatus, Sacramentis munitus, supplicat pro celeriori morte, auxilio, & salute sua.

Quid mihi jam ultra cum mundo Dulcissime Jesu? Tædet animam meam vitæ meæ. Cupio dissolvi & esse cum Christo. Ecce nec in Cœlis quidquam præter te volui. Veni ergo Domine Jesu si est voluntas tua, veni & noli tardare; relaxa facinora mea. Solve vincula: educ vin-
ctum de domo carceris, de lacu miseriæ, & de luto fecis. Expectans expectavi te; intende mihi & exaudi me. Noli me apud sæculum diutius relinquere. Satis sit quod
huc

huc usque certavi: quod tanto tempore
 exulavi: quod te frui non merui, nec facie
 ad faciem contemplari potui. Nunc optato
 concede mihi frui gaudio, quod nullo fi-
 nitur termino, nec ullo obnubilatur tædio.
 Ostende mihi faciem tuam, quam Angeli
 semper vident, & videre desiderant. Sonet
 vox tua in auribus meis, Vox illa tua dul-
 cis: sis mecum, & ego ero tecum? Revoca
 abjectum ad patriam & in pristinum gra-
 dum lapsum restitue. Veni Redemptor
 bone, fac me participem æternæ Gloriæ
 tuæ. Tempus est ut revertar ad te: tempus
 est, ut commendes corpus meum terræ,
 de qua sumptum est.

Recipe me ab hominibus; & sancto-
 rum tuorum me conjunge societatibus.
 Tædet me vitæ temporalis, sola dies me
 delectat æternæ claritatis. Non mihi ob-
 sistat in exitu de Aegypto serpens antiquus;
 non latret contra me in porta inimicus;
 non me terra ejus imago perterreat; non
 mortis horror conturbet: sed SS. Angeli
 tui fideliter mihiasillant, fortiter me ju-
 vent, viriliter protegant, blande, leniterq;

fulcipient, & ad Cœlestem Paradisum cum exultatione perducant. Assistat & Gloriosa Dei Genitrix Virgo Maria, & tota Cœlestis frequentia. Et tu Jesu bone & dulcis, agnosce me Creaturam tuam non à diis formatam, sed à te solo Deo vivo & vero. Agnosce Domine optime servum tuum, cujus delicta ne memineris; sed secundum abyssum Misericordiæ tuæ, ab omni reatu absolue me.

Redde mihi lætitiā vultus tui, & noli me reprobare à dilectis sanctis tuis: sed retracta & recordare ô Fili Dei, quia pretioso sanguine tuo me redemisti. Suscipe me in Misericordia & bonitate tua: quia desiderio desideravi apud te facere pascha. ô felix dies, quando veniam & apparebo ante jucundissimam faciem Domini mei. Eia veniat benedicta hora transitus mei ad Deum meum, quam tu mihi ô Jesu concede, ut te laudem in æternum.

ACTIO XXX.

Moribundus animam agens, sed sibi præsens & sensibus vicens devotè aspirat in suis angustiis.

Aspi-

Aspiratio 1ma.

Benignissime Domine Jesu, ecce puer & servus ac filius tuus, quem cum tantis doloribus in Cruce peperisti infirmatur, gemitque totus miserabilis, & non est qui juvet & consoletur eum; descende & veni ad eum priusquam moriatur. Tu eum visita, juva, consolare, protege ab omni malo & libera.

Aspiratio 2da.

Ne transi Misericordissime Samaritane, Dulcissime Jesu: en jaceo in via mortalitatis, semivivus relictus, totus doloribus & angustis plenus. Veni & miseri misere; oleum consolationis in vulnera mea infunde: atque accipe, & pone me in jumentum sanctissimæ Humanitatis tuæ; & porta me non jam in stabulum hujus miseræ vitæ, quod me relinquere jubes, sed in domum jucundissimæ mansionis tuæ; ut tibi gratias agam, & laudem te in æternum, pro tua piissima Misericordia tua, quam ostendisti super me.

Aspiratio 3tia.

O Jesu Pastor bone, qui te pro ovibus

tuis lupo infernali. totum opposuisti, & animam tuam pretiosissimam pro eis dedisti & ego ex his ovicula, quam cum tanto labore in mundo quæsiisti, te Amantissimum Pastorem quæro, ad te suspiro, te desidero, tuam opem imploro. Audi ergo oviculam flebiliter balantem, defende à lupo rabidissimo de corpore egredientem. Occurre te quærenti, adesto ad te confugienti, blandire te diligenti, da pabulum in coelesti ovili tuo esurienti.

Aspiratio 4ta.

Culpa rubet vultus meus Amantissime Pater, Deus Dulcissime; revertor enim ad te filius prodigus, pauper & nudus. Non sum dignus vocari filius tuus; nec sum dignus charitate tua paterna: quia me toties peccando à te elongavi, faciens placitam carnis luxuriosè vixi, substantiam à te acceptam dissipavi. Verum tu Pater piissime, recordare Miserationum tuarum; obliviscere insolentiæ meæ; delicta juventutis meæ ne memineris. Occurre & amplectere filium dolentem, & te deprecantem. Jube cito proferri stolam primam gratiæ & glo-

gloriæ tuæ, & indui me nudum. Jube dari calceamenta in pedibus meis, quibus decoratus, dignus inveniar ingredi palatium tuum. Jube dari in manum meam annulum principio & fine carentem felicissimæ æternitatis. Annumera me dilectis filiis & domesticis tuis, ut tecum & cum illis epuletur cum exultatione ineffabili, laudans & benedicens te in æternum.

Aspiratio 5ta.

O Amabilissime Jesu, piissime animarum zelator, qui ut eas in sponsas tuas ex nimio amore haberes, pro eis vitam profudisti, & eas tibi pretiosissimo sanguine, ac morte crudelissima emisisti; tibi quoque meam commendo animam. Tua ipsa propter amorem tui debuit esse sponsa: verum plus diligendo creaturam quam te, & peccando in te, heu facta est adultera, & meretrix Satanæ, atque indigna consortio & thalamo tuo, sed antro & societate in inferno dæmonis, cujus voluntatem fecit. Tu tamen benignissimus sponsus, ad te eam teste Propheta, prænimio amore vocasti dicens; Revertere ad me & ego te

sulciam : & in hujus Mysterii signum
vinculum matrimonii indissolubile consti-
tuit. Sulcipe ergo Dulcissime Je-su, pecca-
tricem animam meam, ad te revertentem,
pœnitentem, dolentem, culpam suam fa-
tentem & humillimè deprecantem : da ei
osculum dulcissimum, & introduce eam in
tuum thalamum æternæ jucunditatis.

Aspiratio 6ta.

Ad Beatissimam Virginem, per Anti-
phonam Ecclesiæ.

Salve Regina Mater Misericordiæ,
vita dulcedo, & spes nostra salve. Ad te
clamo miser & exul, filius Evæ. Ad te
suspiro gemens & amarè flens, in hac la-
crymarum valie, ac præsentia extrema an-
gustia ac necessitate mea. Eia ergo Advo-
cata nostra, illos tuos misericordes oculos
ad me converte. Et Jesum, benedictum
fructum ventris tui, post hoc exilium
mihi benignissimum ostende. O Clemens,
ô pia, ô dulcis Virgo Maria,

Aspiratio 7ma.

Cum osculis Crucifixi.

O Jesu dulcissime Passio tua confortet & de-
scendat me. O Jesu

O Jesu dulcissime, mors tua in æternum vivere faciat me.

O Jesu dulcissime, Aqua lateris tui lavet me.

O Jesu dulcissime Sanguis tuus dealbet & decoret me

O Jesu dulcissime, Corpus tuum reficiat & corroboret me.

O Jesu dulcissime, Anima tua Sanctissima sanctificet & grarum tibi reddat me.

O Jesu dulcissime, Trinitas tua salvet, & satiet me.

O Bone Jesu exaudi me.

Jesu intra Vulnera tua absconde me.

Jesu ne permittas me separari à te.

Jesu ab hoste maligno defende me.

Jesu in hora mortis meæ juva me.

Jesu post mortem jube me venire ad te.

Ut cum sanctis & electis laudem te.

Et sine fine amem, & glorificem te Amen.

Aspiratio 8va.

O Jesu adesto mihi in his meis maximis angustis, qui propter me in passione tua nimis angustatus fuisti. O Jesu libera me à potestate & incurso dæmonum, ad quorum potestatem debellandam in mundum venisti. O Jesu libera me ab omni cruciatus post mortem, qui pro me in passione, tam horrendè cruciatus fuisti. O Jesu libera me ab æterna morte, qui pro me morte Crudelissima & probrosissima mori dignatus es,

es. O Jesu da mihi vitam æternam, qui pro me Animam dulcissimam & vitam tuam preciosissimam posuisti.

Aspiratio 9na.

O nomen Jesu, nomen dulce. Nomen Jesu nomen delectabile. Nomen Jesu, nomen defendens & confortans. Quid enim est Jesus, nisi Salvator? Ei go ô Jesu, propter Nomen sanctum tuum esto mihi Jesus, & salva me; nec permittas me damnari, quem de nihilo creasti, & tam caro pretio redemisti.

Aspiratio 10ma.

O bone Jesu, ne perdat me iniquitas mea, quem fecit & refecit Bonitas tua. O Dulcis Jesu, agnosce me tuum plasma; & opus manuum tuarum non abjicias, nec permittas vas à te formatum converti in contumeliam æternam. O benignissime Jesu, miserere mei, dum tempus est miserendi; ne damnes me, cum erit tempus judicandi. Quæ utilitas tibi in sanguine meo, dum descendero in æternam corruptionem. Non mortui laudabunt te Domine; neque omnes qui descendunt in infernum.

Aspi-

Aspiratio una.

O Amabilissime Jesu. O Desideratissime Jesu. O Mitissime Jesu. O benignissime Jesu. O Jesu, Jesu Jesu permitte me intrare in numerum electorum tuorum. O Jesu salus in te credentium. O Jesu Vita in te sperantium. O Jesu solatium ad te confu-
gentium. O Jesu dulcis remissio delicto-
rum. O Jesu Fili hominis scilicet Mariæ,
rogo te per ubera sanctissimæ Matris tuæ;
per amabilissimam infantiam tuam, per
dulcissimam faciem tuam; per ærumno-
sam vitam tuam; per labores & dolores
tuos; per passionem & mortem tuam, mi-
serere mei. Libera me, protege me, salva
me ô fons pietatis.

Aspiratio 12ma.

Ad Sanctissimam Virginem
Dei Matrem.

O Mater dignissima Dei, Mater summi
Cælorum Regis & Judicis mei, loquere pro
me ad Filium tuum verbum bonum, & sal-
vus ero; nam non confundet faciem tuam,
sed dabit tibi Matri suæ dilectissimæ pe-
titionem cordis tui; non enim Filius hic

ne-

negabit, quidquid Mater postulabit. O
Mater dulcissima, tu es Puella inclyta, à
Deo omnibus præelecta, & ab eo nimis di-
lecta. Virgo in Domo Dei potentissima;
nam es Patris Filia charissima, Filii Mater
amabilissima, Spiritus S. sponsa gratissima,
gere curam salutis meæ. O Elther formo-
sissima, & Regi regum acceptissima; te
ille habere voluit & constituit, ut per te
populum suum ab æterna perditione libe-
raret, deprecare pro anima mea, & non
moriar, sed vivam in æternum.

Aspiratio 13^{ta}.

En morior Amantissime Jesu te jubente.
Sed ô Jesu mi Dulcissime, ô Dulcissime mi
Jesu, quis mihi det ut hac morte, immo
crudelissima martyrum morte moriar
pro te?

Aspiratio 14^{ta}.

O Jesu spes mea, vita mea, salus mea.
Tu es Jesus meus & omnia. Tu es Deus
meus & omnia, sine te crucior, in te refi-
cior ô Jesu mi. Sine te sitio, in te me satio
ô Jesu mi. O Jesu esto mihi propitius & da
mihi teipsum.

Aspi-

Aspiratio 15ta.

O Pater Cœlestis, Pater Misericordiarum, & Deus totius consolationis, respice in faciem Christi, dilectissimi Filii tui, pro me humiliati, exinaniti, percussi, ligati, vulnerati, consputi, alapizati, lacerati, occisi & ignominiosissimè mortui; & propter hæc amoris signa quæ in ejus passione mihi ostendisti, miserere mei, parce peccatis meis, & da mihi sortem cum filio tuo.

Aspiratio 16ta.

O Amor increate, Amor Dulcissime Spiritus S. O consolator optimè, Dulcis hospes animæ, Dulce refrigerium. O Lux beatissima, te mea sitit & quærit peccatrix & misera anima; adesto mihi, & tanquam piissima Mater, in judicio meo futuro, immensæ bonitatis & Clementiæ tuæ pallio, rege, & simul dele mea magna & innumera crimina.

Aspiratio 17ma.

O Jesu mi Dulcissime, spes suspirantis animæ, Te meæ quærunt lacrymæ; adesto mihi, parce mihi, & salva me.

Aspi-

Aspiratio 18ma.

O Deus Misericordissime, propter multitudinem peccatorum meorum, non audeo cum Publicano levare oculos meos in Coelum; sed cum eodem percutiens peccatus meum dico contritus; Deus propitius esto mihi peccatori. Tu Deus piissime, qui cor contritum & humiliatum non despicias, & meum non despicias, sed me justificatum in domum tuam intrare jubeas.

Aspiratio 19ma.

O Jesu mi Dulcissime qui pro me in Horto & in Cruce amarissimè agonizasti, rogo te per illum amorem, quem tunc erga homines habuisti: quatenus utraque agonia tua amarissima, consoletur & juvet me agonizantem in omnibus amaritudinibus & angustis meis; & det mihi feliciter finire vitam meam.

Aspiratio 20ma.

O Jesu Fili Dei, qui propter me in medio latronum, tanquam maximus latro in cruce pependisti, & expirasti; ut me ex latrone faceres Filium Dei, & cohæredem tuum Regni Cœlestis, deprecor, te ut
per

per hanc immentam ignominiam tuam;
me electis, & sanctis tuis in Coelo associa-
re digneris.

Aspiratio 21ma.

Eia Misericordissime Jesu illos tuos Mi-
sericordes oculos ad me converte; & te
mihi in judicio tuo benignum ostende.
O Clemens, ô pie, ô dulcis Fili Mariæ.

Aspiratio 22ma.

O Jesu Clementissime audi me gemen-
tem exaudi me deprecantem: & quia non
sum exaudiri dignus, en sanguis tuus co-
piosissimè effusus clamat pro me. Exaudi,
exaudi, Miserere mei & salva me.

Aspiratio 23ma.

O Jesu benignissime, scio quia juxta ver-
ba tua in manibus tuis descripsisti me. Cla-
vi & vulnera sunt literæ nominis mei.
Lege hanc scripturam; aspice manus tuas
clavis perforatas, & me à morte æterna
libera, ac à poenis quas pro peccatis merui
benignus absolve.

Aspiratio 24ma.

O Jesu Amabilissime, scio quia non me-
rui videri vultum tuum, nisi severum &
iratum

iratum propter peccata mea ; sed respice in faciem tuam, factam pro me pallidam, exhaustam, toties gravissimè percussam, contusam, lividam, consputam, vulneratam, sanguinolentam, languentem & emortuam ; & sic placare, atque mihi serenissimum & Clementissimum tuum vul-
tum ostende.

Aspiratio 25ma.

O Jesu Salvator Dulcissime , agnosco quia toties te gravissimè offendendo pro-
merui mortem æternam in inferno ; sed ecce mors tua sanctissima, quam sustinui-
sti pro me turpissimam, ignominiosissi-
mam, crudelissimam dolorosissimam,
amarissimam : propter hanc te obsecro,
da mihi ut non moriar in æternum, sed
tecum vivam in æternitate tua amantissima.

Aspiratio Vltima.

Educ Domine de custodia, & de tam
squalido carcere animam meam, ad con-
fitendum nomini tuo. Me expectant justī
donec retribuas mihi. Et ego in manus
tuas commendo spiritum meum Dulcis-
sime Jesu. Recipe & suscipe me, & da
mihi

mihi partem tecum; ut portio mea sit in terra viventium.

O Maria sis mihi nunc & post mortem propitia. Maria mater gratiæ, Mater Misericordiæ. Tu me ab hoste protege. Et hinc egressum suscipe.

Subvenite Sancti Dei. Occurrite Angeli Domini. Adeste & juvate sancti Patroni mei.

O Jesu, sis mihi Jesus. Jesus, Jesus Jesus? Jesus MARIA.

ACTIO XXXI.

Adstantes orant devotè pro servo

Agonizante.

Scribit Olaus Magnus Lib. 2 I. cap. I. in Oceano Norvegiano reperiri quoddam genus seu speciem Piscium, faciem humanam habentium, quorum tanta est inter se amicitia, & innatus amor: ut dum aliquis ipsorum á nautis capiatur strepens, & certis signis se captum esse ostendens, continuò reliqui omnes ejusdem speciei pisces catervatim accurrant, fremant, captivum piscem tanquã fratrem vel tororẽ juvare, & eliberare totis viribus contendant:

in tantum ut etiam cymbam cum nautis
sint everfuri, donec captivum libertati &
saluti restituant. Ubi autem captivus piscis,
liber in mare abire permittitur, conqui-
escit totius illius gregis piscium furor. Et
nonne major debet esset amor & intimus
affectus piscium rationalium inter se, qui
in aquis sacri Baptismatis in Spiritu Deo
nati sunt, Christianorum scilicet fidelium
Catholicorum. Ergo dum hic aliquis piscis
ab inevitabili piscatore videlicet Morte
capitur; ac morbis, doloribus angustiis
extremis affligitur, ac in periculo maximo
salutis versatur, cæteri pisces liberi, fideles
fani debent accurrere in subsidium capti,
scilicet agonizantis: moribundum non
tanquam oves moribundæ circumstare,
vel solum flere; sed cum, piis exhorta-
tionibus (si est capax allocutionis) juvare,
pro eo Deum devotè & instanter exorare,
sanctissimam Dei Matrem, aliosque san-
ctos, ut ei adsint invocare; ut securus hinc
migret, & tandem salute æterna potiatur.

Oratio ima.

Imploramus Misericordissime Deus
im-

immensam Clementiam tuam : & pro tua pietate aures benignissimæ Misericordiæ tuæ precibus nostris licet indignis, quas coram tua Divina Majestate effundimus pro salute hujus miseri agonizantis fratris nostri N. Miserere Piissime Domine famulo tuo ; & eum extremis afflictionis, angustiiis & periculis laborantem juva, defende, solare, benignè suscipe, à peccatis clementer absolve ; & tandem in Paradisi deliciis eundem propitius respirare concede ; per abyssum Misericordiæ tuæ. Miserere Domine Jesu, Miserere ; Miserere famulo tuo, quem tuo sanguine redemisti Christe, & ne in judicio tuo, ac in æternum irascaris ei : sed ei benignissimam ostende faciem, ac in domum tuam æternæ felicitatis suscipe. Amen Amen.

Oratio 2da ad Deum Patrem

O Pater, æterne Deus, Pater Misericordiarum, & Deus totius consolationis, tuam deprecamur Divinam bonitatem, per viscera Misericordiæ tuæ & charitatem quam habes erga genus humanum ut pro eo redimendo Unigenitum tuum filium dares

L

in

in mortem crudelissimam ; deprecamur pro hoc famulo tuo. Ostende ô Pater Clementissime in hac hora pietatis tuæ abyssum ; & ostende charitatis tuæ dulcedinem in hanc Creaturam tuam , quæ nunc ad te Patrem spirituum redit. Ostende illi lucem Miserationum tuarum , confortamentum illius in te , intellectum ejus illumina , voluntatem inflamma , ac penes te summum bonum conserva. Protege eum ab omni adversa potestate , à tentationibus Satanz , & ab omni occurſu malo. Nota secundum peccata ejus judices eum , sed secundum multitudinem Miserationum tuarum indulge illi & parce : spiritum ejus in sanctissimæ dilectionis tuæ brachia suscipe. Hoc à te humiliter poscimus per Unigenitum Filium tuum , Dominum nostrum Jesum Christum , per passionem & sanguinem ejus , per mortem & omnia merita illius , cum quo & Spiritu S. vivis & regnas in æternum unus & summus Deus.

Oratio 3^{ta} ad Deum Filium.

Supplicamus prostrati ô Fili Dei , & noster Domine Jesu Christe per temetipsum qui

qui es propitiatio pro peccatis nostris; per
 charitatem ineffabilem quâ nos miseros
 homunciones dilexisti, ut propter nos sal-
 vandos in mundum descenderes, homo
 factus, caro nostra, & frater noster fieres,
 nos sanguine tuo & morte turpissima &
 crudelissima redimeres; per merita tua,
 & omnia beneficia sanctissimæ incarnatio-
 nis tuæ & Redemptionis nostræ à te nobis
 præstita; nec non per Dilectissimam tibi
 Matrem tuam Deigenitricem Mariam,
 ac per merita & dolores ejus quos te pa-
 tiente, præsertim tempore mortis tuæ ama-
 rissimæ passa est; supplicamus pro agoni-
 zante famulo tuo & fratre nostro. Præpara
 ô Misericordissime Jesu, animam ejus, non
 ad iratam sed ad benignam videndam fa-
 ciem tuam; converte cor ejus ad te, ut sine
 vero dolore, pro peccatis ac ardenti amore
 tui ex hac vita non decedat. Mitte ei ô Dul-
 cissime salvator hac horâ pro itinere tam
 periculoso auxilium gratiæ, à throno glo-
 riæ tuæ; manus tua fortis deducat eum se-
 curum ad te, Passio tua confortet eum,
 merita tua suppleant omnem defectum

ejus, mors tua crudelissima efficiat ut in
iudicio tuo audiat ex ore tuo dulcissimo
decretum desiderabile: Vivat hæc anima
& non moriatur. Amen Amen. Fiat fiat
Misericordissime Jesu.

Oratio 4ta ad Deum Spiritum S.

O Spiritus sancte unus & verus cum
Patre & Filio Deus, qui es fons bonitatis
& omnis veræ dulcedinis, obsecramus te
per immensam charitatem tuam quâ man-
sionis tuæ dignos visitare, moestosque &
afflictos consolari soles. Adesto huic fa-
mulo tuo & fratri nostro undequaque af-
fecto & angustiato. Sentiat anima ejus
tuam piissimam Clementiam, dulcedinem
& propitiationem; Conforta & erige eum
contra omnia adversa, præsertim contra
tremendam dæmonum potentiam. Mitte
in eum divinæ lucis tuæ radium, ad depel-
dam omnem tenebrarum Caliginem.
Emolli durum cor ejus, & tange illud do-
lore vero pro peccatis, atq; vulnera ignito
relo amoris Dei. Effunde in animam illius
divitias gratiæ tuæ; riga eam ubere lacry-
marum imbre, ut contrita & lota, inereatur
pura

pura ad suum purissimum venire principium, Deum Creatorem. Amen.

LITANIAE

De Domino *I E S U* Christo.

Pro Agonizante.

KYrieleyson. Christeleyson. Kyrieleyson
Christe audi nos. Christe exaudi nos.

Pater de Coelis Deus.

Fili Redemptor mundi Deus.

Spiritus Sancte Deus.

Sancta Trinitas unus Deus.

Jesu Fili Dei vivi.

Jesu potentissime

Jesu Fortissime.

Jesu Perfectissime,

Jesu Gloriosissime.

Jesu Jucundissime.

Jesu Charissime.

Jesu Clarius sole,

Jesu Pulchrior luna.

Jesu Splendidior stellis.

Jesu Admirabilis.

Jesu Delectabilis.

Jesu Honorabilis.

Jesu Humillime.

Jesu Pauperrime.

Jesu Mitissime.

Jesu Patientissime.

Jesu Obedientissime.

Miserere nobis.

Miserere nobis.

JESU, Castissime.

Amator castitatis.

Amator pacis.

Amator nostrer.

Speculum Vitæ.

Exemplar virtutum.

Decus niorum.

Zelator animarum.

Refugium nostrum.

Pater pauperum.

Consolator afflictorum.

Thesaurus fidelium.

Gemina pretiosa.

Armarium perfectionis.

Bone pastor ovium.

Stella maris.

Lux vera.

Sapientia æterna.

Bonitas infinita.

Gaudium Angelorum.

Rex Patriarcharum.

Inspirator Prophetarum.

Magister Apostolorum.

Doctor Evangelistarum.

Fortitudo Martyrum.

Lumen Confessorum.

Sponse Virginum.

Corona Sanctorum omnium.

Propitius esto. Parce nobis Jesu.

Propitius esto. Exaudi nos Jesu.

Miserere nobis.

Miserere nobis.

Miserere nobis.

Ab

Ab omni malo. Libera nos Jesu.
 Ab omni peccato.
 Ab ira tua.
 Ab insidiis diaboli.
 Ab incurſu omnium malorum.
 A ſententia tua terribili.
 A damnatione æterna.
 A morte perpetua.
 Per Viſcera Miſericordiæ tuæ.
 Per incarnationem tuam.
 Per Nativitatem tuam.
 Per Circumciſionem tuam.
 Per Sanctiſimum Nomen tuum.
 Per amabiliſſimam infantiam tuam.
 Per labores tuos.
 Per dolores tuos.
 Per lacrymas tuas.
 Per flagella tua.
 Per livores tuos.
 Per vulnera tua.
 Per Sanguinem tuum.
 Per totam Paſſionem tuam.
 Per Crucem & mortem tuam.
 Per Reſurrectionem tuam.
 Per Aſcenſionem tuam.
 Per Gaudia tua.
 Per Gloriam tuam.
 Per Dulciſſimam Virginem Matrem tuam.
 Per interceſſionem SS. omnium.
 Peccatores. Te rogamus audi nos.

Ut nobis parcas, Te rogamus audi nos.
 Ut nobis indulgeas. Te rogamus audi nos.
 Ut nobis in agone mortis benignè assistere digneris.
 Te rogamus.

Ut Nomen tuum sanctissimum Jesu viventes &
 morientes in corde & ore habeamus. Te
 rogamus.

Ut semper benignissime Jesu, sis nobis Jesus. Te
 rogamus audi nos.

Agnus Dei qui tollis peccata mundi. Parce nobis Jesu
 Agnus Dei &c. Exaudi nos Jesu.

Agnus Dei &c. Miserere nobis Jesu.

Jesu Christe audi nos. Jesu Christe exaudi nos.

Kyrieleyson. Christeeleyson. Kyrieleyson.

Pater noster &c. Et ne nos inducas in tentatio-
 nem sed libera nos à malo.

Exurge Christe adjuva nos.

Et libera nos propter Nomen tuum.

Domine exaudi orationem nostram

Et clamor noster ad te veniat.

Oremus.

Christe Jesu Crucifixe, in unione ferven-
 tissimi amoris, qui te vitam omnium vi-
 ventium in cruce mori coegit, pulsamus
 ad medullam benignissimi cordis tui, &
 rogamus, ut animæ famuli tui, fratris no-
 stri N. peccata omnia dimittas, & tua san-
 ctissima conversatione, & tuæ acerbissimæ
 Passionis merito omnia ejus suppleas, eum-
 que

que super abundantissimam miserationum
 tuarum multitudinem facias experiri, nos-
 que omnes, & singulariter hunc fratrem
 nostrum N. quem proximè vocare disp o-
 nis, placido tibi modo præpares, eiq; præ-
 stes, ut cum vera poenitentia, perfecta in
 tuam voluntatem resignatione, plena pec-
 catorum remissione, validissima fide, spe
 firma, charitate perfecta, in dulcissimum
 amplexum, & suavissimum osculum tuum
 feliciter ad tuam æternam laudem expiret.

Eia Dulcissime Redemptor, Domine
 Jesu per illas lacrymabiles voces, quas in
 Cruce moriturus edidisti, & Passionis do-
 loribus consumptus dixisti: Deus meus,
 Deus meus ut quid me dereliquisti, ne
 quæsumus longè facias à famulo tuo fratre
 nostro N. tuæ miserationis auxilium; nam
 ille in hac hora, & momento extremæ af-
 flictionis præ defectione animæ, & con-
 sumptione spiritus te invocare non valet.
 Per triumphum Sanctæ Crucis, & per
 mortis, Passionisque tuæ infinitum meri-
 tum cogita Domine de eo cogitationes
 pacis, & non afflictionis, sed misericordiæ

& consolationis. Libera eum de omnibus angustis; & tuis sanctissimis manibus, quas pro eo nobisque omnibus in cruce clavis affigi permisisti, Jesu bone, & amantissime Pater erue eum à tormentis illi debitis; & perduc illum in Requiem æternam. Amen.

LITANIE

*De Beatissima Virgine, Marre Dei
Maria, Communes.*

Kyriceleyson. Christeeleyson. Kyriceleyson.
Christe audi nos. Christe exaudi nos.
Pater de Coelis Deus. Misere nobis.
Fili Redemptor mundi Deus. Misere nobis.
Spiritus S. Deus. Misere nobis.
Sancta Trinitas unus Deus. Misere nobis.
Sancta Maria.
Sancta Dei Genitrix.
Sancta Virgo Virginum.
Mater Christi.
Mater divinæ gratiæ.
Mater purissima.
Mater Castissima.
Mater inviolata.
Mater intemerata.
Mater amabilis.
Mater admirabilis.
Mater Creatoris.

Ora pro nobis

Mater

Mater Salvatoris.
 Virgo prudentissima.
 Virgo Veneranda.
 Virgo Prædicanda,
 Virgo Potens.
 Virgo Clemens.
 Virgo fidelis.
 Speculum Justitiæ.
 Sedes Sapientiæ.
 Causa nostræ lætitiæ.
 Vas spirituale.
 Vas honorabile.
 Vas insignis devotionis.
 Rosa mystica.
 Turris Davidica.
 Turris eburnea.
 Domus aurea.
 Fœderis arca.
 Janua Cœli.
 Stella matutina.
 Salus infirmorum.
 Refugium peccatorum.
 Consolatrix afflictorum.
 Auxilium Christianorum.
 Regina Angelorum.
 Regina Patriarcharum.
 Regina Prophetarum.
 Regina Apostolorum.
 Regina Martyrum.
 Regina Confessorum.

Ora pro nobis.

Ora pro nobis.

Ora pro nobis.

Regina Virginum. Ora pro nobis.
 Regina SS. omnium. Ora pro nobis.
 Spes periclitantium. Ora pro nobis.
 Advocata reorum. Ora pro nobis.
 Agnus Dei qui tollis peccata mundi. Parce nobis Dn.
 Agnus Dei &c. Exaudi nos Domine.
 Agnus Dei &c. Miserere nobis.
 Christe audi nos. Christe exaudi nos.
 Kyrieleyson, Christeleyson. Kyrieleyson.

Supplicatio.

Sub tuum præsidium confugimus Sancta Dei Genitrix. Noltras deprecationes ne despicias in necessitatibus; sed à periculis cunctis libera nos, & præcipuè hunc extremè laborantem & deficientem fratrem nostrum N. Virgo semper gloriosa & benedicta Tuus ille fuit famulus & devotus amator ô Virgo amabilissima, igitur adesto Clementissima Domina servulo tuo summe indigenti, & gravissime periclitanti. Tuus est ille filius, quem cum tantis doloribus sub cruce, una cum moriente Filio tuo perperisti. Monstra te ergo esse Matrem, ô benedicta Mater. Sumat per te preces pro eo salvando, qui propter illum, tuus esse voluit Filius, atque mori crudelissime dignatus est.

Antiphona.

Stella Cœli reparavit quæ lactavit Dominum Vitam nobis, quam perdidit primus parens hominum. Ipsa stella nunc dignetur Jesum nobis placare. Quem peccatis offendimus, ut nos velit Salvare. O piissima stella maris à morte æterna succurre nobis. Audi nos Domina, nam Filius tuus, nihil negans te honorat. Salva nos Jesu, pro quibus, Virgo Mater te orat.

Ora pro nobis S. Dei Genitrix.

Ut digni efficiamur promissionibus Christi.

In omni tribulatione & angustia nostra.

Succurre nobis piissima Virgo Maria.

Domine exaudi orationem meam.

Et clamor meus ad te veniat.

Oremus.

Deus Misericordiæ Deus pietatis, Deus indulgentiæ qui misertus es super æternam perditionem generis humani; & propter hominem voluisti in mundum descendere, humiliari, adversa quæque pati, tormentis cruciari, morte crudelissima & ignominiosissima mori: quique super miseriam hominis toties flevisi; & misericordiâ motus, matri filium mortuum

fienti dixisti : Noli flere ; ac languente & deficiente populo devoto indoluisti dicens Misereor super turbam. Ob viscera illius misericordiae tuæ : & ob amorem illius stellæ glorioſæ, dulciſſimæ tuæ Matris cuius ubera pretioſa, contra venenum peccatorum noſtrorum, quam dulciter ſuxiſti, præſta auxilium gratiæ tuæ huic agonizanti famulo tuo, fratri noſtro N. , ut in ſuis extremis, & maximis anguſtiis, à te miſericordiſſimo Domino reficiatur, adjuvetur, ab inſultibus diaboli protegatur, in iudicio tuo, à ſententia mortis & perditionis æternæ incurſu liberetur, ac tandem in æternum miſericorditer ſalvetur. Per te Jeſu Chriſte, Rex Gloriæ. Qui vivis & regnas in ſecula ſeculorum. Amen.

Antiphona,

Qui paſſus es pro nobis, Jeſu Chriſte miſerere nobis. Qui paſſus es pro nobis Jeſu Chriſte miſerere nobis. Qui paſſus es pro nobis Jeſu Chriſte miſerere nobis.

Exurge Chriſte adjuva nos.
Et libera nos propter nomen tuum.
Domine exaudi orationem noſtram.
Et Clamor noſter ad te veniat,

Ore

Oremus.

Pie Jesu Domine, per amarissimam
utramque agoniam tuam, quam sustinuit
in Horto & Cruce; & per sanguinem tuum
quem utrobique copiosissimè effudisti,
dele hujus famuli tui, & fratris nostri N.
agonizantis omnia peccata ejus.

Pater noster &c. Ave Maria &c.

Pie Jesu Domine, per acerbissimas poenas
tuas, totamq; Passionem & mortem tuam,
libera hunc famulum tuum, & fratrem no-
strum N. agonizantem ab omnibus poenis,
quas pro suis peccatis meruit.

Pater noster &c. Ave Maria &c.

Pie Jesu Domine, per charitatem tuam
immensam, quam ostendisti erga nos in
Redemptione nostra, aperi huic famulo
tuo, & fratri nostro N. agonizanti, januas
Cœlestis paradisi post mortem; & cum
sanctis tuis dona ei requiem sempiternam.

Pater noster &c. Ave Maria &c.

Hanc oratiunculam trinam, profuisse ad
salutem cuidam Papæ scribit Augustinus
Palaminus Ordinis; Prædicatorum. Et
contigisse Anno 1610. Nam propter pri-
mam

nam Christus prædicti Papæ delevit omnia
ejus peccata. Propter secundam, remisit
pœnas pro peccatis debitas. Propter ter-
tiam Coelum ipsi aperuit. Ita ille. Piè
credendum, & effectus orationis intensis-
simo amoris affectui adscribendus.

ACTIO XXXII.

seu

*Commendatio Animæ Communis ex Bre-
viario Romano.*

LITANIÆ.

KYrieleyson, Christeeleyson, Kyrieleyson
Sancta Maria. Ora pro eo.
Omnes SS. Angeli & Archangeli. Orate pro eo.
Sancte Abel. Ora pro eo.
Omnis chorus iustorum. Ora pro eo.
Sancte Abraham. Ora pro eo.
Sancte Joannes Baptista. Ora pro eo.
Omnes Sancti Patriarchæ & Prophetæ. Orate pro eo
Sancte Petre. Ora pro eo.
Sancte Paule. Ora pro eo.
Sancte Andrea. Ora pro eo.
Sancte Joannes. Ora pro eo.
Omnes Sancti Apostoli & Evangelistæ. Orate pro eo.
Omnes Sancti Discipuli Domini. Orate pro eo.
Omnes Sancti Innocentes. Orate pro eo.
Sancte Stephane. Ora pro eo.

Sancte

Sancte Laurenti. Ora pro eo.
 Omnes S. Martyres. Orate pro eo.
 Sancte Sylvester. Ora pro eo.
 Sancte Gregori. Ora pro eo.
 Sancte Augustine. Ora pro eo.
 Omnes SS. Pontifices & Confessores. Orate pro eo.
 Sancte Benedicte. Ora pro eo.
 Sancte Francisc. Ora pro eo.
 Omnes SS. Monachi & Eremitæ. Orate pro eo.
 Sancta Maria Magdalena. Ora pro eo.
 Sancta Lucia. Ora pro eo.
 Omnes Sanctæ Virgines & Viduæ. Orate pro eo.
 Omnes SS. & Sanctæ Dei. Intercedite pro eo.
 Propitius esto. Parce ei Domine.
 Propitius esto. Libera eum Domine.
 Propitius esto. Libera eum Domine.
 Ab ira tua. Libera eum Domine.
 A periculo mortis. Libera eum Domine.
 A mala morte. Libera eum Domine.
 A poenis inferni.
 Ab omni malo.
 A protestate diaboli.
 Per Nativitatem tuam.
 Per Crucem & Passionem tuam.
 Per mortem & sepulturam tuam.
 Per gloriosam Resurrectionem tuam.
 Per admirabilem ascensionem tuam.
 Per gratiam Spiritus S. Paracliti.
 In die iudicii.
 Peccatores. Te rogamus audi nos.

Libera eum Domine.

Ut ei parcas. Te rogamus audi nos.
Kyrieleyson. Christeleyson. Kyrieleyson:

Orationes.

*Dum in agone sui exitus anxietur
anima.*

Proficiscere anima Christiana de hoc mundo in nomine Dei Patris omnipotentis qui te creavit: in nomine Jesu Christi Filii Dei vivi qui pro te passus est: in nomine Spiritus S. qui in te effusus est: in nomine Angelorum & Archangelorum: in nomine Thronorum & Dominationum: in nomine Principatum & Potestatum: in nomine Cherubim & Seraphim: in nomine Patriarcharum & Prophetarum: in nomine Sanctorum Apostolorum & Evangelistarum: in nomine SS. Martyrum & Confessorum: in nomine SS. Monachorum & Eremitarum: in nomine sanctarum Virginum & omnium sanctorum & sanctarum Dei. Hodie sit in pace locus tuus; & habitatio tua in sancta syon. Per eundem Christum Dominum nostrum. Amen.

Oratio.

Deus Misericors, Deus Clemens, Deus
qui

qui secundum multitudinem miserationum tuarum, peccata poenitentium deles, & prætorum Criminum culpas veniam remissionis evacuas: respice propitius super hunc famulum tuum N. & remissionem omnium peccatorum suorum, tota cordis confessione poscentem deprecatus exaudi. Renova in eo piissime Pater, quidquid terrena fragilitate corruptum, vel quidquid diabolica fraude violatum est: & unitati corporis Ecclesiæ, membrum redemptionis annecte. Miserere Domine gemituum, miserere lacrymarum ejus: & non habentem fiduciam nisi in tua misericordia, ad tuæ Sacramentum reconciliationis admitte. Per Christum Dominum nostrum. Amen.

Commendo te Omnipotenti Deo charissime frater, & ei cujus es Creatura committo: ut cum humanitatis debitum morte interveniente persolveris, ad authorem tuum, qui te de limo terræ formaverat revertaris. Egressi itaque animæ tuæ de corpore, splendidus Angelorum coetus occurrat: Judex Apostolorum tibi senatus ad-

adveniat: Candidatorum tibi Martyrum triumphator exercitus obviet, liliata rutilantium te confessorum turma circumdet: jubilantium te Virginum chorus excipiat, & beatæ quietis in sinu Patriarcharum te complexus altringat: mitis atque festivus Christi Jesu tibi aspectus appareat, qui te inter assistentes tibi jugiter interesse decernat. Ignoret omne quod horret in tenebris, quod stridet in flammis, quod cruciat in tormentis. Cedat tibi teterrimus satanas cum satellitibus suis; in adventu tuo te comitantibus Angelis contremiscat, atque in æternæ noctis chaos immane diffugiat. Exurgat Deus & dissipentur inimici ejus, & fugiant qui oderunt eum à facie ejus sicut deficit fumus deficiant; sicut fluit Cera à facie ignis, sic pereant peccatores à facie Dei: & justī epulentur & exultent in conspectu Dei. Confundantur igitur & erubescant omnes tartareæ legiones, & ministri Satanæ iter tuum impedire non audeant. Liberet te à Cruciatu Christus, qui pro te Crucifixus est. Liberet te ab æterna morte Christus, qui pro te mori

mori dignatus est. Constituat te Christus Filius Dei vivi intra Paradisi sui semper amœna virentia, & inter oves suas te verus ille Pastor agnoscat; ille ab omnibus peccatis tuis te absolvat; atque ad dexteram suam in electorum suorum te sorte constituat. Redemptorem tuum facie ad faciem videas, & præsens semper assistens, manifestissimam beatis oculis aspicias veritatem. Constitutus igitur inter agmina beatorum contemplationis divinæ dulcedine potiaris in secula seculorum. Resp. Amen.

Oratio.

Suscipe Domine servum tuum in locum sperandæ sibi salvationis à Misericordia tua. Resp. Amen.

Libera Domine animam servi tui ex omnibus periculis infirmi & de laqueis poenarum, & ex omnibus tribulationibus. Resp. Amen.

Libera Domine animam servi tui sicut liberaisti Enoch & Eliam de communi morte mundi. Resp. Amen.

Libera Domine animam servi tui, sicut liberaisti Noe de diluvio. Resp. Amen.

Libera Domine animam servi tui, sicut liberaſti Abraham de Vir Chaldaeorum. Resp. Amen.

Libera Domine animam servi tui, sicut liberaſti Job de paſſionibus ſuis. Resp. Amen.

Libera Domine animam servi tui, sicut liberaſti Iſaac de hoſtia, de manu Patris ſui Abrahæ. Resp. Amen.

Libera Domine animam servi tui, sicut liberaſti Loth de Sodomis & de flamma ignis. Resp. Amen.

Libera Domine animam servi tui, sicut liberaſti Moyſen de manu Pharaonis, Regis Ægyptiorum. Resp. Amen.

Libera Domine animam servi tui, sicut liberaſti Danielelem de lacu leonum. Resp. Amen.

Libera Domine animam servi tui, sicut liberaſti tres pueros de camino ignis ardentis & de manu Regis iniqui. Resp. Amen.

Libera Domine animam servi tui, sicut liberaſti Suſannam de falſo crimine. Resp. Amen.

Libera Domine animam servi tui, sicut liberaſti David, de manu Regis Saul & de manu Goliæ. Resp. Amen.

Libera Domine animam ſervi tui, ſicut liberaſti Petrum & Paulum de Carceribus. Resp. Amen.

Et ſicut beatiffimam Theclam Virginem & Martyrem tuam de tribus atrociffimis tormentis liberaſti, ſic liberare digneris animam huius ſervi tui & tecum facias in bonis congaudere Cœleſtibus. Resp. Amen.

Oratio.

Commendamus tibi Domine animam famuli tui N. precamurq; te Domine Jelu Chriſte Salvator mundi ut propter quam ad terram miſericorditer deſcendiſti Patriarcharum tuorum ſinibus inſinuare non renuas. Agnoſce Domine Creaturam tuam, non à diis alienis creatam, ſed à te ſolo Deo vivo & vero; quia non eſt alius Deus præter te, & non eſt ſecundum opera tua. Lætifica Domine animam ejus, in conſpectu tuo, & ne memineris iniquitatum ejus antiquarum, & ebrietatum, quas

quas suscitavit furor, sive feruor mali desiderii. Licet enim peccaverit, tamen Patrem & Filium & Spiritum S. non negavit, sed credidit, & Zelum Dei in se habuit, & Deum qui fecit omnia, fideliter adoravit.

Oratio.

Delicta juventutis & ignorantias ejus, quæsumus ne memineris Domine, sed secundum magnam misericordiam tuam, memor esto illius in gloria charitatis tuæ. Aperiantur ei Coeli, collatentur illi Angeli. In regnum tuum Domine servum tuum suscipe. Suscipiat eum S. Michael Archangelus Dei qui militiæ Coelestis meruit principatum. Veniant illi obviam Sancti Angeli Dei, & perducant eum in Civitatem Coelestem Jerusalem. Suscipiat eum beatus Petrus Apostolus, cui à Deo claves regni Coelestis traditæ sunt. Adjuvet eum S. Paulus, qui dignus fuit esse vas electionis. Intercedat pro eo S. Joannes, electus Dei Apostolus, cui revelata sunt secreta Coelestia. Orent pro eo omnes S. Apostoli, quibus à Domino data est potestas ligandi atque solvendi. Intercedant

cedant pro eo omnes sancti & electi Dei,
qui pro Christi nomine tormenta in hoc
seculo sustinuerunt: ut vinculis carnis ex-
utus pervenire mereatur ad gloriam regni
Coelestis, praestante Domino nostro Jesu
Christo, qui cum Patre & Spiritu Sancto
vivit & regnat in secula seculorum Amen.

Si anxietur adhuc anima dicuntur hi
Psalmi videlicet: Confitemini Domino 17.
Et totus Psalmus 118. Beati immaculati
per horas distributus. Et Psalmus 21. Deus
Deus meus.

Egressa autem anima dicitur hoc Re-
sponsorium.

Subvenite Sancti Dei, Occurrite Angeli
Domini suscipientes animam ejus: offe-
rentes eam in conspectu Altissimi. Susci-
piat te Christus, qui vocavit te, & in sinum
Abraham Angeli deducant te. Suscipientes
animam ejus, offerentes eam in conspectu
Altissimi. Requiem æternam dona ei
Domine. Et lux perpetua luceat ei. Of-
ferentes eam in conspectu Altissimi.

Kyrieleyson, Christeleyson, Kyrie-
leyson. Pater noster &c.

M

Et

Et ne nos inducas in tentationem. Sed libera nos à malo. Requiem æternam dona ei Domine. Et lux perpetua luceat ei.

A porta inferi. Erue Domine animam ejus. Requiescat in pace. Amen. Domine exaudi orationem meam. Et clamor meus ad te veniat.

Dominus vobiscum. Et cum spiritu tuo.
Oremus.

Tibi Domine commendamus animam famuli tui. Nunc defunctus seculo tibi vivat: & quæ per fragilitatem humanæ conversationis peccata commisit, tu venia misericordissimæ pietatis absterge. Per Christum Dominum nostrum. Amen.

Non intres in judicium cum servo tuo Domine, quia nullus apud te justificabitur homo, nisi per te omnium peccatorum ei tribuatur remissio. Non ergo eum quæsumus tua judicialis sententia premat, quem tibi vera supplicatio Fidei Christianæ commendat: sed gratia illi succurrente, mereatur evadere judicium ultionis; qui dum viveret, insignitus est signaculo sanctissimæ Trinitatis. Qui vivis & regnas in secula seculorum.

PSAL-

PSALMUS.

Deprofundis clamavi ad te Domine :
Domine exaudi vocem meam.

Fiant aures tuæ intendentes, in vocem
deprecationis meæ.

Si iniquitates observaveris Domine :
Domine quis sustinebit.

Quia apud te propitiatio est : & propter
legem tuam sustinui te Domine.

Sustinuit anima mea in verbo ejus : spe-
ravit anima mea in Domino.

A Custodia matutina usque ad noctem :
speret Israël in Domino.

Quia apud Dominum Misericordia : &
copiosa apud eum redemptio.

Et ipse redimet Israël, ex omnibus ini-
quitatibus ejus.

Vers. Requiem æternam dona ei Do-
mine.

Resp. Et lux perpetua luceat ei.

Vers. A porta inferi.

Resp. Erue Domine animam ejus.

Requiescat in pace. Amen.

Vers. Domine exaudi orationem meam.

Resp. Et clamor meus ad te veniat.

Vers. Dominus Vobiscum.

Resp. Et cum spiritu tuo.

Oremus.

Deus cui proprium est misereri & parcere, te supplices exoramus pro anima famuli tui N. quam hodie de hoc seculo migrare iustisti: ut non tradas eam in manus inimici, neque obliviscaris in finem; sed jubeas eam à Sanctis Angelis suscipi, & ad patriam paradisi perducì, ut quia in te speravit & credidit, non poenas interni sustineat, sed gaudia sempiterna possideat. Per Christum Dominum nostrum. Amen.

Oremus.

Inclina Domine aurem tuam ad preces nostras quibus misericordiam tuam supplices deprecamur, ut animam famuli tui N. quam hodie de hoc seculo migrare iustisti, in pacis ac lucis regione constituas, & sanctorum tuorum jubeas esse consortem. Per Christum Dominum nostrum.

Absolve quæsumus Domine animam famuli tui ab omni vinculo delictorum ut in Resurrectionis gloria inter sanctos & electos

electos tuos resuscitatus respireti. Per
Christum Dominum nostrum Amen.

Vers. Requiem æternam dona ei Do-
mine.

Resp. Et lux perpetua luceat ei.

Requiescat in pace Resp. Amen.

Anima ejus & animæ omnium fidelium
defunctorum per Misericordiam Dei re-
quiescant in pace: Resp. Amen.

INSTRUCTIO NECES- SARIA.

*Sacerdoti, circa Sacramenta admini-
stranda Moribundis.*

Sacramenta quæ possunt moribundis
ministrari sunt quatuor, scilicet: Bapti-
smus, Pænitentia, Eucharistia & Extrema
Unctio. Circa quorum administrationem,
quia occurrunt difficultates, & dubia
practica, de quibus quia scientia non ha-
betur, non raro Ministrum sacramento-
rum contingit errare. Ne ergo erretur,
& Moribundi dispendium salutis patian-
tur, pono in assertionibus & resolutioni-
bus occurrentium difficultatum doctrinam,

nam, non tam meam, quam Doctorum
gravisimorum circa administrationem
prædictorum sacramentorum.

6. I.

THESES INSTRUCTORIÆ
Circa Baptismum, Moribundis
administrandum.

I.

Sicut laicus ita Sacerdos in peccato mor-
tali existens, baptizans in casu neces-
sitate, sine solemnitate, non peccat. Quia
non agit ut Minister ex officio, sed neces-
sitati infantis subveniens.

II.

In necessitate, scilicet in periculo vel
circumstantia mortis imminenti in bap-
tizando, quando non potest haberi Bap-
tismus certus, potest & debet adhiberi Ba-
ptismus probabilis & dubius. Quia lege
charitatis debemus prospicere quantum
possumus salutem proximi in periculo gra-
visimo, & extrema necessitate existenti:
Ergo non tantum medio certo sed etiam
dubio.

Bapti-

III.

Baptismus dubius est, 1mo. si fiat in Materia dubia, scilicet brodio seu jusculo carnis coctæ, lixivio. 2do. si tantum una vel altera gutta sit adhibita v. gr. si more aquæ lustralis multitudo sit aspersa. 3tio. si tantum abluta sit pars minus principalis v. g. digitus, manus, pes. 4to. si tantum crines sint tincti. 5to. si infans sit tinctus adhuc obvolutus secundæ suæ, id est pellicula corpori innata, cum qua jacebat in utero matris. 6to. Si adhibeatur Baptismus infanti adhuc in utero matris existenti. 7mo. si adhibeatur forma Baptismi dubia, qualis est ista: Baptizo te in nomine Genitoris, Geniti & Spirati. Vel: Baptizo te in nomine Ingeniti, geniti, & Doni. Vel: Baptizo te in nomine Patris, in nomine Filii, & in nomine Spiritus Sancti. &c.

IV.

Utrum in necessitate, deficiente aqua naturali, & Elementari, possit adhiberi aqua artificialis, qualis est aqua rosacea, vel aqua aliorum florum sive herbarum & plantarum, per distillationem elicita

tāquam materia dubia Baptismi? affirmant aliqui Doctores, ut Granado in 3. part. cap. 4. tract. I. dist. 3. dub 2. Joannes Præpositus in 3. part. D. Thomæ quæst. 66. artic. 4. Joannes Puteanus Theologiæ Professor Regius in Academia Tolosana. Ratio ipsorum est: quia (inquiunt) non omnino constat, utrum illi liquores elicitī differant specie ab aqua naturali: & quia Ecclesia hætenus non definivit ullo planè casu, nullam aliam aquam à naturali sufficere ad valorem Baptismi.

Verum ego aquam artificialem, & quemlibet liquorem, ex floribus, herbis, plantis, elicitum dico Materiam Baptismi non esse dubiam seu probabilem, sed omnino nullam. Ratio est. Quia Ecclesia in Concilio Tridentino Sess. 7. Canon. 2. definit ad Baptismum necessariam esse aquam veram & naturalem, scilicet Elementarem, qualis non est aqua artificialis, & quilibet liquor, ex herbis & plantis elicitus. Deinde; manifestum est aquam artificialem, & alios liquores, ex herbis & plantis elicitos distingui specie ab aqua naturali.

Nam

Nam aqua rosacea, & alii liquores ex herbis & plantis eliciti, non sunt aliud nisi substantiæ florum, herbarum & plantarum extracta, has autem substantias, quis non dicet distingui specie à substantia aquæ naturalis. Et sic rationes allegatæ illorum Doctorum non valent. Ex quo sequitur, nec illum liquorem seu aquam dictam Polonicè oskula, quæ tempore verno solet ex incisa betula fluere posse adhiberi pro Materia Baptismi dubia seu probabili.

V.

Baptismus sub conditione adhibendus, hac forma conferendus est: si baptizatus es, non te baptizo; si nondum es baptizatus. Ego te baptizo in nomine Patris & Filii & Spiritus s. Licet autem sufficiat in mente solum apponere conditionem, tamen tutius est eam exprimere verbis.

VI.

Perpetuè amentes, qui nunquam sunt uti ratione baptizari debent, quia censentur esse ejusdem conditionis cum infantibus. Si verò sunt uti ratione, non debent bapti-

zari, nisi ante amentiam baptismum petierint.

VII.

Baptismo conditionato, baptizandi sunt
1mo. Infantes expositi, & reperti sine schedula testante de Baptismo. 2do. Reperti quidem cum schedula, sed inter infideles v. gr. Turcas, Judæos, Arianos: nam isti ex odio baptismi, ne illo potiretur infans, potuerunt apponere schedulam testantem de puero baptizato. 3tio Infantes baptizati ab obstetricibus Maleficis, seu Sagis: vel ab istis quæ falsæ, vel convictæ fuerunt aliquando non rectè baptizaste. 4to. Infantes, de quibus est dubium, an vivant?

VIII.

Baptizandi sunt amentes, vel agonizantes sensibus destituti, qui ante Baptismum petierunt, ad quod sufficit testimonium unius, etiam mulieris.

IX.

Infantes infidelium invitis Parentibus validè, sed illicitè baptizantur. Ratio est: quia vel baptizati auferuntur à parentibus, & fit illis injuria. Vel relinquuntur, & fit

fit injuria sacramento propter irreverentiam: quia infans baptizatus, educatur tanquam infidelis.

X.

Pueri infidelium licitè baptizantur in his casibus. 1^{mo}. Si parentes infideles sunt mancipia Christiani, volentis infantes eorum baptizari. Juris enim ejus sunt liberi, sicut & parentes. 2^{do}. Si parentes aliquando fuerunt baptizati, vel saltem alteruter: quia propter Baptismum Ecclesia in eos jus habet. 3^{tio}. Si alter parentum baptismum pro infante petat. 4^{to}. Si infans sit in periculo mortis: tunc enim est jam extra potestatem parentum. 5^{to}. Si puer jam compos rationis petat baptismum; ad quod septennium sufficit: quia tunc est sui juris quoad electionem religionis.

XI.

Ad certitudinem baptismi requiritur ea quantitas aquæ, ut aqua possit per corpus fluere, & homo dicatur lotus seu ablutus; baptismus enim est lotio, seu ablutio hominis.

In

XII.

In naufragio vel alio periculo mortis, potest quis plures unicâ forma baptizare dicendo: Ego vos baptizo &c. Quia nihil deest ad valorem sacramenti; & extrema necessitas efficit, ut talis modus baptizandi sit licitus.

XIII.

Monstrum moribundum ex homine, quod caput & pectus hominis refert, cætera vero membra habet bestialia, baptizandum est ut verus homo; secus si habet caput & pectus ferinum. Ratio primi est; quia anima hominis principaliter residet in corde & capite: ergo cum monstrum habet hominis caput & pectus ubi est cor, censenda est ibi anima hominis esse, & monstrum illud censendum est esse verum hominem. Ratio 2^{di} per oppositum patet. Quod si solum caput ferinum sit, & mors immineat, detur baptismus sub conditione; aliâs signa hominis expectentur. Monstrum autem repertum in mari cum facie & aliqua speciei hominis non est baptizandum, cum non sit de semine hominis consequen-

sequentur non homo; nisi adsint signa Rationalitatis & Honesti; tunc enim præsumeretur natum esse casu ex semine hominis.

XIV.

Si monstrum habeat membra hominis geminata, & dubitetur, num sit unus homo an duo, duplex baptisimus conferendus est, unus absolutè, alter conditionatè, scilicet in ea parte qua membra apparent imperfectiora.

XV.

In necessitate, sine solemnitate possunt baptizare; sacerdos etiam excommunicatus, Diaconus, quisque inferior clericus Religiosus, Laicus, Vir, Mulier: ita tamen ut præsentè sacerdote non baptizet diaconus, neque præsentè diacono clericus, neque præsentè clerico laicus, neque præsentè viro mulier: nisi mulier esset prudentior, & ritè per praxim baptizare edocta, vir autem sit simplex vel stolidus.

XVI.

In necessitate potest Pater suum infantem baptizare; nec tunc ullam contrahit

cum conjugæ cognationem spirituales, nec impeditur à petitione debiti conjugalis; quia tunc non agit ut minister solemnitatis, sed necessitatis.

XVII.

Cum infanti moribundo confertur baptismus, non sunt necessarii Patrini; & si adhibeantur, non contrahunt cognationem spirituales. Quia non exercetur baptismus sollemnis, ubi solum requiruntur ex præcepto Ecclesiæ Patrini; & tunc contrahitur cognatio spiritualis.

XVIII.

Matre difficultatem patiente in partu, si timeatur ne infans ante egressum moriatur, baptizetur & abluatur in eo membrum, in quo ex utero matris apparet, ne moriatur sine baptismo.

XIX.

Infante valde debili vel infirmo existente, si timeatur ne baptismus sit causa mortis illius, & baptismus potest differri, differatur aliquantisper. Si vero sit periculum in mora, baptizetur infans, etiamsi acceleratio adsit mortis; nec irregularitas in-

incurrenda timeatur : nullum enim est hîc homicidium.

XX.

Baptizandi adulti, debent institui & probari per aliquot menses ante baptismum. At si urgeat necessitas obsidionis vel naufragii, vel similis periculi mortis, tunc expolita fide utcunque, si petens baptismum assentiatur, est baptizandus.

XXI.

Baptizandus baptismo dubio, orto ex quacunque ratione dubietatis, non est Ecclesiastica sepultura privandus; probabiliter enim censetur esse filius Ecclesiæ.

XXII.

Infans ad quem propter pestem, vel aliam causam non patet accessus, & per aspersionem, vel affusionem aquæ potest à longè baptizari.

XXIII.

Si baptismus deprehendatur esse invalidus, non ideo repetendæ sunt Cæremoniæ in baptismo adhiberi solitæ.

THE-

*THESES INSTRUCTORIÆ
Circa Sacramentum Pœnitentiæ mori-
bundus administrandum.*

I.

AD absolutionem sacramentalem cuiuslibet pœnitentis etiam moribundi, confiteri ore non valentis requiritur dolor de peccatis. Ita Trident. Sess. 14. de Pœnit. Sac. Can. 4. Deinde requiritur confessio peccatorum in eodem Trident. can. 9. ibid. Requiritur inquam confessio peccatorum vel formalis & expressa, cum accusatione sui ore facta, vel æquivalens scilicet desiderata, petita, ostensa perunctionem peccatoris vel alia signa doloris in ordine ad confitendum sacramentaliter. Unde.

II.

Moribundus qui cum loqui non possit, pectus manu tundit, & nutibus absolutionem petit absolvendus est sacramentaliter: & idem est de eo qui genibus sacerdotis advolutus, peccata confessurus subito apoplexia corripitur. Ratio est: quia in utroque

que casu moribundus ostendit se dolere,
& reum se coram iudice spirituali per
signa externa confiteretur.

III.

Moribundus qui absente confessario,
confessionem desideravit; petiit ac signa
doloris ostendit, testante hoc saltem uno
teste, sive ille testimonium præbuerit con-
fessario adstanti coram moribundo, sive
absenti ab illo, est absolvendus absolutè.
Quia moribundus petendo confessionem
fateretur se peccasse & pro peccatis dolet.

IV.

Moribundus linguæ usu destitutus, si
pugno pectus pulsat, suspirat, oculos ad
Coelum attollit; & si advertatur hoc facere
in ordine ad confessionem sacramentalem,
quam facere vellet si loqui posset, absol-
vendus est absolutè: quia adsunt requisita
ad absolutionem ei conferendam. Si verò
dubium sit, an illa signa orta sint ex vi con-
tritionis, & ex desiderio confessionis, an
verò ex incoerore, tædio & angustia mortis,
danda est ei absolutio sub conditione, ad
vitandum periculum sacrilegii.

Si

V.

Si moribundus sensibus omnibus destitutus neque voce, neque nutu confessionem petierit, neque signa ulla doloris de peccatis exhibuerit, non potest illi tam absoluta, quam conditionata dari absolutio ex ea solum ratione: quia moribundus in vita sua bene & ut Christianus vixit, justusque homo æstimatus fuit. Ratio est: quia citatum Concilium Trident. Sess. 14. de Pœnit. Can. 9. absolutionem sacramentalem decernit esse actum judiciale, ad quem requirit omnino ibidem confessionem tanquam occasionem rei: bona autem & Christiana vita alicujus non est vera Confessio sacramentalis cum dolore conjuncta.

VI.

Moribundus sensibus omnibus destitutus, qui neque voce neque nutu confessionem petit, neque signum aliquod doloris exhibuit; sive antea fuerit bonus, sive malus, dummodo nunc non fuerit in voluntate peccandi manere agnitus, potest conditionatè absolvi ex hoc fundamento:
quia

quia existens sui compos potuit pro peccatis doluisse, & confessionem affectasse; & sic potest absolvi in hac forma: si es capax, hoc est; si doluisti, & confiteri voluisti, ego te absolvo. Ratio est: quia absolutio sacramentalis est pharmacum: ergo non ægrè fert applicari conditionatè subiecto; & per conditionatam applicationem non fit irreverentia sacramento, nec committitur sacrilegium & ex alia parte quantum potest fieri saluti hominis subvenitur. Ipse Summus Pontifex Clemens VIII. hujus rei exemplum in praxi ostendit ut pro certo scribitur. Nam cum quidam ex alto fabricæ Divi Petri præceps ruisset, & illum cadentem vidisset, absolutionem ei impendit dicens: si es capax absolvo te à peccatis tuis.

VII.

Quilibet sacerdos etiam factus Hæreticus aut schismaticus aut excommunicatus non toleratus habet potestatem absolvendi in articulo mortis quoslibet penitentes à quibuscunq; peccatis & censuris. De hoc non est dubium. Contulit enim hanc

hanc potestatem Ecclesia cunctis sacerdotibus propter salutem animarum.

VIII.

Probabile est in articulo mortis posse simplicem sacerdotem absolvere moribundum præsente quolibet confessario approbato vel Parocho aut Superiore. Ratio est: quia simplices sacerdotes in articulo mortis quoad jurisdictionem, sunt aliis approbatis Confessariis pares.

IX.

Sacerdos simplex, qui jam cæpit audire confessionem moribundi, superveniente postea Confessario approbato, non tenetur desistere ab auditione Confessionis ad hoc ut Confessarius approbatus audiat confessionem moribundi; habet enim potestatem supra moribundum sicut approbatus.

X.

Quidam vulneribus sauciatus lethaliter, manet in periculo mortis, & duplici indiget medico, scilicet chirurgo & Confessario. Si chirurgus eum curet, infirmus confiteri non potest, & mors timetur, Si sacer-

Sacerdos confessionem audiat, chirurgus infirmum curare non potest, & ille deficit. Quid tunc faciendum? Debet Sacerdos aliquod peccatum saltem unum secretò ab infirmo audire, eumque dolentem pro peccatis statim absolvere. Ubi vero chirurgus medicamenta adhibuerit, debet integram infirmi si superstes erit confessionem audire, & illum denuo absolvere. Si verò infirmus sit in maximo periculo mortis, & non possit sibi commemorare peccata, ut aliquod eorum confiteatur, sufficit ut ostendat se esse peccatorem pectus tundendo & absolutionem petendo; & tunc confessarius potest illum absolvere.

XI.

Articulus mortis, & periculum proximum mortis idem sunt: unde constituti tam in articulo mortis, quam in periculo mortis possunt absolvi à quocunque Sacerdote ab omnibus casibus & censuris. Tales etiam sunt damnati ad mortem, Prægnantes, quæ nunquam vel cum difficultate pepererunt.

Si

Si confessorius inveniatur infirmum esse excommunicatum personaliter excommunicatione majori à Papa vel Episcopo, aut ejus Vicario, non debet illum statim absolvere, sed debet illum monere : ut si tempus permittit & commodè fieri potest ad Superiorem à quo fuit excommunicatus recurrat, & ab eo absolutionem petat. Quia debet servari authoritas, & honorari potestas Ecclesiæ ; & ita fit de jure, ut qui censuram tulit, ab ea etiam absolvat. Si verò infirmus ad Superiorem commodè recurrere non potest, eum sacerdos absolvat, sed cum præmissa satisfactione, si fieri debeat, & commodè possit : vel saltem cum debita cautione præstandi efficacium satisfactionem v. gr. solutionem debitorem Ecclesiæ, vel parti, post morbum si convaluerit, vel etiam post mortem. Quæ Cautio fieri potest vel per fidejussores, vel per executores testamenti. Quod si mors immineat, & nihil horum fieri possit, Sacerdos moribundum à Censura absolvat. Debet tamen hoc onus imponere poenitenti

tenti infirmo, ut cessante morbo præsentet se Superiori, à quo fuit excommunicatus petendo absolutionem. Aliàs (moneat infirmum) si se non præsentaverit in eandem Censuram incidet.

XIII.

Infirmus in articulo mortis absolutus à reservatis, quæ nullam habent annexam Censuram, non tenetur petere absolutionem eorum à Superiore, si convaluerit; jam enim est ab illis absolutus sine onere se præsentandi requisito à jure. Tempus autem absolvendi moribundum à reservatis, non incipit, à prima die infirmitatis, sed ex quo infirmus incipit periclitari lethaler.

XIV.

Puer de quo dubitatur utrum habeat usum rationis, si in confessione ipse ultro fateatur peccatum veniale vel mortale, absolvendus est tanquam reus peccati; censetur enim habere usum rationis, si verò fateatur veniale vel mortale interrogatus de his peccatis à Confessario, interrogandus est: an hoc fecerit tanquam quid illi-

illicitum, & habuerit hoc pro peccato, dum hoc faceret? si affirmaverit, absolvendus est absolutè. Si autem dixerit se nescivisse, utrum hoc fuerit peccatum, absolvendus est conditionatè.

XV.

Confessarius moribundum absolvere potest, non audita ejus integra confessione in his casibus. Imo. Si infirmus uno vel altero peccato dicto, deficiat lethaliter, vel sit grave periculum ne deficiat. 2do. Si infirmus volens confiteri invenitur multas confessiones fecisse invalidas, & gravitas morbi non patiatur dilationem absolutionis. 3tio. Si ipse Sacerdos correptus morbo videatur moriturus, antequam poenitens absolvatur. 4to. Si tempore pestis, dum Sacerdos audiret confessionem unius moribundi alii periclitarentur peste infecti; tunc audito aliquo peccato unius, potest illum absolvere, & deinde similiter audire & absolvere alios. 5to. Si periculum sit ne Sacerdos audiens diu peste infectum ipse inficiatur. 6to. Si immineat conflictus, vel sit multitudo mori-

moribundorum v. gr. in naufragio, nec possint omnes audiri. In quo casu, etiam omnes simul dicto uno peccato, quod minus diffamat v. gr. mendacio; vel etiam si aliter fieri non possit dicendo, vel ostendendo se peccatores confessione pectoris atque dolendo, possunt absolvi à Sacerdote dicente: Ego vos absolvo.

Notandum est autem eos, qui iusta de causa confessionem materialiter integram non fecerunt, debere postea si convaluerint, vel periculum evaserint integrè iterum data opportunitate confiteri & absolvi.

XVI.

Confessarius moneat infirmum ab alio graviter injuriatum, ut omnino odium & rancorem atque signa rancoris contra inimicum deponat; non verò eum cogat, ut actionem legitimam & satisfactionem pro injuria sibi illata coram iudice legitimo expetendam remittat si convaluerit, jure enim de injuria agere potest. In articulo autem mortis, monendus est æger, ut plenè inimico reconcilietur.

N

Sacer-

XVII.

Sacerdos vocatus ad moribundum ab-
rumpat & dimittat omnia negotia, & ad
infirmum convolet; relinquat Missam
non solum inchoatam, sed etiam post
consecrationem operiendo Eucharistiam
in altari relictam. Asportet secum hostio-
lam consecratam ex pixide; quam si non
habet, frangat particulam hostiæ magnæ
in Missa consecratæ. Ferat quoque secum
Oleum extremæ unctionis. Si diu moran-
dum esset in audienda Confessione
infirmi, absolvat eum, communicet, Oleo
Extremæ unctionis ungat, dimissis Psalms
Pænentialibus post Missam dicendis, pro-
mittens se venturum post sacrum, con-
fessionem ulterius auditurum & absolutu-
rum. Post hæc revertatur & Missam con-
tinuet.

XVIII.

Homo sanus licet per interpretem
confiteri non teneatur, tamen in articulo
mortis, tenetur per eundem interpretem
aliqua peccata minoris infamiæ, subicen-
do peccata majoris infamiæ confiteri;
qui-

quibus auditis Sacerdos potest illum absolvere.

XIX.

Si infirmus præ gravitate morbi, ore confiteri commodè non possit, & habeat sufficienter scripta peccata sufficit illi ea Confessario præsentì ad legendum porrigere, de illis signa doloris ostendere; & tunc eum Sacerdos absolvar. Dixi Confessario præsentì: nam si moribundus mittat peccata scripta Sacerdoti absenti, rogans ut eum absentem absolvar, talis confessio & absolutio nullius sunt valoris, ex decreto declarativo Clementis VIII. Summi Pontificis.

XX.

Sæculares aliqui, in articulo mortis, non habentes Sacerdotem, solent ex simplicitate confiteri peccata sua aliis sæcularibus (immo aliquando arboribus) tum ideo, quia hoc putant sufficere; tum ideo, ut hi quibus confitentur peccata sua, postea Sacerdoti confiteantur peccata eorum.

Quid de talibus confessionibus sentien-

N 2

dum?

dum? Dico nullo modo eas esse sacramentales & validas atque necessarias; non esse tamen prorsus inutiles: nam sic confitentes, ostendunt se paratos fuisse confiteri peccata sua sacerdoti, si eum habuissent; deinde sic confitendo confunduntur & erubescunt nimis de peccatis suis; quod Deus pro poena magna acceptat, iram suam mitigat, atque ad misericordiam præstandam, & dolorem verum de peccatis tribuendum moribundo fleat.

III.

THESES INSTRUCTORIÆ

Circa Sacramentum Eucharistiæ Moribundis administrandum.

I.

SUmere Sacro Sanctam Eucharistiam tanquam cibum Cœlestem, ad augendam gratiam & vitam spiritualem tenentur fideles in vita ex præcepto Divino, in illis verbis Christi Domini: *Nisi manducaveritis carnem Filii hominis &c. non habebitis vitam in vobis*; in articulo autem mor-

mortis ad eandem Eucharistiam sumendam per modum Viatici, tenentur ex præcepto Ecclesiæ & quidem sub peccato mortali. Hoc patet in concilio Nicæno Can. 13. ubi decernitur: *Cùm iis qui vitâ creduntur discessuri, antiqua lex servetur, nempe ut ultimo, & necessario viatico non priventur.*

Ratio hujus præcepti Ecclesiæ & Communionis per modum viatici est: quia homo è vita discessurus ingreditur viam periculosissimam, tentationibus dæmonum plenissimam; indiget munimine, robore, auxiliis, ad superandas tentationes, & ad perleverentiam in gratia Dei: hæc autem omnia præstat illi venerabilis Eucharistia, cum sit illi tanquam annona & Commeatus, atque scutum in illo periculosissimo itinere ad Cœlum; unde existens in articulo vel proximo periculo mortis, tenetur Eucharistiam sumere sub mortali.

I I.

Sanctissima Eucharistia per modum viatici, debet dari tunc infirmo cum pru-

denter judicatur esse moribundus, vel
mori proximus; & præcipuè cum veri-
similiter putatur, quod eam moribundus
amplius non poterit sumere.

III.

Forma dandi Viaticum est hæc: *Accipe
Frater (vel Soror) Viaticum corporis Domini
nostri Jesu Christi, qui te custodiat ab hoste
maligno, & perducatur te in vitam eternam.
Amen.*

IV.

Incidente articulo mortis tempore pa-
schali, satisfacit infirmus una communione
utrique præcepto, scilicet communicandi
in paschate, & in articulo mortis. Quia
etiam incidente Festo in Dominica satis-
facit fidelis præcepto, si tantum unicam
audiat Missam. Si tamen post Susceptam
Communione Paschalem, tempore pa-
schali incidat articulus mortis, tenetur
ille iterum communicare in articulo mor-
tis: quia hoc præceptum nondum est im-
pletum, & debet impleri, quia est aliud.

V.

Ille qui ex devotione communicavit, & eodem die incidit in articulum mortis vel ejus proximum periculum, non tenetur eodem die communicare ex præcepto Ecclesiæ. Ratio est: quia moribundus accepit Viaticum in re, licet non in intentione; & hoc eo tempore, quo Ecclesia præcipit sumere. Nihilominus tamen potest eodem die quo ex devotione communicavit, sumere, Viaticum, etiam non jejunus: hoc enim eum Ecclesia mater facere non prohibet; licet sanis propter reverentiam sacramenti non soleat bis eodem die dispensare Eucharistiam.

VI.

Qui ex devotione, vel ex præcepto paschalis communionis, sumpsit Eucharistiam ante septem vel octo dies, imminente articulo mortis, tenetur de novo ex præcepto Ecclesiæ viaticum sumere. Ratio est quia communio in articulo mortis ex præcepto Ecclesiæ, alligata est tempori articuli mortis, sicut Communio paschalis, alligata est tempori paschali.

VII.

Qui in infirmitate gravi sperans se moriturum, sumpsit viaticum, non tenetur iterum sumere adveniente ipso articulo mortis; implevit enim jam Ecclesiæ præceptum. Potest tamen sumere post sex vel septem dies, immo sequenti die, si est morti proximus, etiam si non sit jejunus: Ecclesia enim mater non vult privare subsidio filium, ipso illud afficiente.

VIII.

Qui sumpto viatico peccavit mortaliter, non tenetur iterum communicare, sed solum confiteri & pænitere. Quia jam implevit præceptum sumendi viaticum.

IX.

Sacerdos in periculo mortis v. gr. imminentis hostis, & non potens habere aliunde Eucharistiam, potest non jejunus celebrare, & se communicare. Ille enim non est deterioris conditionis, quam laicus, cui conceditur, non jejuno sumere viaticum in articulo vel periculo mortis.

Potest

X.

Potest dari casus quo laicus in articulo mortis possit seipsum communicare, exemplo Mariæ Reginae Scotiæ Martyris, quæ subitura martyrium, Eucharistiam in cubiculo conservatam, ante mortem sumpsit. Vel ab alio laico Viaticum sumere exemplo Serapionis Senis, qui (ut refert Eusebius Lib. 6.) infirmatus graviter misit puerum ad Sacerdotem pro Eucharistia, qui cum ipse infirmus venire non posset, misit per puerum particulam consecratam, quam Serapion è manibus pueri juxta mandatum pueri sumpsit. Et hoc patet ex Glossa, quæ explicans illud Caput: Pervenit: dist. 2. de Consecrat. dicit: Presbyter per semetipsum, infirmum communicet, vel per diaconum, si necesse est, vel per laicum Catholicum.

Unde tempore pestis Sacerdos potest Eucharistiam ponere in loco mundo v. gr. in linteolo, vel pane, & relinquere eam ab hominibus infectis sumendam. Timens quoque ingredi domum peste infectam, potest mittere in linteolo vel vasculo mun-

do Eucharistiam infirmo domi decumbenti, ut eam vel seipsum sumat, vel alter ei inos imponat. Ratio est: quia laicus in articulo mortis seipsum communicans, non aliud facit nisi manducat carnem Christi, à Sacerdote sibi porrectam. Dum autem laicus aliis Eucharistiam porrigit, non dispensat eam tanquam Sacerdos, sed solum se gerit tanquam instrumentum Sacerdotis in casu maximæ necessitatis: potest autem Sacerdos instrumento materiali porrigere Eucharistiam cum aliter non possit.

XI.

Si infirmus non possit deglutire aliquid de cibo sine haustu; vel timeatur infectio pestis, potest ei dari communio imposita particula hostiæ cum vino, vel alio liquore in cochleari.

XII.

Sacerdos celebrans, & non habens parvam hostiolam laicis dari solitam, potest parvam partem hostiæ suæ consecratæ in Missa, dare infirmo.

XIII.

Infidelis in articulo mortis naturalis vel violentæ, conversus ad fidem debet instrui prius, eo modo, quo in tali casu fieri potest; & post Baptismum sacra Eucharistia ei præbeatur.

XIV.

Deliranti, lucida intervalla non habenti, non est danda ulla modo Sacra Communio, licet ante dementiam eam petierit, propter periculum magnæ irreverentiæ Sacramenti; nam delirans potest Eucharistiam non deglutire, immo expuere.

XV.

Damnato ad mortem, si ejus supplicium differri non potest, danda est Sacra Communio, etiam non jejuno; licet etiam post horam ducendus esset ad mortem. Violenta enim mors, non tollit ab eo obligationem sumendi Viaticum; nec privat eum subsidio spirituali pro itinere futuro; nec fit irreverentia sacramento, propter

non jejunum stomachum, annuente Ecclesia & Christo.

XVI.

In articulo mortis, dari potest Sacra Communio à Sacerdote quocunque, à quo in eodem articulo potest dari absolutio à peccatis; nisi adsit proprius Parochus vel ejus Vicarius paratus moribundum communicare. Religiosi autem sine licentia Parochi, possunt suos famulos moribundos communicare: Censentur enim esse famuli de corpore Conventus privilegiati.

XVII.

Infirmus vomitus patiens, si nihil cibi vel potus retinere potest, non est ei danda communio. Si vero modicum cibi retineat, fiat experientia cum hostia non consecrata, quam si retineat, poterit ei dari etiam consecrata. Quod si contingat, ut sumptam Eucharistiam evomat, accipiat decenter Eucharistia, & in sacro reponatur loco; & cum sacræ species corruptæ fuerint, in sacrarium projiciantur.

S. IV.

THESES INSTRUCTORIÆ

Circa Sacramentum Extremæ Unctionis moribundis administrandum.

I.

Oleum Extremæ Unctionis accipiendum est quotannis novum in Coena Domini consecratum : Vetus autem comburendum est in Ecclesia, vel in piscinam sacram reponendum ; si tamen novum pro unctione haberi non possit, potest adhiberi antiquum. Et si non sufficiat consecratum, potest affundi non consecratum in minori quantitate, quam fuerit consecratum.

II.

Sacramentum Extremæ Unctionis non est conferendum infirmo, communi & leviori morbo laboranti, sed graviter infirmanti, & in vita periclitanti. Non est tamen differenda Extrema Unctio, usque dum infirmus jam sensu & cognitione careat ; vel constet eum naturaliter non

posse vivere : id enim est contra reverentiam, & utilitatem sacramenti, quod confert sanitatem etiam corporis tempestivè acceptum.

III.

Dum timetur ne infirmus moriatur ante finitam omnium sensuum unctionem, potest sacerdos velociter, sine crucis forma ungere unum oculum, unam aurem, unam manum, pedem, nares dicendo hanc formam : Per istas sanctas unctioes &c. indulgeat tibi Deus, quidquid per visum, auditum, tactum, gustum, gressum, olfactum deliquisti. Immo in maxima necessitate, vel periculo pestis, sufficit ungere aliquod organum, vel in fronte caput, ubi omnes sensus maxime vigent dicendo : Per istam sanctam unctionem &c. indulgeat tibi Deus quidquid per omnes sensus deliquisti.

IV.

Sicut suscipere Sacramentum Extremæ Unctionis, non tenetur fidelis sub peccato

cato mortali, secluso contemptu & scandalo: ita Parochus non tenetur illud sub peccato mortali ministrare; nisi infirmus graviter indigere videatur v. gr. moribundus sensibus destitutus, qui alia sacramenta non potuit suscipere; tunc enim debet inungi, ne omnino sine sacramentis decedat.

V.

Et si per se loquendo Confessio non necessario præmittatur Extremæ Unctioni, cum per Contritionem saltem existimatam infirmus se disponere possit ad Extremam Unctionem, cum fructu suscipiendam, & postea possit confiteri & communicare; tamen ordinariè præmittenda sunt sacramenta Confessionis & Communionis. Quia hæc est consuetudo Ecclesiæ; & quia prius sumenda sunt sacramenta necessaria, & deinde utilia.

VI.

Pueris habentibus sufficientem usum rationis ad peccandum, tamen Eucharistiam

ristiam non recipierint, non est neganda
Extrema Unctio. Et Parochus, etiamsi
ex Confessione cognoscat puerum, nun-
quam actualiter peccasse, debet tamen
illum inungere dicendo sub conditione:
si quid per visum, auditum &c. deli-
quisti. Nam illi hæc Unctio proderit ad
robur acquirendum contra tentationes
& morbi molestias, atque ad gratiam
augendam.

VII.

Perpetuo amentes, non sunt capaces
Extremæ Unctionis; secus illi qui inci-
derunt in amentiam & phrenesim: hi
enim si ante dementiam signa doloris de
peccatis ostenderint, vel confessi & com-
municati fuerint possunt ungi ligati, vel
fortiter tenti.

VIII.

Muti, cæci, surdi à nativitate sunt ca-
paces Extremæ Unctionis; & ideo de-
bent, ungi organa sensuum quibus carent.
Nam etsi exterius per illa non pecca-
verint, potuerunt tamen peccare per in-
terio-

teriores potentias quibus organa correspondent.

IX.

Minister sacramenti Extremæ Unctionis est solus Parochus, sine cujus licentia alter illud licitè administrare non potest. Et Religiosus incurrit Excommunicationem Papalem administrans illud Parochianis; non autem sui Conventus famulis. In necessitate verò, ut si Parochus absit, vel concedere nolit, nec superior pro licentia petenda possit adiri, licitè administrat quivis non excommunicatus aut suspensus etiam Regularis. Censetur enim tunc Papa dare licentiam.

X.

In necessitate possunt plures Sacerdotes ministrare Extremam Unctionem, ita ut unus ungat oculos, alter aures &c. proferente utroque formam debitam. Non tamen potest unus ungere, alter formam proferre; neque unus unum oculum, & alter alterum. Non perficiente vero Sacerdote Extremam.

Un.

Unctionem ob aliquam causam, eum re-
trahentem, potest alius Sacerdos Unctio-
nem continuare, in sensibus non unctis:
Vel etiam ungere omnes sensus, etiam
ab alio Sacerdote jam unctos.

XI.

Sacerdos administrando Extremam
Unctionem debet imo habere mini-
strum qui eum juvet. 2do. Debet esse
indutus superpelliceo, vel saltem stola.
3tio. Debet dicere Psalmos Poenitentiales,
& orationes adhiberi solitas. 4to. Debet
oleum sacrum ad agrum deferre, & illud
administrare cum lumine. 5to. Debet
ungere sensum corporis per modum
crucis, si autem in necessitate ista non
possunt haberi, nullum est peccatum,
ministrare Extremam Unctionem sine
illis.

XII.

Sacerdos moribundus non potest sibi-
metipsi Extremam Unctionem admini-
strare. Quia S. Jacobus distinctas per-
sonas

sonas assignat, scilicet infirmum un-
gendum, & Presbyterum uncturum.

XIII.

Parochus habens Parochianum infirmum, & timens, ne de nocte ad eum moribundum ad ungendum vocetur, non peccat etiam venialiter, si pro nocte oleum sacrum domi in loco decenti reverentialiter habuerit; secus si semper domi retinuerit.

XIV.

In eadem infirmitate infirmus potest iterum, atque iterum inungi, quoties periculum mortis evaserit, & in novum inciderit eadem infirmitate manente. His positis & perlectis Patrone mi Spiritualis.

QVÆRES.

Quid sit agendum cum moribundo Beneficiato Ecclesiastico qui obtinet plura Beneficia Ecclesiastica? An scilicet relinquendus sit in sua fide reputans: habere plura Beneficia non esse peccatum,

tum, consequenter sit absolvendus? an vero facienda sit sibi conscientia, suadendumque, ut relicto uno Beneficio resignet ante mortem cætera; & si noluerit, non sit absolvendus?

Respondeo imo. Plura Beneficia habere etiam sine dispensatione posset in his sequentibus casibus. imo si plura Beneficia sint tenuia, ut nullum singillatim sufficiat ad sustentationem, & sint simplicia, nec requirant residentiam. Talia enim Beneficia faciunt unum sufficiens ad sustentationem. 2do. Si Canonica est annexa Parochia tanquam accessoria; tunc enim utrumque per modum unius possidetur, ita tamen ut Canonici teneatur Vicarium perpetuum in Parochia conservare. 3tio. Quando duo Beneficia sunt legitimè unita. 4to. Quando alius idoneus & dignus non reperitur. 5to. Quando unum Beneficium habetur in titulum, alterum verò in Commendam non perpetuum, sed ad
 tem-

tempus scilicet ad aliquot menses, donec de idoneo provideatur. In his casibus dico moribundum Beneficiatum à Culpa liberum esse, proinde absolvendum. Ratio est. Quia in his casibus nihil sit contra jus Divinum, Ecclesiasticum, & Naturale.

Respondeo 2do. Qui obtinet plura Beneficia incompatibilia cum dispensatione Summi Pontificis obtenta propter justam causam, licet hæc Beneficia possidet, & sic moribundus est absolvendus. Ratio est. Quia tunc est valida dispensatio. Est autem justa causa ad obtinendam validam dispensationem triplex. 1ma. Necessitas Ecclesiæ. 2da. Pia utilitas ejusdem Ecclesiæ. 3tia. Evidens Prærogativa meritorum Beneficiandi cedens in majus commodum & utilitatem Ecclesiæ.

Respondeo 3tio. Qui plura Beneficia incompatibilia per dispensationem obtentam

tentam sine iusta & legitima causa possidet, non est tutus in anima; ideo uno beneficio relicto debet resignare alia; & si noluerit non est absolvendus. Ratio est. Quia tunc non est valida dispensatio, & sic illicitè mortaliter obtinentur plura beneficia.

Respondeo 4to. Beneficia incompatibilia sunt hæc: Imo. Beneficia curata, quæ scilicet habent annexam curam animarum, tam in foro interno scilicet Parochiæ, quam externo ut Episcopatus, Patriarchatus. 2do. Omnia beneficia quæ dicuntur Dignitates, Personatus officia, & requirunt distinctionem personarum vel residentiam. 3tio. Beneficia pingua quorum singillatim quodlibet sufficit ad commodam & honestam sustentationem. 4to. Beneficia uniformia, seu unius rationis v. gr. duo Canonici sub eodem recto. Talia beneficia qui possidet sine valida Summi Pontificis dispensatione, injustè & illicitè

ea possidet, estque in statu malo; proinde uno relicto debet cætera resignare; & si noluerit, non est absolvendus. Et hoc ideo;

imo. Quia habens plura ejusmodi Beneficia diminuit cultum & Honorem Divinum Deo debitum propter beneficium quod possidet. Nam quodlibet beneficium datur propter officium cultus Divini singillatim Deo exhibendi à beneficiato in loco ad quem habetur beneficium, scilicet in Ecclesia vel Cathedrali, vel Collegiata, vel Parochiali, ita ut tot debeant esse officia cultus Dei, & tot cultores Divini quot sunt beneficia. Quia ergo unus habens plura beneficia non potest satisfacere uno officio seu cultu Divino pro pluribus Beneficiis, possidens plura incompatibilia diminuit cultum Divinum debitum Deo propter Beneficium.

2do. Quia qui possidet ejusmodi plura beneficia facit injuriam imo Ecclesiæ quæ destituitur majori numero Operatorum & Ministrorum spiritualium. 2do Fundatoribus qui frustrantur sua pia intentione ; ipsi enim fundârunt pro tot personis distinctis præbendas & redditus , ut per eas personas fiat cultus Divinus. 3tio. Clericis pauperibus Beneficiandis, qui essent utiliores Ecclesiæ, utpote boni, docti, exemplares, pro Deo laboriosi ; hi enim privantur præmio quo sunt digni ab Ecclesia. Nam pluralistæ beneficiorum eripiunt eis, victum, amictum, sustentationem honestam & honorem debitum.

3tio. Quia qui plura ejusmodi possidet beneficia, facit gravissimè contra justitiam. Nam ut ait S. Thomas Quodlib. 9. num. 10. Sotus lib. 3. quæst. 6. Artic. 3. Azorius lib. 6. cap. 11. quæst. 5. Beneficia Ecclesiastica sunt stipendia meritorum spiritualium, data Clericis pro offi-

officio & labore, quem sustinent circa cultum Divinum vel salutem animarum. Igitur ut quis talia stipendia justè accipiat & possideat, debet illa pio & sacro labore promereri: sed habens plura prædicta Beneficia, illa distinctis laboribus non promeretur cùm ad id non sufficiat: Ergo accipit & habet mercedem sine labore; Ergo facit contra justitiam.

4to. Quia obtinere plura prædicta Beneficia est contra rectam rationem; & magnam involuit disordinationem ut ait Concilium Tridentinum Sess. 24. Quid enim magis potest esse contra rectam rationem, & ordinem in Ecclesia servandum, quam ut ex his qui sunt adscripti Militiæ spirituali & labori Ecclesiastico, aliqui soli: stipendia accipiant, & alii vacuas portent manus? Hi qui sunt benè Saturi, adhuc magis saturentur, repleantur, saginentur: & alii
 O esu-

esuriant, & famem patiantur? Hi qui sunt divites adhuc magis ac magis ditentur, alii vero paupertate premantur? Hi qui sunt pingues, adhuc magis ac magis pinguescant; alii vero macilenti, tenues & graciles existant? Propter istas causas periculosissimum est, ut vix non dicam certissima materia ignis æterni tenere plura beneficia incompatibilia. Et ne falsò prophetare, aut gratis asserere videar, voco & sisto mortuos damnatos pluralistas beneficiatos in testimonium.

Damnati pluralistæ beneficiati. Scribunt gravissimi Autores scilicet: Thomas Cantipratanus Cameracensis Episcopus Libr. I. Apum cap. 19. part. 7. Dionysius Carthusianus Libr. de pluralitate beneficiorum cap. 7. Beyerlink in Theatro magno sub liter. B. Verbo Beneficium. Antonius Dauroultius in Floribus exemplorum cap. 3. titul. l. 10. Exempl. 2. quis-

Quisquis hæc lecturus est (scribit
 Cantipratanus) volo ut sciat me fuisse
 Parisiis Anno Domini 1238. Ubi Vene-
 rabilis Guillelmus Episcopus Parisiensis,
 qui in Theologia maximus erat Doctor,
 convocavit omnes Magistros in capitulo
 Fratrum Prædicatorum ad proponen-
 dam & discutiendam quæstionem de plu-
 ralitate beneficiorum. Post solertem
 verò ac prolixam disputationem, con-
 clusum est duo beneficia dummodo al-
 terum quindecim libras Parisientes va-
 leret, teneri cum salute animæ non
 posse. Id ita determinavit Episcopus.
 Eandem quoque sententiam in scholis
 propriis secuti sunt successivè Frater
 Hugo Ordinis Prædicatorum, postmo-
 dum Romanæ Curiae Cardinalis, Frater
 Guericus, Frater Gaufridus ejusdem
 Ordinis, & Frater Joannes de Rupella
 Ordinis Fratrum minorum, aliique
 plures Theologiæ Magistri. Fuerat
 eadem quæstio diu ac multò celebrius

O 2

ante

ante tres annos agitata : atque tum omnes Doctores in eandem ibant sententiam duobus exceptis, quorum unus fuit Philippus Cancellarius Parisiensis, & alter Arnoldus postea Episcopus Ambianensis. Quid autem de ipso Philippo contigerit ? audiamus. Agonizantem Cancellarium Dominus Guilielmus Episcopus Parisiensis paterna sollicitudine visitavit, rogans eum, ut singulari opinionioni cederet de pluralitate beneficiorum, & omnia beneficia sua excepto uno in manus Ecclesiæ resignaret. Et hoc conditione media, ut si convalesceret : ei supplere vellet de suo proprio quod dimisit. Renuit ille, experiri se velle dicens : Utrum esset damnabile beneficia plura tenere ? Mortuus est ergo sic. Post paucos autem dies cum prædictus Parisiensis Episcopus Matutinas horas orare vellet, vidit inter se & lumen, quasi umbram quandam hominis, tetram nimis. Elevata ergo manu

manu consignat se cruce, & si ex parte Dei sit, præcipit ut loquatur. Et respondit apparens: Alienus à Deo sum, & tamen miserabilis factura ejus. Et Præsul: Tu quis es? Et ille: Ego sum: (inquit) Cancellarius ille miserrimus. Rursus Episcopus elato altius gemitu, Et quomodo (inquit) tibi est sic dolenti? Male (ait) immo & pessimè, Nam sum damnatus morte æterna. Et Episcopus: Heu (ait) charissime, & quæ causa est tuæ damnationis? Et ille: Tres sunt (inquit) causæ, quare morte perpetua sum damnatus. Una est. Quia crescentes fructus annuos tenaciter conservavi, nec pauperibus erogavi. Secunda quia plura beneficia tenui, & contra sententiam plurimorum de pluralitate beneficiorum quasi licitè tenendorum, sententiam propriam defensusvi, & in hoc mortaliter peccavi. Tertia est, & illa gravissima omnium; quia abominabili carnis vitio cum scandalo

multorum multo tempore laboravi.
Tunc ad Episcopum mox subjunxit:
Estne mundus finitus? Et Episcopus:
Miror (inquit) te quondam literatis-
simum virum hoc quærere, cum me
adhuc vivum cernas, & omnes nos ad-
huc viventes mori necesse sit antequam
mundus instante judicio finiatur. Et
ille: Ne mireris (inquit) quia nec
scientia, nec opus, nec ratio apud in-
feros inveniuntur. Et hæc dicens umbra
ab oculis mirantis Episcopi evanuit. Ipse
autem Episcopus hæc in prædicatione
sua Clericis omnibus enarravit.

Idem ibidem Cantipratanus sic scribit:
Simili modo cum quidam Clericus ma-
ximæ literaturæ agonizans in morte
pro me mandâsset, ut consilium quæ-
reret, quasi in proximo moriturus.
Reduxi ei ad memoriam disputationem
illam solemnem, & determinationem
de pluralitate beneficiorum Parisiis fa-
ctam,

Etiam, cui ille interfuerat Doctor magnus.
 Consulique illi cum magna instantia
 lacrymarum ut unam præbendarum di-
 mitteret, quoniam duas contra animam
 suam tenuerat : quarum una ad omnem
 vitæ copiam omni Clerico sufficere pos-
 set. Tunc ille facie averfa dissimulans,
 hoc tantum respondit : Orate Domi-
 num Deum ut inspiret. Nec diu postea
 cum recessissem, & tenuissimo spiritu
 vix hærente, hoc idem quod consulu-
 eram ei, quidam consobrinus ejus cum
 maximis lacrymis inclamaret, cum voce
 non posset, manu innuens exspiravit.
 Post cujus obitum cum quidam ex nostris
 stupescens nimium cogitaret, cur tantus
 homo, & tantus Clericus, si mortale
 peccatum esset, plura beneficia reti-
 neret, in tali statu mortuus extitisset,
 mox ei defunctus apparens dixit : Hæc
 sola præbendarum causa est, pro qua
 infelix ego in perpetuum damnatus sum.
 Propterea Guiardus Episcopus Camera-
 censis

censis considerans quam sit periculosum
tenere plura beneficia : Nollem (aiebat)
pro omni auro Arabiæ per unam tantum
noctem beneficia tenere, etiamsi certus
essem quod postridiæ unum ex illis per-
sonæ dignæ conferendum esset ; & hoc
propter incertitudinem vitæ & pericu-
lum salutis.

*Ad Laudem Omnipotentis Dei, totiusq̃
Curie triumphantis Honorem, atq̃
Animarum Salutem.*

F I N I S.



